

Tuhun vaha naçahyí Lucas sahá ña nacaja na apóstol

Naçahan Jesús tuhun a quixi ínima yii Ndióxi

¹ Jihna sa naçahyí i in libro ña ná candoo a nu ndóhó, tá Teófilo. Mé libro cán cáhan ndihi a sahá ña nacaja Jesús ta cáhan ndihi a sahá ña najánaha mé á tá naçasáhá cája chúun a ² ta janda tá nandaa cuahan indiví. Tá naçahin a ñuyiví yóho ta cámani cuhun a indiví já naçaxi Jesús uxu ivi dataa cacuu da apóstol ña ná caja chúun na cuéntá mé á. Ta nacaja ínima yii Ndióxi ña ná cuu jánaha Jesús nuú na cán ña ndítahan nu ná caja na. ³ Ta tá sa naçihí Jesús ta nanditacu tucu a já naçica nuu a ñuyiví yóho tixi ivi jícó quivi. Ta nanaha mé á nuú ndihi na cúu apóstol já ná candaa ini na ña mé a ndaa nanditacu tucu a. Ta najánaha nu ná ña cúni Ndióxi cacomí a cuéntá sahá ñayivi.

⁴ Tá cámani ndaa Jesús cuhun a indiví já naçahin a xihín na apóstol já naçahnda mé á chuun nu ná já cáchí a já xihin ná:

—Xíní ñúhú candati ndó ñuu Jerusalén yóho anda quiahva xinu ínima yii Ndióxi cañuhu a ini ínima ndo. Jáchi naçahan tátá i tuhun a nu ndo ña quixi ínima yii mé á ndacaan ini ínima ndo ña cán quea najánaha i ndohó ña naçachi mé á. ⁵ Mé a ndaa najácandúta Juan ñayivi xihín ticuí joo tixi chá quivi jándicutú Ndióxi ndohó xihin ínima yii mé á —cáchí Jesús xihin ná.

Tá nandaa Jesús cuahan indiví

⁶ Ta ndaja coo tá nataca na cán xihin Jesús já nacasáhá ndáca tuhún na mé á já cáchí na já xihin á:

—Jesús, xitoho nde, á viti quéa quiahva ndó ñamani nuú nde, na Israel cacomí nde cuénta saha mé nde já ná a cacomí ga gobierno ñuu Roma cuénta sahá nde —nacachi na xihin á.

⁷ Anda já nanducú ñehe Jesús tuhun nu ná já nacachi a já:

—Co ndítahan toho nu ndóhó candaa ini ndó ndá quivi caja Ndióxi, tátá yo ña jan. Jáchi in tuhún mé á cuití va quéa xini a ndá quivi yaha ña sáhdá mé á coo. ⁸ Joo ndítahan nu ndó candati ndó yóho anda quiahva ná quixi ínima yii Ndióxi cañuhu a ini ndó. Já ná nduu ndeé ini ndó ña ná cuu jánaħa ndó nuú ñayivi sahá i. Anda já ndítahan nu mé ndó caħan ndó sahá i ñuu Jerusalén yóho xihin estado Judea xihin estado Samaria. Anda já quee ndó cuħun ndó cuaha ñuu xicá ní cúú ñuyiví jánaħa ndó nuú ñayivi cán saħa mí i —nacachi Jesús xihin ná.

⁹ Tá nandihi nacahan Jesús ña yóho xihin ná ta nani sándehe cáxí na cán nu Jesús ndíta na já nandaa cuahan indiví. Já naxinu in vico nachijahvi ñahá a chí coo naxini ga na mé á. ¹⁰ Ta nani ndíta na cán sándehe na nuú nandaa Jesús cuahan indiví já nandicoto nihni na ta sa ndíta ivi ta ndíxi jahmá yaa jíin ná. ¹¹ Já nacachi da já xihin ná:

—Taa Galilea, ndávaha sándehe ndó indiví nuú nandaa Jesús cuahan. Jáchi tá quiahva naxini ndó nandindita cuahan indiví quiahva já cuni tucu

ndó a ndicó coo tucu a ñuyíví yóho –naçachi ndíví da cán xihín ná.

Naçaxi na Matías caja da chuun ña najándacoo Judas

¹² Tá nandihí nandaa Jesús cuahān indiví já naquee na apóstol yúcu naní yitó olivo cán já nandicó coo na ñuu Jerusalén. Ta mé yúcu cán cándo a tátuhun in kilómetro jatá ñuu Jerusalén.

¹³ Tá naxinu coo na ñuu Jerusalén cán já nandaa na vehe cánúu jícó jáchi mé vehe cán nasanduu tóo na. Tóco ndihí na nasanduu cán nasacuu Pedro xihín Jacobo xihín Juan xihín Andrés xihín Felipe xihín Tomás xihín Bartolomé xihín Mateo xihín Jacobo, da cúu jahyi Alfeo xihín Simón, da naxica cuénta cananista xihín Judas, da cúu ñani Jacobo.

¹⁴ Níi tiempo nasataca ndíhuxu in na yóho xihín ñani Jesús xihín María, náná Jesús xihín java ga najihí caça tahví na nu Ndióxi.

¹⁵ Ta ndaja coo in quivi nataca tátuhun in ciento oco na cúu cuénta Jesús. Já naçandichi Pedro mahñú na cán ta já naçachi da já xihín ná:

¹⁶ –Candehé ndo, ñani i, na cúu cuénta Jesús. Nasahin tá íin naçachi ínima yii Ndióxi coo. Jáchi naçaja Ndióxi ña ná cahan rey David ini tuhun mé á saha Judas, da nasandaca na natiin Jesús ñéhe na a cuahān na vecaa. ¹⁷ Mé Judas yóho nasacuu da da naxica xihín yo ta naçaja chúun da cuénta Jesús xihín yo. ¹⁸ Joo najicó túhún da Jesús ta naquehe da jjuhún sahá ña núu naçaja da. Ta xihín jjuhún cán naheen da in ñúhu. Ta tá nandihí já najándicava ndayi da mé dá ta nandata tixi da chí naçana cuyu ndihí xiti da. ¹⁹ Tá nañehé ñayivi ñuu Jerusalén

tuhun ña sa ñaxihí Judas cán já ñachinúu na quivi mé ñúhu ñaxeen da cán cananí a Acéldama. Mé tuhun cán cúni cachi a yójo nuú ñaxita ñii jáchi cán ñaxita ñii Judas tá ñaxihí da. ²⁰ Jáchi já cáchi in Salmo ndácaan ini libro yii Ndióxi tá ñacahan saha Judas já cáchi a já:

Ná candoo ndáha vehe da,

ta ni in ñayivi ná a cánduu ga ini a.

Ta sa mé cán ndácaan inga tucu Salmo ta cáchi a:

Inga tucu da ná ndicojo chuun ñasandojo da, cáchi tuhun Ndióxi.

²¹ Anda já ñacachi tucu Pedro já xihin ná:

—Taño mí yóho ndúu java ña ñaxica nuu xihin yo tá ñaxica í xihin Jesús, xitoho í nani ñasahin a ñuyivi yóho. ²² Java ña yóho ñasanduu na xihin yo tá najácandúta Juan Jesús xihín ticuú ta ñasanduu na xihin yo janda quiahva ñandaa Jesús cuahan indiví. Ña cán quéa ndítahan nu yó caxí in da taño ña yóho já ná caca da xihin yo caxi tuhun da nuú ñayivi ña ñanditacu tucu Jesús —ñacachi Pedro xihín ña cán.

²³ Sahá ña cán quéa ñacana ivi da taño ñayivi cán. Anda já ñasacu ini na caxi na in da taño ndíví da. In da ñacana ña cán ñasananí José ta naní tucu da Barsabás ta inga tucu quivi dá ñasacuu Justo. Ta da inga cán ñasananí Matías. ²⁴ Anda já ñaxica tahví ndihi ña cán nu Ndióxi já ñacachi na já:

—Tátá Ndióxi, sa xini ndó ndía cáhvi ini tóco ndihi ñayivi. Ña cán quéa caja ndó ñamaní jánaña ndó nuú nde ndá da cúu da sa ñacaxi ndó ²⁵ cacuu apóstol ña ná caja da mé chuun ña najándacoo Judas. Mé Judas ñacaja da cuachi cáhnu nu ndo

ñā cān quēa viti íin da nū ndítahan nū dá coo da —
naçachi na xih̄in Ndióxi.

²⁶ Anda já nasajíquí na ndá da cuu quee vaha. Naqee vaha Matías chí nandique táhan da xih̄in na uxu in apóstol cuéntá Jesús cān.

2

Tá nanuu ínima yii Ndióxi jatá na cúu cuéntá Jesús

¹ Tá naxinu coo quiví coo víco Pentecostés já nanditaca ndihi na cúu cuéntá Jesús ndúu tútú na ini in vehe. ² In cuití naxini johō na in a níhi naquixi a chí indiví. Tá quiahva níhi xícó tach̄i ndeé quiahva já níhi a naquixi a. Ta já naxini johō ndihi na ndúu coo vehe cān ña. ³ Anda já naxini na in ñaha ña cāa tá quiahva cāa ñuhú ita. Anda já nanditahnda ña nasandójó a jini in in na cān. ⁴ Ta nachutú ndaa ínima ndihi na cān xih̄in ínima yii Ndióxi. Chí naçasáhá nandicañan na tuhun, ña cóo nasatiahva na jáchi já naçaja ínima yii Ndióxi.

⁵ Mé tiempo já nasanduu java na Israel, na cāja cáhnu Ndióxi ñuu Jerusalén cān. Mé na Israel yóho naquixi na ndijáá ñuu jatá ñuyíví. ⁶ Tá naxini johō na cān ña níhi xójō cúu cān já naçasáhá ndítaca na. Joo tá naxinu na nū ndúu na cúu cuéntá Jesús cān já naçatóntó na jáchi naxini johō na cáhan na cúu cuéntá Jesús cān mé tuhun cáhan na vatí cō cúu ná na ñuu na. ⁷ Chí naçatóntó ndivaha na cān já naçasáhá ndítuhún xih̄in táhan na já cáchi na já:

—Tócó ndihi na cúu cuéntá Jesús yóho cúu ná na naquixi estado Galilea. ⁸ Ndá cuéntá quēa cáhan na tuhun cáhan in in mí. ⁹ Jáchi sa jín sa jín ñuu naquixi mí. Java í naquixi nación Partia

ta java í naquixi nación Media ta java í naquixi nación Elam ta java í naquixi nación Mesopotamia ta java í naquixi estado Judea ta java í naquixi estado Capadocia ta java í naquixi estado Ponto ta java í naquixi estado Asia ¹⁰ ta java í naquixi estado Frigia ta java í naquixi estado Panfilia ta java í naquixi nación Egipto ta java í naquixi ñuu cuéntá Africa, ña xícá chága a juú ga ñuu Cirene. Ta ndúu java ñayivi naquixi ñuu Roma yóho. Ta java na cán cúu ná na naquixi chichi Israel ta java na co cúu ná na naquixi chichi Israel joo cája cáhnu na Ndióxi, mé a cája cáhnu mí. ¹¹ Ta sa mé yóho ndúu java ñayivi naquixi nación Creta xihin nación Arabia. Ta xini johó ndihí cáhan na cúu cuéntá Jesús yóho tuhun cáhan in in mí. Ta cáhan na sahá ñaha xituhún cája Ndióxi xihin ná —cáchi ndihi na sándehe cán.

¹² Ta chí co xini na ndúu sándehe cán ndia cahán na sahá na cúu cuéntá Jesús cán. Jáchi nacatontó ndivaha na janda ndaca tuhún táhan mé ná ndúu na já cáchi na já:

—Ndía cuni cachi ña cája na yóho.

¹³ Joo java na ndúu cán nacasáhá sácú ndaa ñahá na já cáchi na já:

—Na xíhi va cúu na yóho.

Cáhan ndojó Pedro nuú ñayivi

¹⁴ Anda já nacandichi Pedro xihin ndihuxu in ga na apóstol cán já nacasáhá cáhan cóhó da xihin tóco ndihi na cán já cáchi da já:

—Cuni johó vaha ndó ña cáhan i xihin ndó, ñayivi Israel, na estado Judea xihin ndihi ndó na tóho ndúu ñuu Jerusalén viti. ¹⁵ Mé ndó cáhán ndo ña

naxini tóco ndihi ñayivi ndúu yóho. Joo co cúu ná na naxini jáchi jacá caa in naha va queá. ¹⁶ Ña cája na yóho queá nacachi da naní Joel sanahá tá nacahan da xihín ñayivi ña ndítahan coo. Mé da cán cúu da nacachi ña cáchi Ndióxi coo já nacachi da já:

¹⁷ Tá sa nacayati quivi ndihi saha ñuyivi yóho já cáchi Ndióxi já:

“Chindahá i ínimá yii mí i cañuhu a ini tóco ndihi ñayivi.

Ta tóco ndihi jahyi yii ndo xihín jahyi jihí ndo caxi tuhun na xihin ndó tuhun cahan i xihin ná.

Ta na tacú cuni ndímáhnú na ñaha ñaha i nu ná.

Ta na yatá quixi sani nu ná caja i.

¹⁸ Ta mé tiempo já chindahá i ínimá yii mí i ña ná cañuhu a ini na cája chúun cuéntá mí i, á cúu ná ta á cúu ná ñaha.

Ta caja i ña ná cahan na sahá i nuú ñayivi.

¹⁹ Ta cuahá ndivaha ña náhnú caja i indivi xihín ñuyivi ta cuni ñayivi ña.

Cuni na nii xihin ñuhú cáyi xihín ñihma ña ndindita tátuhun vico núhú.

²⁰ Ta canaá nuú candii ta ndicuáhá nii nuú yoo.

Ña yóho cacuu ña yaha tá sa nacayati quivi xinu yehe, mé á cúu xitoho na caja vii i sahá ñayivi ñuyivi.

Mé quivi cán cacuu a in quivi cáhnu ndivaha.

²¹ Joo cacu ndaa ínimá tóco ndihi na ná ndicahán quivi i”, nacachi Ndióxi ini libro nacahyí Joel sanahá —nacachi Pedro.

²² Anda já nacachi tucu Pedro já:

—Cuni johó vaha ndó tuhun cahan i xihin ndó, na Israel. Jáchi cahan i saha Jesús, mé a naquixi

ñuu Nazaret. Jáchì nàtahan ini Ndióxi xihìn tóco ndihi ñaha ñacaja mé Jesús. Ta naxini xihín nuu ndó ña náhnu xihín ña xitúhún ñacaja mé á nu ndo xihìn ndée ñasahan Ndióxi nu a. Ta sa cándaá vaha ini mé ndó ña yóho. ²³ Joo tá ñatiin ndó Jesús já najáxinu coo ndó ña ñasacu ini Ndióxi coo sanahá ndivaha. Ta mé ndó ñandiquiahva ndó Jesús ndáha ña quini. Ta ñacaja ndó ña ná cata caa na Jesús ndica crúxu. ²⁴ Joo najánditacu Ndióxi Jesús já ná a cóo a nu ndóho ini ña sa ñaxihì jáchì ni in ñaha a cúu caja ña ná coo Jesucristo nu ndúu ña sa ñaxihì. ²⁵ Sanahá ndivaha ñacahyí rey David sahá Jesús já ñacachi da já:

Xíni vaha ña ní tiempo ín ndó xitoho ñ, xihín ñ, ta ín ndó xoo cuáha ñ chindeé ndó yehe sahá ña cán quéa co yíhví toho ñ.

²⁶ Sahá ña cán quéa ñacajii ndivaha ini ñ, ta ñacahan vatá ndivaha ñ.

Jáchì vatí ná quivi ñ cacuu u ndii joo coo vaha ini ñ.

²⁷ Jáchì caja ndó ña ná nditacu tucu u já ná a cándo nahá ínimá ñ nu ndúu ínimá ndii.

Ta ni a quiáhva toho ndó ñamanì ñahyì yiquí cuñu ñ jáchì cúu u ñahyì mánì ndo.

²⁸ Najánaha ndó nuú ñ ndaja caja ñ ña cúni ndo.

Jáchutú ndaa ndó ínimá ñ xihín ña cájii ini ñ jáchì já ín va ndó xihín ñ, ñacahyí David sanahá ndivaha —cáchi Pedro xihín ña ndúu cán.

²⁹ Anda já ñacachi tucu Pedro já xihìn ná:

—Candehé ndo, ñani ñ ná ndicani ñ nu ndo ña cúni cachi ña yóho. Sa cándaá cáxi ín ña sa ñaxihì David, ña ñasacuu tásáhnu jíco yo. Ta najánduxu ña ña ta ín yii va nuú najánduxu ña ña. ³⁰ ñacachi David ña yóho jáchì ñasacuu da profeta. Jáchì mé

Ndióxi quéa nasahan tūhun a nu dá ta nacachi a xihín dá ña quixi Jesucristo chichi mé dá ta nacachi a ña cacomí mé Jesucristo cán cuéntá sahá ñayivi Israel. ³¹ Sa nacandaā ini David ña caja Ndióxi chí nuu sahá ña cán quéa nacachi da xihín ñayivi ña nditacu tucu Jesús tá nandihí quivi a. Ta nacaxi tūhun David nu ná ña a jándicoo toho Ndióxi ínima Jesús nu ndúu ínima ndii ta ni a quiahva toho mé á ñamaní tahi yiquí cuñu mé Jesús cán. ³² Ta viti cándaā iní ña naxinu tūhun nacahyí David jáchi naxini tóco ndihí ña najánditacu Ndióxi Jesús. ³³ Ta najándindita cáhnu ndivaha Ndióxi Jesús ta nasacu a ña xoo cuáha mé á. Ta nasahan Ndióxi ínima yi mé á nu Jesús jáchi ña yóho cúu tūhun nasahan Ndióxi sanahá. Ta tóco ndihí ña naxini ndó xihín nuu ndó ta naxini johó ndó yóho cúu á ña naquixi cuéntá Ndióxi. ³⁴ Ta sa xini yo ña co cáhan David saha mé dá jáchi a juú David cúu da nandaa indiví, vaha. Sa mé David cúu dá da nacachi tūhun yóho:

Nacachi Ndióxi xihín xitoho i:

“Naha xoo cuáha jín i cacóun,

³⁵ janda quiahva ná cacu u na cándají yohó tixi sahun”, nacachi Ndióxi —já nacahyí David sanahá.

³⁶ Anda já nacachi tucu Pedro já:

—Ña cán quéa cúní ña ná candaā ini tóco ndihí ndó ña cáhan i xihín ndó, na Israel. Mé Jesús, mé a nacata caa ndó ndica crúxu nandaja Ndióxi ña ná nduu a xitoho ñayivi. Ta nandaja Ndióxi ña ná nduu a ña nachindahá mé á cacomí cuéntá sahá ñayivi —nacachi Pedro xihín na ndúu cán.

37 Tá naxini johō nā cán ña ñacachi Pedro xih̄in ná ivi laá natahvi ini na já ñacasáhá ndáca tuh̄un nā Pedro xih̄in java ga nā apóstol cán já cáchí nā já xih̄in ná:

—Ndía ndítahan caja nde, ñani, nā cúú cuéntá Jesús.

38 Anda já nanducú ñehe Pedro tuh̄un nu ná já cáchí da já xih̄in ná:

—Xíní ñúhú ndicó coo ini ndó ta jándicoo ndó cuachi cája ndó ta candúta ndó cuéntá Jesucristo já quéa ná caja cáhnu ini Ndióxi sahá cuachi ndó ta já ñehe táhvi ndó quiahva Ndióxi ínima yii mé á nu ndó. 39 Jáchi ñasahan Ndióxi tuh̄un a caja ña jáchutú ndaa ínima ndó xih̄in ínima yii mé á ta quiahva já caja ri a xih̄in jahyi ndó ta jári xih̄in na tóho, nā ndúu xícá. Jáchi já caja mé á xih̄in ñayivi ñacaxi mé á —ñacachi Pedro xih̄in ná.

40 Ta cuahá ndivaha java ga tuh̄un ñacahan Pedro xih̄in ná ta já najácahan da nā já ñacachi da já xih̄in ná:

—Candeé ini ndó Jesús já ná jácaacu a ndohó já ná a cúhun ndó indayá nuú cuhun ñayivi cája cuachi —ñacachi Pedro xih̄in ná.

41 Cuahá ñayivi nandiquehe vaha na tuh̄un ñacahan Pedro ta ñacandeé ini na Jesús. Ta mé quivi já ñacandúta tátuhun un̄i mil ñayivi já nandihvi na íchi cuéntá Jesús. Ta nandique táhan nā cán xih̄in java ga nā cúú cuéntá Jesús. 42 Ta ndinuhu ini na jácuaha na ña jánaḥa nā apóstol nu ná. Ta cándúsa táhan tóco ndihi na ta ndítutú nā xícá tahvi nā nu Ndióxi. Ta ní tiempo sá taca na ndicahnda java táhan na pan cuxu na.

Ña ñacaja ñayivi tá ñacasáhá ña ndíco ña íchi cuéntá Jesús

⁴³ Mé tiempo já ñasahan Ndióxi ñamaní nuú ña apóstol cán ña ná cuu caja na cuahá ndivaha ñaha xituhún xihín cuahá ña náhnu ndivaha ta chí cátontó tóco ndihi ñayivi tá xíní ña ña yóho. ⁴⁴ Ta tóco ndihi ña cúu cuéntá Jesús cán in ñandu ndihi na ta ndícahnda java ñaha nu táhan na. ⁴⁵ Ta jícó ña ñaha cómí ña ta já ndícahnda na jiuhún ña nuú ña ndímaní ñaha nuu. ⁴⁶ Ta ndijáá ní quivi ndítútú ña cája cáhnu na Ndióxi veñuhu cáhnu ndácaan ñuu Jerusalén cán. Ta tá ndíque táhan na vehe já ndícahnda java táhan na pan cuxu na ta cávatá ndivaha xihín táhan na cája na já. Ta ni in na co ndíñehe jícó mé. ⁴⁷ Ñacaja cáhnu na Ndióxi ta tóco ndihi ñayivi ndúu ñuu Jerusalén ín vaha ini na xihín ña cán. Ta nini quivi ñacaja Ndióxi ña ñandicuahá ña cúu cuéntá Jesús, mé ña jácacu ndaa Ndióxi ínimá.

3

Ndivaha in tãa réncõ cája Pedro

¹ In quivi tátuhun caa uní sahini cuahan Pedro xihín Juan veñuhu cáhnu Jerusalén cán. Mé hora já táca ñayivi cuahan na veñuhu caça tahví ña nu Ndióxi. ² Ta mé yuyéhé ñuhu cán ín coo in ña ñaxihí tuchu saha. Ta janda tá ñacacu da cáa da já. Ta ndijáá ní quivi ñehe na ña cuahan ña yuyéhé ñuhu cáhnu naní yéhé ñúchí. Ta cán ín coo da sáti ña nuú ñayivi ndíhvi ini veñuhu cán. ³ Ta tá ñaxini ña réncõ cán cuahan quíhvi Pedro xihín Juan ini veñuhu cán já ñacata ñee ña ndáha dá nu ná sáti ña.

⁴ Anda já nandicoto nihni Pedro xihin Juan nuú da réncō cán já ñacachi Pedro já xihin dá:

—Candehé nuú nde.

⁵ Anda já ñasandehé cáxí da cán nu ná jáchi cáhán da quiahva na jiuhún nu dá. ⁶ Joo já ñacachi Pedro xihin dá já:

—Coó toho jiuhún i quiahva i nuun joo ña íin nuú i ña cán quiahva i nuun. Íin ndivaha ndée Jesucristo, mé á ñuu Nazaret sahá ña cán quéa sáhndá i chuun nuun ña ná candichún cacún — ñacachi Pedro xihin dá.

⁷ Anda já ñatiin Pedro ndahá cuáha da cán ta nandíñehe da da já ñacandichi da chí ivi laá nandihvi ndée saha dá já nanditacu tuchu saha dá. ⁸ Anda já ñacandita mé da ñasahiin réncō saha cán já ñacandichi da ta já ñacasáhá da xíca da. Cándita da cája cáhnu da Ndióxi nandihvi da xihin ná ini veñuhu cán. ⁹ Ta tóco ndihi ñayivi ndúu cán ñaxini na cándita da cája cáhnu da Ndióxi. ¹⁰ Ta a juú quiahva ñacatóntó ña ta ñayihví ña sahá ña ñaxini na cán. Jáchi nandicuni na da cán cúú da da ñasacuu réncō, da ñasahiin coo sáti yéhe ñuhu naní yéhe ñúchí cán.

Cáhan ndojó Pedro nuú ñayivi ndúu yéhe ñuhu cáhnu cán

¹¹ Mé da ñasacuu ña réncō cán ñatiin tuun da Pedro xihin Juan ta chí cō cúní da janí ñahá da. Ta tóco ndihi ñayivi ñacatóntó ña xínu na cuahan ña candehé ña da réncō cán nu ndíta da yéhe ñuhu, ña naní yéhe Salomón. ¹² Tá ñaxini Pedro ñacasáhá táca cuahá ñayivi nu íin da já ñacasáhá cáchí da já xihin ná:

—Cuni j_oh_o v_ah_a ndó, ñ_ayivi Israel. Cátóntó ndiv_ah_a ndó s_ande_he ndó nde_he jách_i cáh_án nd_o ñ_a n_andaja v_ah_a nde_h d_a yóh_o xih_in ndé_e mé nde_h. Á tá coó ta cáh_án nd_o ñ_a n_andaja v_ah_a nde_h d_a sah_á ñ_a ndícah_án ndiv_ah_a nde_h Ndióxi. ¹³ Joo coó ín toho a tá quiahva cáh_án nd_o. Jách_i mé Ndióxi, ñ_a n_ac_aja cáh_{nu} Abraham xih_in Isaac xih_in Jacob, tásáh_{nu} jíco y_o n_andaja v_ah_a mé á d_a yóh_o. Ta mé Ndióxi cán n_ac_aja ñ_a ná nduu cáh_{nu} ndiv_ah_a Jesucristo, jah_yi mé á. Joo mé ndó nandiquiahva ndó a ndahá n_a jutixia. Ta tá cúni Pilato janí d_a Jesús já n_asaji nuu ndó n_u dá caja da ñ_a. ¹⁴ Mé Jesús cúu á ñ_a yii ndiv_ah_a ta ndinuhu ñ_a ndaa cuití va cája. Joo mé ndó n_acandají ndó a ta naxica ndó n_u Pilato ñ_a ná janí d_a in d_a sáhní ndii. ¹⁵ Tá n_andihi já n_asahní ndó Jesús, mé a cúu cája ñ_a ná catacu ñ_ayivi and_a ama cáa quivi. Ta vatí naxihí a n_asacuu a ndii joo najánditacu tucu Ndióxi mé á. Ta cánda_a cáxí ini nde_h ñ_a cáh_án nde_h ñ_a ndaa xih_in nd_o. ¹⁶ Ta sa mé Jesús cúu á ñ_a cándeé ini nde_h. Ta sah_á ñ_a cándeé ini nde_h mé á sah_á ñ_a cán quéa n_andiv_ah_a d_a cándichi n_u ndó yóh_o. Ta xini ndó d_a n_andiv_ah_a yóh_o ta cánda_a cáxí ini ndó n_andihvi ndé_e sah_a dá sah_á ñ_a cándeé cáh_{nu} ini nde_h Jesús.

¹⁷ Candehé nd_o, ñ_ani i. Sa xini v_ah_a nde_h viti ñ_a tá n_asahní ndó Jesús coó n_acandaa ini ndó ndía n_ac_aja ndó. Ta ni n_a cúu jefe nd_o coó n_acandaa ini na ndía n_ac_aja na. ¹⁸ Joo xihín ñ_a yóh_o najáxinu coo Ndióxi tuhun n_asah_án n_u yó sanahá tá n_acachi n_a profeta cuéntá Ndióxi ñ_a ndítahan ndoho ini Jesucristo, mé a n_achindahá Ndióxi cacomí cuéntá sah_á ñ_ayivi. ¹⁹ Sah_á ñ_a cán quéa xini ñúhú jándacoo

ndó cuachi cája ndó ta ndicó coo ini ndó nu Ndióxi já ná jándoo mé á cuachi ñacaja ndó. Anda já caja Ndióxi ña ná ndivaha ini ndó. ²⁰ Janda jihna ñacaxi Ndióxi Jesucristo ná chindahá a ña ná quixi a ñuyívi yóho já ná cacomí a cuéntá sahá ñayivi. ²¹ Ta viti íin Jesucristo indiví ndáti a tandaa quívi caja Ndióxi ña nduu víi tóco ndihi ñaha. Já ndítahan coo jáchi sanahá ndivaha ñacahan Ndióxi xihín na profeta mé á sahá ña yóho ta mé ná ñacaxi tuhun na ña nuú ñayivi. ²² Ta ña yóho cúu tuhun ñacahan Moisés nu tásahnu jícó yo já ñacachi da já xihín ná: “Taño mé ndó jan cana in profeta caja Ndióxi, xitoho í tá quiahva ñacaja mé á xihín mí i. Ta coto a quéhe núu ndó ni in túhún tuhun cahan mé profeta jan xihín ndo. ²³ Jáchi tóco ndihi ñayivi, na co cúni candúsa tuhun cahan mé profeta jan ndihi saha ná ta a ñehe táhvi ga na coo na xihín na ñuu Ndióxi”, ñacachi Moisés sanahá —ñacachi Pedro xihín ná.

²⁴ Ta ñacahan chága Pedro xihín ná já cáchi da já xihín ná:

—Tóco ndihi na profeta ñacahan na sahá ña yáha tiempo viti. Ta profeta Samuel cúu da ñacasahá cahan sahá ña yóho. Ta tóco ndihi java ga na profeta ñaquixi tá nu ndíhí ñacahan na cán saha tiempo viti. ²⁵ Náchindahá Ndióxi na profeta sanahá ña ná caxi tuhun na xihín yo ña sahan Ndióxi tuhun a nu yó, na Israel. Ñacaja vaha mé á saha yo tá ñacachi a já xihín Abraham, da ñasacuu tásahnu jícó yo: “Xihín ña caja na quixi chichún chí nuú já caja cuahá ndivaha i ñamaní xihín tóco ndihi ñayivi ndúu ndijáá ñuyívi”, ñacachi a. ²⁶ Tá najánditacu Ndióxi Jesucristo, jahyi mé á jihna

ñúhú ga nu mé ndó, na Israel nachindahá a ña já ná caja yii á ndohó já ná jándicoo ndó cuachi cája ndó —ñacachi Pedro.

4

Ndíquehe Pedro xihin Juan saha mé dá nuú na sacuahá veñuhu

¹ Ta janda cáhan chá va Pedro xihin Juan nuú ñayivi cán já naxinu java da cúu jutú xihín da sáhdá chuun nu policia veñuhu cán. Ta tañu na yóho naxinu ri na saduceo. ² Xójo ndivaha ini na jáchi jánaḥa Pedro xihin Juan nuú ñayivi ña sa nanditacu tucu Jesucristo. Ta xihín ña yóho náha ña vaxi quivi nditacu tucu ndii. ³ Saha ña cán quéa natiin na cán Pedro xihin Juan ta nataán na da vecaa. Ta cán nacandoo da janda inga quivi itaan jáchi sa nacuaá va. ⁴ Joo cuahá ndivaha ñayivi nacandúsa tuhun nacahan Pedro ta xihín ña yóho nandicuaḥa chága na cúu cuéntá Jesús. Jáchi na nacandúsa cán nasacuu na tátuhun uhun mil dataa.

⁵ Ta ndaja coo na cúu sacuaḥa nuú ñayivi Israel cán xihín na sacuaḥa veñuhu xihín na jánaḥa ley Moisés nandique táhan ndihi na inga quivi itaan. ⁶ Ta tañu na cán ndácaan ri da naní Anás, da cúu sacuaḥa nuú jutú. Ta tañu na cán nasandacaan ri Caifás xihin Juan xihin Alejandro xihin tóco ndihi na cúu na vehe na sacuaḥa nuú jutú cán. ⁷ Anda já natavá na Pedro xihin Juan vecaa. Ta ñéhe na da cuahan na nuú nataca na cán ta nasani ndichi na da mahñú na nataca cán ta já nandaca tuhún na da já cáchi na já xihin dá:

—Ndaja n̄acaja ndó n̄andaja v̄aha ndó da n̄asaquihvi saha cán. Yo já n̄asahan ndée nu ndó ña cúu cája ndó ña yóho —cáchi na ndáca tuhún ñahá na.

⁸ Ta n̄acaja Ndióxi ña ná ndicutú ndaa ínima Pedro xihin ínima yii Ndióxi ña cán quée n̄acasáhá da ndúcú ñehe da tuhun nu ná já cáchi da já xihin ná:

—Cuni johó v̄aha ndó, na sacuaḥa ñuu xihín na sacuaḥa veñuhu Israel. ⁹ N̄andaca tuhún ndó ndeḥe ndaja n̄acaja nde n̄andaja v̄aha nde da n̄asaquihvi saha cán. ¹⁰ Cuni johó ndó ná ndicani nde sahá ña yóho nu ndo ta já ná cuu candaa ri ini tóco ndihi ñayivi Israel ña mé dataa, da cándichi nu ndo yóho n̄andivaha da xihín ndée Jesucristo, ña ñuu Nazaret. Mé a cán n̄acata caa mé ndó ndica crúxu cán ta tá n̄andihí já najánditacu ñahá Ndióxi.

¹¹ Ta mé Jesús yóho cúu á ña cáhan tuhun Ndióxi saha, ña cúu á tátuhun yuu ndúhu, ña n̄acandají na cávaha vehe. Ta mé ndó cúu ndó tátuhun na cávaha vehe cán, na n̄acandají Jesús. Joo viti n̄axinu a cúu á tátuhun yuu ña íin chága saha n̄acaja Ndióxi. ¹² Jáchi ni in tuhún toho ñayivi ndúu ñuyiví a cúu jácacu mí ña ná a cūhun yó indayá. In tuhún Jesucristo quée n̄achindahá Ndióxi nu yo já ná cacu ndaa ínima yo —n̄acachi Pedro xihin ná.

¹³ Tá n̄axini na sacuaḥa cán ña co yíhví Pedro ni Juan ndíta da cáhan da xihin ná já n̄acatóntó na jáchi sa xini na ña coó tiaḥva da tutu. Ta n̄axini na ña cúu dá da ndahví, da n̄axica xihin Jesús. ¹⁴ Ta ni co ñeḥe íni na sacuaḥa cán cachi na xihin Pedro ña cúu dá da tuhún jáchi sa nuu táhyí na já va cándichi da n̄andivaha saha cán. ¹⁵ Anda já n̄atavá tóo na

da cán já ñacasáhá ndítúhún xihín táhan na. ¹⁶ Já cáchí ña já:

—Ndía caja í xihín ndíví da yóho viti jáchi sa ñacandaa ini ndihi ñayivi ñuu Jerusalén ña xitúhún ñacaja da. Ta ni mí, a cúu cachí ña cúu á ña tuhún. ¹⁷ Joo cóho jáyihví yó ña ná a cáhan chága ña saha Jesús nuú ni in túhún toho ga ñayivi. Jáchi co cúni yo ña ná ndicuíta nuu tuhun saha Jesús —cáchí ña ndítúhún xihín táhan na.

¹⁸ Anda já ñacana tucu na Pedro xihín Juan ta ñasahnda na chuun nu ná ña ná a jáñaha ga ña saha Jesús ta ni ná a cáhan ga ña quívi Jesús.

¹⁹ Anda já ñanducú ñehe Pedro xihín Juan tuhun nu ná já cáchí da já xihín ná:

—Cahvi vaha ini ndó, ña sacuaaha. Á cáhán ndó ña vaha chága caja nde ña sáhdá ndóhó á ña sáhdá Ndióxi nuú nde caja nde. ²⁰ Jáchi a cuú jándacoo nde cáhan nde sahá ña ñaxini nde xihín sahá ña ñaxini johó nde —cáchí da xihín ña sacuaaha cán.

²¹ Anda já ñacahan cuehe ña sacuaaha cán xihín dá ña ná a jáñaha chága da saha Jesús. Joo tóco ndihi ñayivi cája cáhnu na Ndióxi sahá ña ñacaja da cán. Ña cán quea najaní ñahá ña jáchi coó ñañehe íni ña ndá quiahva caja xíxi na xihín dá. ²² Ta mé da ñandivaha cán ñaxinu chága da nuú ivi jíco cuia tá ñandivaha saha dá.

Xíca tahví ña cúu cuénta Jesús nu Ndióxi

²³ Ta tá sa najani Pedro xihín Juan já ñaquee da cuahan da nuú ñasanduu java ga ña cúu cuénta Jesús cán. Ta já ñandicani na nuú ña cán ña ñacahan ña sacuaaha nuú jutú xihín ña sacuaaha

veñuhu cán xih̄in ná. ²⁴ Tá nax̄ini j̄oho java ga na cúu cuéntá Jesús cán ña ndícani da nu ná já naçasáhá tóco ndihi na xíca tahví na nu Ndióxi já cáhí na já:

—Tátá Ndióxi. Mé ndó cúu Ndióxi ña naçavaaha indivi xih̄in ñuyíví xih̄in tañuhú xih̄in tóco ndihi ñaha. ²⁵ Sanahá ndivaha tá najándicutú ndaa ndó ínimã David, tásáhn̄u jícó nde xih̄in ínimã yii mé ndó já naçachi ndó já xih̄in dá ta já naçahyí da:

Ndá cuéntá quéa ndívaã nahá ñayivi ndúu ñuyíví ta ndinuhu ña núu cáhvi ini na caja na.

²⁶ Tóco ndihi da cómí cuéntá sahá ñayivi ndúu ñuyíví xih̄in da sáhn̄dá chuun nuú ñuu nandique táhan na cani táhan na xih̄in Ndióxi.

Ta cáni táhan na xih̄in mé a naçaxi Ndióxi chindahá a cacomí cuéntá sahá ñayivi, naçachi ndó sanahá.

²⁷ Ta mé a ndaa quéa yóho jách̄i ini ñuu yóho najátaca táhan Herodes xih̄in Poncio Pilato xih̄in na tóho xih̄in na Israel viti. Najátaca táhan na caja núu na xih̄in Jesús, da cúu jahyi yii mé ndó, mé a naçaxi ndó. ²⁸ Joo xih̄in ña naçaja na yóho nax̄inu coo nuú ña nasacu ini mé ndó coo janda jihna ndivaha jách̄i cuu caja ndó tóco ndihi ña cúni ndó caja ndó. ²⁹ Ta viti candehé ndo, tátá Ndióxi ndá quiahva cúni na caja xíxi na xih̄in nde. Ta quiahva ndó ñaman̄i ná candee ini nde ndohó já ná a yíhv̄i nde cahan nde tuhun vaha saha mé ndó xih̄in ndá nuú ñayivi naçuu jách̄i mé nde cúu nde na cája chúun nu ndo. ³⁰ Ta xíca tahví nde nu ndo ña ná cuu ndaja vaha nde na quíhv̄i xih̄in ndee mé ndó. Ta ná caja ndó ñaman̄i ña ná caja cuahá

nde ñaha xitúhún xihín cuahá ña náhnu ná cuni ñayivi ña xihin ndée Jesucristo, jahyi yii mé ndó cája nde tóco ndihi ña yóho —cáchi na xica tahví na nu Ndióxi.

³¹ Tá nandihí naxica tahví na nu Ndióxi já naquiji nuu vehe nu ndúu tútú na cán. Ta já nandicutú ndaa ínimá ndihí na cán xihin ínimá yii Ndióxi ta nandindeé ini na cahan na tuhun Ndióxi nuú ñayivi.

Sáhná java táhan na cúu cuéntá Jesús ñaha cómi na

³² Cuahá ndivaha nasacuu na cúu cuéntá Jesús cán joo chí in jini ndíhi na. Ta ni in túhún na co cájihnda ñaha nu táhan jáchi cáchi na: “Ñaha tóco ndihí queá.” ³³ Xihin ndée sahan Ndióxi nu ná cáxi tuhun na apóstol ña nanditacu tucu Jesús. Ta nacaja Ndióxi cuahá ndivaha ñamaní xihin tóco ndihí na cúu cuéntá Jesús cán. ³⁴ Ta ni in na coó nandimaní ñaha nuu jáchi na ín ñaha nuu tátuhun vehe á ñúhu najicó na ña ta ñéhe na mé jiuhún cán ³⁵ ta sahan na ña nuú na apóstol já ná ndicahnda mé ná ña nuú in in na xini ñúhú a. ³⁶ Já nacaja in dataa naní José, da naquixi chichi Leví. Ta cúu dá da nacacu in isla naní Chipre. Mé da yóho nachinúu na apóstol quivi dá naní da Bernabé ta mé tuhun yóho cuni cachi a da sahan tuhun ndeé ini ñayivi. ³⁷ Ta mé da naní Bernabé yóho najicó da ñúhu dá ta já nasahan da mé jiuhún da cán nuú na apóstol.

5

Cája Ananías xihin Safira cuachi nu Ndióxi

¹ Joo mé tañu já in da naní Ananías xihin Safira, ñájíhí da najicó na in ñundáhyi ná. ² Joo coó nandiquiahva ndihi da jiuhún ña nacayahvi ñúhu cán nuú na apóstol. Ta nacachi da xihin ná ña cán cúu ndihi va ña naquehe da saha ñúhu. Joo najándique táhan tuhun da xihin ñájíhí da ña ná candoo chá jiuhún cán nu ná. ³ Ta tá naxinu coo Ananías ndiquiahva da jiuhún cán nu Pedro já nacachi Pedro já xihin dá:

—Ndá cuéntá quéa nasahun ñamani nu tiñáhá sacuaḥa nandihvi rí ínimun, Ananías. Ta nasacu inún jándaḥvún ínima yii Ndióxi ta já naquehún táhan jiuhún nachahvi na sahá ñúhu jan. ⁴ Ñaha mé vún nasacuu ñúhu jan, nduu. Ta tá najicún ña, ñaha mé vún cúu ri jiuhún jan va. Nacahvi inún cajún ña núu yóho ta xihín ña nacajún yóho a juú nu mé nde cuití va nacahún ña tuhún joo nacahún ña tuhún nu Ndióxi —nacachi Pedro xihin dá.

⁵ Tá naxini johu Ananías ña nacachi Pedro xihin dá ivi laá nandicava da naxihí da sahá cuachi nacaja da nu Ndióxi. Ta tóco ndihi na nacandaḥ ini sahá ña nayaha yóho nayihví ndivaha na. ⁶ Anda já naxinu java da tacú já nachitíví na ndii cán já ñehe na a cuahan na jánduxu na.

⁷ Ta tá sa nayaha tátuhun uní hora já naquihvi ñájíhí Ananías nu ndacaan Pedro cán. Joo ni co xini ñá ña nandoho yí ña. ⁸ Anda já nandaca tuhún Pedro ña já cáhí da já xihin ña:

—Á mé a ndaa najicó ndó ñúhu ndo ta nachahvi na tá quiahva nacachi yíun xihín i sahá —nacachi Pedro.

Anda já nanducú ñehe ñá cán tuhun nu dá já cáhí ña já xihin dá:

—Ajan, quiahva já najicó nde ña.

⁹ Anda já nacachi Pedro já xihín ña:

—Mé ndó najándique táhan ndó tuhun ndó coto ndojó ndo ínima yii Ndióxi. Candehé. Jata vehe jan vaxi na nasahan najánduxu yíun. Ta viti cañehe ri na yohó va cuhun na jánduxu na —nacachi Pedro xihín ña.

¹⁰ Tá nacachi Pedro já ivi laá nandicava ña saha dá naxihí ña sahá cuachi nacaja ñá. Tá naxinu coo da tacú, da nasahan najánduxu yíi ñá cán já naxini na cánduhu ri mé va ña naxihí ña. Anda já natavá na ña ta najánduxu na ña in xoo mé nuú najánduxu na yíi ña cán. ¹¹ Ta tóco ndihi na cúu cuéntá Jesús cán xihín tóco ndihi java ga na tá nacandaa ini na sahá ña nayaha yóho nayihví ndivaha na.

Sáhan Ndióxi ndée nuú na apóstol já ná caja na cuahá ñaha xitúhún

¹² Ta nacaja Ndióxi ña ná cuu caja na apóstol cán cuahá ñaha xitúhún xihín cuahá ña náhnu tañu ñayivi cán. Ta tóco ndihi na cúu cuéntá Jesús nasataca na yéhe ñuhu cáhnu naní yéhe Salomón.

¹³ Ta java ga ñayivi, na co ndíco íchi cuéntá Jesús cán yihví na catáhan na xihín na cúu cuéntá Jesús yóho. Joo ndijáá java ga ñayivi cán in toni ñúhú na xihín na apóstol cán. ¹⁴ Ta cuahá ndivaha ñayivi nacasáhá cándúsa na Ndióxi, taa viti najihí viti.

¹⁵ Ta sahá ña náhnu cája na apóstol yóho natavá na na quihvi jata vehe ta nachinduu na na nuú xito á nu yivi mé nuú yaha Pedro cán. Já quea tá ná yaha da vatí candahvi cuití da ná cani ndaa jatá java na cán ña ná ndivaha na. ¹⁶ Ta cuahá ñayivi ndúu java ñuu válí ndúu yati cán ñéhe na na quihvi xihín na

ñúhu ínimá quini ini vaxi na ñuu Jerusalén ta cán nandivaha ndihi na.

Jándoho na ini na apóstol

¹⁷ Anda já da cúu sacuahá nuú jutú cán xihín na cúu cuéntá Saduceo cán naçasáhá cáhiví ndivaha ini na xihín na apóstol. ¹⁸ Sahá ña cán quéa natiin na na apóstol cán ta nataán na na vecaa. ¹⁹ Joo ñuu naxinu coo in tátó Ndióxi ta nasuná a yéhé caa cán ta natavá a na ta já nacachi a já xihín ná:

²⁰ —Cuáhán ndó veñuhu cáhnu ta ndicani ndó nuú ñayivi saha tóco ndihi ña cája Ndióxi, mé a ndíjama ñayivi ná ndihvi na íchi cuéntá mé á — nacachi a xihín ná.

²¹ Ña cán quéa tá nativi inga quivi itaan já nandihvi na apóstol veñuhu cáhnu cán ta naçasáhá na jánahá na nuú ñayivi cán.

Joo da cúu sacuahá nuú jutú cán xihín tóco ndihi na sacuahá cómi cuéntá sahá nación Israel cán nasahnda na chuun nu policia cán ña ná cuhun na tavá na na apóstol ñúhu vecaa cán ná quixi na nuú na sacuahá cán. ²² Joo tá naxinu coo na cúu policia vecaa cán coo nandiñehe toho ñahá na. Ta já nandicó coo na caxi tuhun na xihín na sacuahá cán. ²³ Já cáhí na já:

—Tá naxinu nde yéhé caa já naxini nde ndájí tuun a ta ndíta soldado ndáá vaha da ña. Joo tá nandihvi nde ini vecaa sándehe nde coo na apóstol cán ná ndiñehé nde.

²⁴ Tá naxini johó na sacuahá nuú jutú xihín da cúu sacuahá nu policia veñuhu xihín java ga na sacuahá veñuhu cán ña yóho já naçasáhá ndáca

tuhún táhan na sahá ña ndítahan quixi nu ná chí nuu sahá ña cája na apóstol yóho.

²⁵ Mé hora já naxinu coo in dataa ta cáchí da já xihin ná:

—Na apóstol nataán ndó vecaa cuni cán, ndíta na jatá veñuhu jánaħa na ñayivi —nacachi da cán xihin ná.

²⁶ Anda já nasahan da cúu sacuaħa nuú policia xihin java ga policia já natiin tucu da na apóstol nasañehe da na nuú na sacuaħa veñuhu cán. Joo coo nacaja xíxi na xihin ná jáchi nayihví na ndicuıta ñayivi cuaħa cán cani na na xihín yuu.

²⁷ Ta tá naxinu coo na xihín na apóstol nu ndúu na sacuaħa veñuhu cán já nasacu ndichi na na nu ná. Anda já nacachi da cúu sacuaħa nuú jutı cán já xihin ná:

²⁸ —Mé nde nasahnda nde chuun nu ndó ña ná a jánaħa chága ndó sahá Jesús jan. Joo mé ndó sa najándicutú ndó Jerusalén xihín ña jánaħa ndó jan. Ta cúni ndó jácojo ndó cuachi jatá nde ña nasahní nde Jesús jan —cáchí da.

²⁹ Anda já nanducú ñehe Pedro xihín java ga na apóstol cán tuhun nu ná já cáchí na já xihin ná:

—Ndítahan nuú nde caja jihna ñúhú ga nde ña sáhnda Ndióxi nuú nde, a juú ga ña sáhnda ñayivi nuú nde caja nde. Sahá ña cán quéa coo nacaja nde ña nacachi ndó xihín nde. ³⁰ Ta mé Ndióxi nacaja cáhnu tásáhnu jíco yo sanahá nacaja ña ná nditacu Jesús, mé a nasahní ndo tá nacata caa ndó a ndica crúxu. ³¹ Joo nandiñehe jíco Ndióxi Jesús ta nasacu a ña xoo cuáha mé á ta nacaja ña ná nduu Jesús ña cacomı cuéntá sahá ñayivi Israel ta jácacu a na já ná a cúhun na indayá. Ta tá ná ndicó coo ini na

já caja cáhnu ini Ndióxi sahá cuachi cája na. ³² Ta naxini xihín nuú nde tóco ndihi ña yóho ta cáhan nde sahá ta quiahva já cáhan ínimá yii Ndióxi sahá ña yóho. Ta chindahá Ndióxi ínimá yii mé á cañuhu a ini na cája ña cúni mé á —cáchi na apóstol xihín na cán.

³³ Tá naxini johó na sacuaḥa cán ña naçachi na apóstol já ivi laá naxojo ndivaha ini na xihín ná chí cúni na cañni ñahá na. ³⁴ Joo ndaja coo ín tañu na cán in da sacuaḥa cúu fariseo naní Gamaliel, da ín toni ñúhú ñayivi xihín. Ta cúu dá da jánaḥa ley Moisés nu ná. Naçandichi da tañu na sacuaḥa cán já naçahnda da chuun ña ná tavá xóo na na apóstol cán jaṭa véhe. ³⁵ Anda já naçachi da já xihín na sacuaḥa cán:

—Candehé ndo, nataa Israel. Cuénta coo ndó a juú caja ndaja naçuu ndó xihín na apóstol yóho. ³⁶ Xíni ñúhú ndicuhun ini ndó ña sanahá nandindita in da naní Teudas ta naçachi da xihín ñayivi ña cúu dá in da ín cuahá saḥa. Ta nasandico tátuhun comi ciento ta jaṭa dá joo naçahní na da ta tá naxihí da já nandicuita nuu tóco ndihi ñayivi naxica jaṭa da cán ta xihín ña yóho nanaá sahá ndihi ña naçaja da. ³⁷ Tá nandihí já nandindita inga tucu da naní Judas, da naquixi estado Galilea mé tiempo cándahvi ñayivi ñuu. Ta cuahá ndivaha ñayivi nandico jaṭa da cán joo naçahní ri na da cán va ta tóco ndihi na nasandico jaṭa dá nandicuita nuu ndihi na. ³⁸ Sahá ña cán quea jácahan i ndohó viti ná a quíhvi ndáha ndó na apóstol yóho. A quíhvi nuu ndó xihín ña cája na jáchi tá jini mé va na naquixi ña cája na já quea ndihi va sahá ña cája na yóho. ³⁹ Joo tá Ndióxi naçindahá na caja na ña

cája na yóho já quéa a cúu toho caja ndó jándihi ndó sahá ña cája na. Cuéntá coo ndó jáchi tiahva náa xihín Ndióxi cani táhan ndó —cáchi Gamaliel xihín na sacuaḥa cán.

⁴⁰ Tóco ndihi na sacuaḥa naxini johó nuú naçahan da cán, natanan ini na xihín ña naçahan da. Anda já naçana na na apóstol ta já naçani na na xihín churu. Ta naçachi na xihín ná ña ná a çahan ga na saḥa Jesús nuú ñayivi. Anda já najani ñahá na. ⁴¹ Ta cájii ndivaḥa ini na apóstol cán naçqueta na nu ñúhu na sacuaḥa cán jáchi naçahan Ndióxi ñamani nu ná ndoho ini na saḥa Jesús. ⁴² Ta ndijáá níi quivi ini veñuhu cáhnu xihín ini vehe ñayivi çahan na ta jánaḥa na saḥa Jesucristo.

6

Cáxi na usa da cacuu diácono, da chindeé na apóstol

¹ Ta mé tiempo cán ndícuahá ndivaḥa na cúu cuéntá Jesús. Ta ndaja coo na çahan tuhun griego cán naçasáhá çahan cuachí na nuú na Israel. Mé na çahan tuhun griego yóho cáchi na ña co ndítaḥnda in nuú ñaha cája na Israel tá ndítaḥnda ña cuxu na cuáan in in quivi. ² Anda já nandaja tútú ndíhuxu ivi na apóstol cán tóco ndihi na cúu cuéntá Jesús já naçasáhá cáchi na já xihín ná:

—Ña ndítahan nu mé nde, na apóstol quéa caxi tuhun nde tuhun Ndióxi nuú ñayivi. Saḥá ña cán quéa co yáchi nde ndícaḥnda nde ña cuxu ñayivi. ³ Saḥá ña cán quéa xíní ñúhú ndinducú mé ndó usa ta tañu ndó já ná caja na chuun yóho. Joo xíní ñúhú cacuu na ñayivi cándéé ini ndó. Ta xíní ñúhú cacuu na na tácu ini. Ta xíní ñúhú cacuu na

na nandicutú ndaa ínima xihín ínima yii Ndióxi já ná cuu quiahva ndó chuun yóho nu ná. ⁴ Ta ña caja mé nde quéa ndinuhu ini nde caça tahví nde nu Ndióxi ta jánaħa nde tuhun mé á nuú ñayivi — naçachi na apóstol xihín na cúu cuéntá Jesús cán.

⁵ Ta tóco ndihi na natahan ini na xihín ña naçachi na apóstol. Saha ña cán quéa naçaxi na da naní Esteban. Mé Esteban yóho cúu dá da cándéé cáhnu ini Ndióxi. Ta cúu dá da nandicutú ndaa ínima xihín ínima yii Ndióxi. Ta naçaxi na da naní Felipe xihín Prócoro xihín Nicanor xihín Timón xihín Parmenas xihín Nicolás, da naquixi ñuu Antioquía. Mé Nicolás yóho naçasáhá cándúsa da tá quiahva cándúsa na Israel, nduu joo nandiquehe da íchi cuéntá Jesús. ⁶ Tá nandihí já ñéhe na cúu cuéntá Jesús cán ndíhusa na naxinu coo na nu ndúu na apóstol cán. Anda já naçica tahví na nu Ndióxi saħa ná. Ta nachinúu na apóstol cán ndáħa ná jiní in in ndíhusa na cán ña ná caja na chuun Ndióxi.

⁷ Ta naçasáhá ndícuíta nuu tuhun cáħan saħa Jesús chí nandicuaha na cúu cuéntá Jesús ñuu Jerusalén. Ta cuaha na cúu jutú cán naçasáhá cándéé ini na Jesús.

Tín na Esteban

⁸ Ta ndaja coo naçaja cuaha Ndióxi ñamaní xihín in da naní Esteban cán ta nandicutú ndaa ínima dá xihín ínima yii Ndióxi chí naçasáhá çaħa da cuaha ñaha náhnu xihín ña xitúhún nuú ñayivi. ⁹ Joo in quivi naçasáhá java na cáni táħan yúħu ná xihín mé Esteban. Na cán cúu ná cuéntá veñuhu naní Esclavos Libertados xihín java na ñuu Cirene xihín na ñuu Alejandría xihín na ñuu Cilicia xihín java

ga na naquixi ñuu válí ndúu estado Asia naçasáhá cáni táhan yúhu ná xihín dá. ¹⁰ Joo a cuú quee vaha na xihín dá jáchí naşahan ínima yíi Ndióxi tuhun ndíchí nuú mé Esteban cán ña ná nducú ñehe da nu ná. ¹¹ Anda já nachahvi na cán java na já ná cahan na tuhun tuhún saha Esteban. Ta naçachi na cán ña naxini joho na ña naçanahá Esteban xihín Moisés ta naçanahá da xihín Ndióxi. ¹² Ta xihín ña yóho najándivaa ná ñayivi xihín na sacuaḥa veñuhu xihín na jánaḥa ley Moisés. Ta já naṭiin na da já ñehe na da cuahan da nuú ndihi na sacuaḥa ñuu cán. ¹³ Ta nanducú na da cándúsa cavaḥa tuhun tuhún sahá Esteban ta já naçasáhá cáchí da cávaḥa ña tuhún já:

—Cánaḥá da yóho xihín veñuhu cáhn nu Ndióxi yóho ta cánaḥá da xihín ley Moisés. ¹⁴ Ta naxini joho nde cáchí da ña jataṇi Jesús veñuhu cáhn nu yóho, mé da naquixi ñuu Nazaret ta ndijama da costumbre najándacoo Moisés nu yo —cáchí da cahan ña tuhún saha Esteban.

¹⁵ Anda já nandicoto nihni na sacuaḥa xihín tóco ndihi na ndúu coo cán nu Esteban já naxini na nandiyéhe nuu dá tátuhun in nuu tát Ndióxi ndúu indivi.

7

Ndíquehe Esteban saḥa mé dá nuú na sacuaḥa

¹ Anda já nandaçá tuhún da cúu sacuaḥa nuú juṭu cán Esteban já naçachi da já xihín dá:

—Á ña ndaḥa cúu ndihi ña cahan na yóho sahun.

² Anda já nanducú ñehe Esteban tuhun nu ná já naçachi da já:

—A juú toho ña ndaa quéa cáhan na jan sahá i. Joo cuni johó ndó ña ná cahan i xihín ndo, na sacuaḥa xihín ñani i. Saḥahá ndivaha tá naṣahiin táśahnu jíco yo, da naṣananí Abraham ñundáhyi Mesopotamia tá cámaní quee da cuhun da coo da ñuu Harán já naḥaḥa Ndióxi mé á nu dá. Ta mé Ndióxi, xitoho í cúú á in Ndióxi cáhnu ndivaha. ³ Ta já naçachi a já xihín Abraham: “Jándacoo táhún ta jándacoo ñuún ta cuáhán inga ñuu nuú naḥa i nuún coún”, naçachi Ndióxi xihín dá. ⁴ Anda já najándacoo Abraham ñundáhyi Caldea nuú naṣahiin da ta já naçee da cuahan da coo da ñuu Harán. Tá nandihi já na xihí tátá da ta janda já na sandaca Ndióxi Abraham naçixi da nu ndúu yó viti. ⁵ Joo coó naṣahan Ndióxi ñundáhyi nu dá tá naṣahiin da yóho. Ni in loho ñúhu coó naṣahan mé á nu dá mé tiempo cán. Joo naçachi a xihín dá ña quiahva ña nu dá chága chí nuu. Ta naçachi a xihín dá ña nduu a ñaha jahyi da tá ná quivi da vatí cámaní cacu jahyi Abraham mé tiempo já. ⁶ Ta naçachi Ndióxi xihín dá ña tóco ndihi jahyi da xihín na quixi chichi jahyi da cacuu na tátuhun na tóho jáchi canduu na inga ñuu, ña co cúú ñuu na. Ta cán caja chúun na joo a quéhe yahvi na sahá chuun caja na ta jándoho ndivaha na cán ini na tixi comi ciento cuja. ⁷ Naçachi tucu Ndióxi xihín dá já: “Joo jándoho i ini ñayivi, na caja xixi xihín ñayivi quixi chichún. Ta tá nandihi caja i ña ná queta na quixi chichún ta quixi na chóho já ná caja cáhnu na yehe.” ⁸ Ña yóho quéa naçachi Ndióxi xihín Abraham tá naṣahan tuhun a nu dá. Ta naçachi a xihín dá ña ná chicaan da marca yiquí cuñu da já ná a ndíndójo da sahá tuhun naṣahan Ndióxi nu

dá. Ta tá ñacacu jahyi Abraham, ña naní Isaac já ñachicaan Abraham marca yiquí cuñu da tá ñaxinu ña quivi ñacacu da. Ta quiahva já ñacaja ri Isaac xihin Jacob, jahyi da tá ñacacu da. Ta sa mé quiahva já ñacaja ri Jacob xihin uxu ivi jahyi da tá ñacacu da. Ta jahyi Jacob yóho cúu tátá uxu ivi táhnda ñayivi Israel.

⁹ Ta mé jahyi Jacob yóho ñasacuu tásáhnú jícó yo joo ñachihvi ini na xihin in ñani na, ña naní José. Sahá ña cán quéa najicó ña ña cuahan ña nación Egipto. Joo ñasahin Ndióxi xihin dá. ¹⁰ Ta ñachindee a ña nu tóco ndihi ña ñandoho ini da ta ñasahan cuaha Ndióxi xini túni dá. Ta ñacaja mé á ña ná tahan ini Faraón, mé rey nación Egipto cán xihin ña cája José. Sahá ña cán quéa ñasacu rey cán José ña ná nduu da gobernador saha tóco ndihi nación Egipto cán. Ta ñacaja rey cán ña ná cacomí ña cuénta saha vehe mé rey cán viti.

¹¹ Ta in tañu ñaxinu tama ndeé ta ñacasahá ndóho ndivaha ini tóco ndihi ñayivi ndúu nación Egipto. Ta quiahva já ñandoho ri ini ña ndúu ñundáhyi Canaán ta chí co ñéhe ná ña cuxu tásáhnú jícó yo. ¹² Joo tá ñacandaa ini Jacob ña ín trigo nación Egipto já ñachindahá ña jahyi da, ña ñasacuu tásáhnú jícó yo cán já ñasahan ña ñaxeen na ña cuxu na. Ta tá ñasahan na nu cuítí yóho coo ñandicuni na ñani na José cán. ¹³ Joo tá ñasahan ña ña chí ivi chí Egipto cán já najánaha José mé dá nuú ñani da. Ta xihin ña yóho ñacandaa ini ña cúu rey nación Egipto cán ña cúu José ña Israel. ¹⁴ Andá já ñasahnda José chuun ña ná cañehe na Jacob, tátá ña xihin tóco ndihi ña vehe da quixi na canduu na ñundáhyi Egipto cán. Ta tóco ndihi ña ñasahan

cán nasacuu na uní jico sahun ñayivi. ¹⁵ Já naquee Jacob cuahan da coo da Egipto xihin tóco ndihi na vehe da. Ta sa mé cán naxihi da ta cán naxihi jahyi da, na nasacuu tásáhnú jícó yó. ¹⁶ Já nachicaan na ndii cán ini cáva mé Egipto cán joo tá nayaha tiempo já natavá na lásá na já ñéhe na ña nasahan na nachicaan na ini cáva mé cama santo ña naxeen Abraham núú jahyi in da naní Hamor ñuu Siquem cán.

¹⁷ Ta tá nacayati quivi xinú coo ña nasahan Ndióxi tuhun a nu Abraham coo já nacasáhá cácu cuahá jahyi na naquixi chichi Israel. Já nandicuaaha ná nani ndúu na Egipto cán. ¹⁸ Anda já nacasáhá inga tucu rey cómi da cuéntá sahá ñayivi nación Egipto cán ta mé rey saá cán co xini toho da José. ¹⁹ Ta mé rey yóho najándahvi da tásáhnú jícó yó cán ta nacasáhá cája xíxi da xihin ná. Ta nacaja ndúsa dá xihin ná ña ná jándacoo na jahyi na, na jacá nacacu já ná quivi na. ²⁰ Ta mé tiempo já nacacu Moisés ta nasacuu da in ticuáhá loho ña natahan ini Ndióxi xihin. Ta najácuahnu tátá náná Moisés yóho mé dá tixi uní yoo mé vehe mé na cán. ²¹ Joo tá naxinu quivi ndítahan nu ná jándacoo na da já nandiquehe ña cúú jahyi rey Egipto cán da já najácuahnu ña da tátuhun jahyi ña. ²² Ta najácuaha Moisés tóco ndihi ña xini na ndíchí nación Egipto cán. Ta nandindíchí ndivaha jini dá. Ta nacaja cuaha dá ña náhnú.

²³ Ta tá naxinu Moisés ivi jico cuia já nasacu ini da coto nihni da ñani táhan da, na naquixi chichi Israel. ²⁴ Tá nacasaá da nu ndúu na cán já naxini da cája xíxi in da Egipto xihin in da Israel. Ta cúni Moisés ndiquehe da sahá da Israel ña cán

qu_éa n_asahní Moisés mé d_a Egipto cán. ²⁵ Jáchi n_acahán Moisés ñ_a cuu candaa ini n_a Israel cán ñ_a ch_índahá Ndióxi d_a já ná janí d_a n_a ndáha n_a Egipto cán. Joo coó n_acandaa ini na ñ_a yóho. ²⁶ Ta inga quívi itaan tá n_axinu coo Moisés nu ndúu n_a Israel cán já n_axini da cáni táhan ivi d_a n_aquixi ch_íchi Israel. And_a já n_acasáhá Moisés sáhdá java táhan da d_a cán já cáchi d_a já xihín ná: “Ndaja ñani mé va ndó, a váha toho cája ndó cáni táhan ndaja táhan mé va ndó.” ²⁷ And_a já n_achindahá nihni d_a cája xíxi xihín ñani táhan cán Moisés já n_acachi da já xihín dá: “Ni in toho na coó n_asahan chuun nu yóhó cacuún d_a cacomí cuéntá sahá nde já ná cuu caja viún sahá nde. ²⁸ Á tá quiahva n_acajún n_asahnún d_a Egipto cán cuni quiahva já cúnun cajún xihín i”, n_acachi d_a cán xihín Moisés. ²⁹ Tá n_axini johó Moisés ñ_a yóho já nayihví ndivaha da chí n_axinu da cuahan d_a chí ñundáhyi cuéntá Madián já n_asahin da cán tátuhun in d_a tóho. Ta cán natandaha dá ta n_acacu ivi jahyi ta da.

³⁰ ”Ta tá sa nayaha ivi jico cuia n_asahin Moisés Madián cán já nanaha in tátó Ndióxi mé á nu dá tañu in tohíñú cándaha ñúhu mé yucú íchí yati yucú naní Sinaí cán. ³¹ Ta chí n_acatóntó Moisés xihín ñ_a n_axini da n_acaja Ndióxi cán. Ta tá n_acayati da sándehé da ñ_a já n_axini johó da cáhan Ndióxi xihín dá já cáchi a já: ³² “Yehe cúu u Ndióxi n_acaja cáhnu tásáhnu jícún Abraham xihín Isaac xihín Jacob.” And_a já n_acasáhá quíji Moisés xihín ñ_a yíhví d_a ta coó n_asahan ndeé ini da ndicoto nihni da nu cáhan Ndióxi cán. ³³ And_a já n_acachi tucu Ndióxi já xihín dá: “Tavá ndusa sahun jáchi yii ndivaha cúu

nu sánun jan. ³⁴ Sa naxini i ndá quiahva ndáhvi ndóho ñayivi cuéntá mí i, na ndúu Egipto ta naxini joho i nu tána na sahá ña jándoho na Egipto jan ini na. Sahá ña cán quéa vaxi i chindeé e na ta yóhó cacuún da chindahá i cuhun Egipto já ná tavún na nu ndóho ini na cán”, nacachi Ndióxi xihin Moisés.

³⁵ Nacandají na Israel cán Moisés ta nacachi na xihin dá: “Coó na nasacu toho yohó ña ná cacomún cuéntá sahá nde já ná cuu caja viún sahá nde.” Joo Ndióxi quéa nachindahá Moisés ña ná cacuu da da cacomí cuéntá sahá na Israel cán ta já ná jácacu da na. Jáchi já nacachi tátō Ndióxi xihin dá tá nanaha mé á tañu tohínú cándaha ñúhu cán.

³⁶ Ta mé Moisés nasahan tucu da mé Egipto cán ta natavá da tóco ndihi na Israel, na nasanduu Egipto cán ta nacaja da cuahá ñaha náhnu xihín ña xituhún mé Egipto cán. Ta quiahva já nacaja da xihin tañuhú naní Tañuhú Cuahá tá nasuná da do nuú nayaha na Israel cán. Ta quiahva já nacaja da cuahá ña náhnu yucú íchí nuú naxica na ivi jico cuia cán. ³⁷ Ta mé Moisés nacaxi tuhun da xihín ñayivi já nacachi da já xihin ná: “Tá quiahva nacaja Ndióxi nachindahá a yehe nu ndo quiahva já chindahá mé á inga da cacuu profeta nu ndo. Ta mé da cán cacuu da in da quixi chichi mé ndó”, nacachi Moisés xihin ná. ³⁸ Ta mé Moisés nasahin da tañu ñayivi Israel, na nasacuu tásáhnu jícó yo tá naxica na yucú íchí cán. Ta xihin mé da cán nacahan tátō Ndióxi jiní yucu Sinaí cán. Ta cán nasahan Ndióxi ley nu dá já ná naha da ña nu yo ña ná caca vaha í íchi cuéntá Ndióxi.

³⁹ Joo coó naxeen toho tásáhnu jícó yo cuni joho na nuú nacahan Moisés xihin ná. Ña cán quéa

naçandají na da ta naçasáhá ndúcú na ndicó coo na Egipto. ⁴⁰ Ta nani naçahiin Moisés jini yúcu Sinaí cán já naçachi na xihín Aarón, ñani Moisés já: “Cúni nde ña ná cavañún tiniñu yúú Ndióxi caja cáhnu nde ta ná canuú a cuñun a nuú nde. Jáchi co cándaā ini nde ndía nandoho Moisés, da natavá ndehe nuú naçanduū nde Egipto cán.” ⁴¹ Anda já naçavaña na in yoco ñehe nañná chélo ta já naçahní na quiti najoco na nuú mé yoco cán. Ta naçajii ndivaña ini na xihín yoco ña naçavaña mé na cán. ⁴² Anda já najándacoo Ndióxi na já ná caja cáhnu na ndá ña cúni na tátuhun quimi xihín yoo xihín candii. Já naçachi Ndióxi ini libro naçahyí na profeta sanahá:

Ndóhó, na Israel, a juú nu mí i naçahní toho ndó quiti najoco ndó tañu ivi jico cuiā nani nañica nuu ndó yucú íchí jan.

⁴³ Ña naçaja ndó quēa naçaja cáhnu ndó yoco ña naçavaña mé va ndó.

Ta naçachi ndó ña cúu mé yoco cán inga ndióxi naní Moloc.

Ta nañañehe ndó ña xihín cáti á tá cuañan ndo.

Ta naçavaña ndó inga tiniñu quimi naçachi ndó cúu á inga tucu ndióxi naní Renfán.

Ta nañañehe ndó tiniñu cán cuañan ndó caja cáhnu ndó coo naçaja cáhnu ndó yehe.

Ña cán quēa tavá i ndohó ñundáhyi na Israel ta chindahá i ndohó in ñuu tóho xíca chága a juú ga Babilonia, naçachi Ndióxi xihín na cán —naçachi Esteban xihín na sacuañá ñuu cán.

⁴⁴ Já naçachi tucu Esteban já xihín ná:

—Vatí nacaja cáhnu tásáhnú jícó yó java ga yoco joo nasañehe tá nasañehe na in veñuhu níí quítí cuéntá Ndióxi tá naxica nuu na yucú íchí nuú co ndúu ñayivi cán. Jáchí janda jihna nasahnda Ndióxi chuun nu Moisés tá quiahva coo mé veñuhu níí quítí cán ta nasahnda chuun nu dá ña ná cavaha da ña xihín níí quítí. Ta ini mé veñuhu cán ñataán da yuu jáhnda nu ndáa ley nasahan Ndióxi nu dá sanahá. ⁴⁵ Tá sa nayaha cuahá cuia já naxihí Moisés já nandiquehe da naní Josué chuun ña cañehe da cuéntá saha tásáhnú jícó yó. Ta mé tásáhnú jícó yó nacani táhan na xihín na nasanduu ñundáhyi yóho. Ta nacaja Ndióxi ña ná quee vaha na Israel xihín na cán. Ñatavá Ndióxi na cán já ná canduu na Israel ñundáhyi yóho ta mé tiempo já na Israel ñehe na veñuhu níí quítí cuahan na. Ta já nasahjin a xihín ná janda quiví nasacomí David cuéntá sahá na Israel. ⁴⁶ Nacaja Ndióxi cuahá ñamaní xihín David sahá ña cán quea nasacu ini David cavaha da in nuú coo Ndióxi, mé a nacaja cáhnu Jacob sanahá. ⁴⁷ Joo da nacavaha mé vehe Ndióxi cán nasacuu Salomón, jahyi David. ⁴⁸ Ta sa cándaá iní ña a juú quiahva cáhnu cúú Ndióxi ta co ndácaan toho a ini veñuhu cávaha dataa. Íin in profeta ta nacahyí da ña nacachi Ndióxi já:

⁴⁹ Tátuhun in rey, da íin coo silleta vaha, ta chínúu da saha dá jata in táyi loho, quiahva já íin coo i indiví ta chínúu i sahá i jata ñuyiví.

Yehe cómí i cuéntá sahá indiví xihín ñuyiví sahá ña cán quea coó toho vehe cuu cavaha ndó coo yehe,

ta cō xíní ñúhú ĩ in vehe nū ndíquehe ndée.

⁵⁰ Jáchĭ yehē cúú Ndióxi ña ñacavaħa tóco ndiħi ñaha, já ñacachi Ndióxi saħahá –ñacachi Esteban xihĭn ná.

⁵¹ Anda já ñacachi tucu Esteban já xihĭn ná:

–Joo mé ndó cúú ndó ñayivi saá ini ta cúú ndó tátuhun na cō xínĭ Ndióxi. Jáchĭ cō cúnĭ ndó cuni joho ndó ña cáhĭ Ndióxi xihĭn ndo ta cō cúnĭ ndó candaa ini ndó tuhun Ndióxi. Ta ni cō cúnĭ ndó quiahva ndó ñamanĭ ndihvi ínima yĭi Ndióxi ini ínima ndo. Xíxi ndivaha ñasahĭin ini tásahnu jícó ndo ta quiahva já cája ri mé ndó viti. ⁵² Mé tásahnu jícó ndo ñacaja xíxi ndivaha na xihĭn ndiħi na profeta ta ñasahní ñahá na mé na yóho ñaquixi na cáxi tuhun saħa mé a quixi chí nuu, mé a cō cája cuachi. Ta tá ñaxinu mé a cán já ñajícó túhún ndó a ta ñasahní ndó a. ⁵³ Ta mé ndó cúú ndó na ñasahān tátō Ndióxi ley nuu joo cō cúnĭ ndó caha ndó ña cáhĭ a –ñacachi Esteban xihĭn ná.

Tá ñasahní na Esteban

⁵⁴ Tá ñaxini joho na saħaħa cán tóco ndiħi ña ñacahān Esteban já ñaxojo ndivaha ini na xihĭn dá chí cáhñá nuhu na. ⁵⁵ Joo ñandicutú ndaa ínima Esteban xihĭn ínima yĭi Ndióxi ta já ñandicoto nihni da indiví já ñaxini da ndá quiahva cáhnu cúú Ndióxi ta ñaxini da cándichi Jesús xoo cuáħa Ndióxi.

⁵⁶ Anda já ñacachi Esteban já xihĭn ná:

–Candehé ndó. Núná indiví xínĭ ĩ ta tívi cándichi Jesús xoo cuáħa Ndióxi –ñacachi Esteban xihĭn ná.

⁵⁷ Joo ñachicaji tuun na cán joho na já ná a cúnĭ joho na ña cáħān Esteban. Ta ñacasáhá cáyuhú cóhó na cáti na cuahān na cani na da. ⁵⁸ Naħavá

na mé Esteban yuhú ñuu ta cán ñacasáhá cúun na yuu dá. Ta mé na ñajáchojo cuachi jata Esteban cán ñatavá na cotó ña ta ñachinduu tóo na ña nuú in ña tacú nani Saulo cándichi cán. ⁵⁹ Ta nani cúun na cán yuu Esteban já ñacasáhá mé Esteban xica ñahví ña nu Ndióxi já cáchi ña já:

—Jesús, mé ndó cúu xitoho i. Ndiqeehe ndó ínimá i viti.

⁶⁰ Andá já ñacaxítí Esteban já ñacasáhá cáyuhú cóhó ña já ñacachi ña já:

—Jesús, xitoho i, a quéhe ndó cuéntá sahá cuachi cája ña yóho.

Tá ñandihí ñacachi Esteban tuhun yóho já ñaxihí ña.

8

Cásáhá Saulo cája xixi ña xihín ña cúu cuéntá Jesús

¹ Ta mé hora ñasahní ña Esteban cándichi Saulo sándehe ña ta ñatahan ini ña xihín ña ñasahní Esteban cán.

Ta mé quivi cán ñacasáhá ña cája xixi chága ña xihín ña cúu cuéntá Jesús ndúu ñuu Jerusalén cán. Chí tóco ndihí ña cúu cuéntá Jesús ñandicuíta nuu na ndijáa chí estado Judea xihín estado Samaria. Joo mé ña apóstol cuití va cóo ñaxita nuu toho na. Ñacandoo na ñuu Jerusalén. ² Ta java ñataa ñandiquehe na yiquí cuñu Esteban cuahan ña jánduxu ña ña tá quiahva íin costumbre ña ta a juú quiahva ñasacu na saha dá. ³ Ta mé Saulo ñacaja xixi chága ña xihín ña cúu cuéntá Jesús ta ñaquihvi ña vehe tá vehe na ta ñúhu ña ña ta tává ña ña jata

véhe. Coó caja toho á cúú ná taa á cúú ná ñáha ta já ñéhe da na cuahan na vecaa.

Cáhan na cúú cuénta Jesús tuhun vaha saha mé á nuú na estado Samaria

⁴ Ta na cúú cuénta Jesús tá nandicujta nuu na jatá ñuu Jerusalén cán nacaxi tuhun na tuhun vaha sahá Jesús ní cúú nu xíca na cuahan na. ⁵ Ta ndaja coo in da cúú cuénta Jesús naní Felipe naquee da cuahan da chí in ñuu cuénta Samaria ta cán nacasáha da cáhan da saha Jesucristo nuú ñayivi. ⁶ Nacasáha ndítútú cuahá ñayivi nu dá ta xihín ndinuhu ini na táa johó na nu cáhan da xihin ná jáchi naxini xihín nuu ná cuahá ñaha náhnu cája Felipe. ⁷ Nandaja vaha da cuahá ñayivi, na nasañuhu ínima quini ini chí cáyuhú cóhó mé ínima quini cán tá quéta ini na quíhvi cán. Ta nandaja vaha ri da cuahá na naxihí tuchu ta nandaja vaha ri da na xíca réncó. ⁸ Saha ña cán quéa nacajii ndivaha ini ñayivi ñuu cán xihín ña nacaja da.

⁹ Ta mé ñuu cán nasahiin in da tají naní Simón. Mé Simón yóho nasacuu da in taa, da najándahvi ñayivi Samaria cán jáchi nasacachi da ña cúú dá in da ín ndivaha saha. ¹⁰ Ta tóco ndihi mé ñayivi ñuu cán, á cúú ná na ndahví á na náhnu, nasaxini johó na xihín ndinuhu ini na nuú nasacahan da, nduu. Ta nacachi na saha dá ña cája da ña náhnu tá quiahva cája Ndióxi. ¹¹ Ta nasacandúsa na nuú nasacahan da xihin ná jáchi tixi cuaha tiempo najándahvi da na xihín ña tají. ¹² Ta ndaja coo nacasáha na cándúsa na ñuu cán tuhun vaha cáhan Felipe saha Jesucristo, ña cacomí Ndióxi cuénta saha ná tá ná candeé ini na Jesucristo. Ta já

naçasáhá na cándúta ná, taa xihin ñáha viti. ¹³ Ta janda mé Simón cán naçandúsa da ta naçandúta dá já naçasáhá xíca nuu da xihin Felipe. Ta chí cátóntó da xíní da ña náhnu xihín ña xitúhún cája Felipe cán.

¹⁴ Ta tá nañehé na apóstol ndúu ñuu Jerusalén cán tuhun ña nandiquehe na Samaria cán tuhun vaha cáhan saha Jesús já naçindahá na Pedro xihin Juan estado Samaria cán. ¹⁵ Ta tá naçinu çoo Pedro xihin Juan estado Samaria cán já naçica tahví na nu Ndióxi sahá na cúu cuénta Jesús cán ña ná chutú ndaa ínimá ná xihin ínimá yii Ndióxi. ¹⁶ Jáchi sa naçandúta ná cuénta Jesucristo sahá ña cándéé ini na mé á joo a ñáha chutú ndaa ínimá ná xihin ínimá yii Ndióxi. ¹⁷ Anda já chójó Pedro xihin Juan ndáha dá jiní in in na cán nani xíca tahví da nu Ndióxi já naçhutú ndaa ínimá ná xihin ínimá yii Ndióxi.

¹⁸ Tá naçini Simón ña naçhutú ínimá na cúu cuénta Jesús cán xihin ínimá yii Ndióxi tá chinúu na apóstol ndáha ná jiní ná já cúní da cueen da ndée Ndióxi cán. ¹⁹ Já naçachi Simón já xihin ná:

—Quiahva ndó ndée cómí ndó jan nuú i já ná cacomí ri yehe va ña já quéa ndá na ná chinúu i ndahá i jiní ná cuu ndicutú ndaa ínimá ná xihin ínimá yii Ndióxi.

²⁰ Anda já nanducú ñehe Pedro tuhun nu dá já cáchí da já xihin dá:

—Ná jándihí Ndióxi sahun xihín sahá jjuhún cómún jáchi cáhún ña cuu cueún ña jása maní uun Ndióxi nuú ñayivi. ²¹ Çoo sahá tohún cajún ña cája nde yóho jáchi ço íin vaha toho ínimun nu Ndióxi.

²² Xíní ñúhú jándacoún ña núu cáhvi inún jan ta

ndítahan caça tahvún nu Ndióxi já ná candehé mé á á caja cáhnu ini a sahun jáchi núu ndivaha cáhvi inún. ²³ Jáchi náha cáxi ña cáhivi ndivaha inún. Cúu á tátuhun mé ña quini nacató a yohó chí cájún ña núu.

²⁴ Anda já nanducú ñehe Simón tuhun nu Pedro já cáchi da já:

—Caça tahvi ndó nu Ndióxi sahá i já ná a quíxi ña núu cáchi ndó jan nuú i —nacachi da xihin ná.

²⁵ Tá nandihí nandicani Pedro xihin Juan sahá ña nacaja Ndióxi xihin ná. Ta tá nandihí nacahan na tuhun Ndióxi nuú na cán já naquee na nasahan na cáhan na tuhun Ndióxi, ña cuu jácacu ñayivi ndijáá ñuu válí ñuhu chí estado Samaria cán. Anda jáví nandicó coo tucu na chí ñuu Jerusalén.

Cáhan Felipe saha Jesús nuú in da naquixi nación Etiopía

²⁶ Tá sa nayaha ña yoho já naxinu in tátō Ndióxi nu íin Felipe estado Samaria cán ta já cáchi a já xihin dá:

—Cuáhán chí sur nu quée íchi ña quéta ñuu Jerusalén cuahan chí ñuu Gaza —nacachi tátō Ndióxi xihin dá.

Ta mé íchi cán yáha nuú co ndúu ñayivi jáchi íchí ndivaha. ²⁷ Anda já naquee Felipe cuahan da. Ta íchi nu xíca da cuahan da cán nanditahan da in dataa, da naquixi nación Etiopía. Mé da Etiopía yoho cúu dá in ta cáhnu nación dá jáchi cúu dá da cómí cuéntá sahá jiuhún ña cúu ñaha ña naní Candace, ña cómí cuéntá sahá ñayivi nación Etiopía. Mé da yoho sa nasahan da ñuu Jerusalén caja cáhnu da Ndióxi. ²⁸ Ta tá cuahan tucu da íchi

ndicó coo da Etiopía cán ta nani íin coo da jata carreta já cáhvi da libro naçahí profeta Isaías.
 29 Anda já naçahan ínima yíi Ndióxi xihín Felipe já naçachi a já xihín dá:

—Cativi jíin carreta cuahan jan.

30 Anda já naçayati Felipe jíin carreta cán ta já naxini johho da cáhvi da Etiopía cán libro Isaías. Anda já nandaça tuhún Felipe da já cáchí da já xihín dá:

—Á cándaq inún ña cáhvún jan.

31 Anda já nanducú ñehe da Etiopía cán tuhun nu Felipe já naçachi da já:

—Ndaja caja i candaa ini i ña cáhvi i tá coo na ndicani nuú i ndía cúni cachi a —naçachi da Etiopía cán xihín Felipe.

Anda já naxica da ñamaní nu Felipe ña ná ndaa da jata carreta da já ná cacoo da xihín dá ta ná ndicani da nu dá ña cúni cachi a. Chí nandaa Felipe carreta cán.

32 Ta cáhvi da Etiopía cán tuhun Ndióxi nu cáchí a:

Tá quiahva ñehe na in ndicachi cuahan rí quivi rí quiahva já nañañehe na da cuahan da quivi da.

Ta tá quiahva cája ndicachi tá co ndáhyi ri nani ndíjatá na ri quiahva já naçaja mé dá jáchí coo nasuná da yúhu dá çahan da.

33 Naçaja xíxi ndivaha na xihín dá ta coo naçaja ndaa na xihín dá.

Jáchí janda na naquixi chichi nuú naquixi mé dá coo nandiquehe na saha dá.

Ña ñacaja na quéa ñasahní ña ña dá já ná a cóo ga ña ñuyíví yóho, cáchí tuhun Ndióxi ñu cáhvi ña Etiopía cán.

³⁴ Anda já ñandaca tuhún ña Etiopía cán Felipe já cáchí ña já xihín dá:

—Ta viti caja ndó ñamaní ndicani ndó nuú ñ ndía cúni cachi a yóho. Á saha mé va profeta yóho cáhan ña á sahá inga va ña cáhan ña.

³⁵ Anda já ñacasahá Felipe ndicani ña nuú ña cán ña ñacahyí Isaías já ñandicani ña tuhun vaña saha Jesús ñu dá. ³⁶ Tá tá yáha ña cuahan ña ñu ñúhu ticuúí já ñacachi ña Etiopía cán já xihín Felipe:

—Yóho ñúhu ticuúí. Á cuu caja ndúta ndó yehe — ñacachi ña xihín Felipe.

³⁷ Anda já ñacachi Felipe xihín dá:

—Tá cándeé ini ndó Jesús xihín ndinuhu ini ndó ta cuu va candúta ndo.

Anda já ñanducú ñehe ña cán tuhun ñu Felipe já cáchí ña já:

—Cándúsa ñ ña cúu Jesucristo in tuhún jini já jahyi Ndióxi — ñacachi ña Etiopía cán.

³⁸ Chí ñvi laá ñasahnda ña Etiopía cán chuun ña ná caní ndichi ña carreta cándójó ña cuahan ña cán. Anda já ñanuu ndíví ña cuahan ña ñu ñúhu ticuúí ta já ñajácandúta Felipe ña Etiopía cán. ³⁹ Tá ñandihí ñaquee ña ini ticuúí cán já ñehe ínima yii Ndióxi Felipe cuahan ña inga xoo chí cóo ñaxini táhan chága ña xihín ña Etiopía cán. Joo cáji ini ña Etiopía cán cuahan ña íchi. ⁴⁰ Tá ñandicoto nihni Felipe sa ñin ña in ñuu naní Azoto. Tá tá ñuu tá ñuu cuahan ña cáhan ña tuhun vaña saha Jesús nuú ñayivi anda quiahva ñaxinu cóo ña ñuu Cesarea.

9

*Ndíquehe Saulo íchì cuéntá Jesús
(Hch. 22:6-16; 26:12-18)*

¹ Joo ndaja coo da naní Saulo cája xíxi tá cája xíxi da xihín na cúu cuéntá Jesús. Ta sácú ini da ndaja caja da cahní da na. Ta sahá ña cúnì da jándihi da saha ná sahá ña cán quéa nasahan da cáhan da xihín da cúu sacuahá nuú jutu ² ña ná quiahva na in carta nu cáhan ña ñéhe dá ñamanì quihvi da veñuhu ñuhu ñuu Damasco já ná ndinducú da na ndíco íchì cuéntá Jesús já ná cató da na cañehe da na quixi na cuhun na vecaa ñuu Jerusalén. Co cája toho a á cúu ná taa á ñáha. Chí naquee Saulo ñuu Jerusalén xihin mé carta. ³ Joo nani xíca da cuahan da íchì tá sa yati xinu coo da ñuu Damasco já in náá cuití nandiyihvi ndaa ñuhu jata dá. Mé ñuhu yóho naquixi a chí indiví. ⁴ Chí ivi laá nandicava Saulo nu ñuhu. Anda já naxini johó da cáhan in a xihin dá já cáchì a já xihin dá:

—Saulo, Saulo. Ndá cuéntá quéa cája xísún xihín i —cáchì a xihin dá.

⁵ Anda já naçasahá ndaca tuhún Saulo já cáchì da já:

—Yo cúu ndó, na cáhan. Ndaja naní ndo —cáchì da.

Anda já nanducú ñehe a cán tuhun nu dá já cáchì a já xihin dá:

—Yehe cúu u Jesús, mé a cája xísún xihin. Ta xihín ña cájún yóho cúu á tátuhun cája xísún xihin mé vún jáchì cájún tátuhun cája in tindiquí tá sání ndaa rí nu yócó poya ta jándicuehe rí mé va rí.

⁶ Andá já ñacasáhá quíji Saulo xihín ña yíhví da já ñacachi da já:

—Cahan ndó xihín i, xitoho i ndía quéa cúní ndó ná caji i —cáchi da.

Andá já ñanducú ñehe Jesús tuhun nu dá já cáchi a já xihín dá:

—Cuándacoo ta cuáhán quíhvi ñuu Damasco. Ta jan cahan na xuhun ndía ndítahan cajún —cáchi Jesús.

⁷ Ta tóco ndihi da cásahan xihín Saulo cán ñayíhví ndivaha da jáchi ñaxini johó da ña cahan cán vatí coó ñayivi ná xini da. ⁸ Tá ñandíhi já ñandacoo Saulo nu ñúhu. Joo tá ñasuná da nduchú núu da chí co tívi ga nuu dá. Sahá ña cán quéa jandá tiiin ndaa na da cuahan da chí Damasco. ⁹ Cán ñasahiin cuáa da tixi uní quívi ta chí coó ñaxixi da ta ni ticuí coó ñaxihi da.

¹⁰ Mé ñuu Damasco cán ñasahiin in da cúu cuénta Jesús naní Ananías. Ta ndaja coo ñaxini ndímáhnú da Jesús ta ñacahan xihín dá já ñacachi a já:

—Ananías.

Andá já ñanducú ñehe da tuhun nu á já cáchi da já:

—Yóho ín i. Ndía cúní ndo, xitoho i.

¹¹ Andá já ñacachi Jesús xihín dá:

—Candichi ta cuáhán cáyé naní a Ndacú Ndaa. Ta vehe da naní Judas cán ndaca tuhún sahá in da naní Saulo, da ñacacu ñuu Tarso. Viti ñúhú xíca tahví da nu Ndióxi ndácaan da. ¹² Jáchi ñaxini ndímáhnú da ña quíhvi mún, Ananías vehe nu ndácaan da. Ta ñaxini da ña chínúún ndáhun jiní

dá ta já cuu candehé tucu da —ñacachi Jesús xihín Ananías.

¹³ Tá ñaxini johó Ananías ña yóho já ñacachi da já:

—Candehé ndo, xitoho i. Yíhví i cuhun i jáchi sa cuahá ndivaha ñayivi ndícani nuú i sahá mé Saulo jan. Ta ndícani na nuú i ndá quiahva xíxi cája da xihín na cúu cuéntá mé á, na ndúu ñuu Jerusalén.

¹⁴ Ta viti vaxi da jan ñuu yóho jáchi sa ñaxica da ñamani nuú na sacuahá nuú jutu ña ná cuu játaca da tóco ndihi na cája cáhnu mé ndó já ná cañehe da na cuhun na vecaa —ñacachi Ananías.

¹⁵ Anda já ñacachi Jesús já xihín Ananías:

—Cuáhán quí jáchi sa ñacaxi i da ña ná cahan da sahá i nuú ñayivi java ga nación ta quiahva já cahan da sahá i nuú na cómi cuéntá sahá na cán. Ta ñacaxi i da ña ná cahan da sahá i nuú na ñaquixi chichi Israel viti. ¹⁶ Ta jánaħa i nu dá ndá quiahva ndítahan ndoho ini da sahá i —ñacachi Jesús.

¹⁷ Anda já ñaquee Ananías cuahan da vehe nu ín Saulo cán. Tá ñaxinu da cán já ñachinúu da ndáħa dá jiní Saulo já ñacachi da já xihín dá:

—Ñani Saulo. Mé Jesús, xitoho í, mé á ñaxinún nuú ñaquisún íchi cán, mé á cán quéa ñachindahá yehe vaxi i já ná ndinuna nduchú núún já ná cuu candehé tucún. Ta já cúni Ndióxi ña ná ndicutú ndaa ínimun xihín ínima yji mé á —ñacachi Ananías xihín Saulo.

¹⁸ Chí ivi laá ñacasáhá cúyu ñaha tátuhun runchu tiyacá nduchú núú Saulo chí ñanuna nu dá sándehe tucu da. Anda já ñasahan Saulo ñacandúta dá. ¹⁹ Tá ñandihí já ñaxixi da ta

nandihvi tucu ndée dá ta nasahjin tóo da chá quivi xihin na cúu cuéntá Jesús ndúu ñuu Damasco cán.

Cáhan Saulo saha Jesús nuú ñayivi ñuu Damasco

²⁰ Tá nandihí já nacasáhá Saulo jánaḥa da tuhun Ndióxi ini veñuhu ta jánaḥa da ña cúu Jesús in túhún jiní já jahyi Ndióxi. ²¹ Ta tóco ndihí na taa johu nu cáhan da cátóntó na cája da. Já cáchí xihin táhan na já:

—Á a juú da yóho cúu da nandicuíta cája xíxi xihin na cúu cuéntá Jesús ñuu Jerusalén, nduu. Á a juú sa mé da yóho vaxi da tiin da na cúu cuéntá Jesús mé ñuu yóho já ná cuhun na nuú na sacuaḥa nuú jutú já ná taán ñahá na vecaa —nacachi xihin táhan na.

²² Joo ví ga ví ndíndeé ini Saulo cáhan da tuhun Ndióxi. Ta náḥa da nuú ñayivi ña mé Jesús cúu Cristo, mé á nachindahá Ndióxi cacomí cuéntá sahá ñayivi. Janda quiahva já najajaca da xini túni na naquixi chichi Israel ndúu Damasco cán xihin tuhun cáhan da xihin ná.

Xínu Saulo nuú java na Israel jáchi cúní na cahní na da

²³ Tá sa nayaha cuahá quivi já najándique táhan na naquixi chichi Israel cán tuhun na ña cahní na Saulo. ²⁴ Joo nacandaa ini Saulo ña ndúcú na cahní na da. Ta mé na ndúcú cahní Saulo cán nasandati na ñuú ta ndiví yéhe ñuu cán janda quiahva ná queta da já ná cahní na da. ²⁵ Joo in ñuú na cúu cuéntá Jesús ndúu ñuu Damasco cán nachicaan na da ini in toyicá cáhnu já najánuu na da ndica náma cáhnu ndájí yuhú ñuu cán já nacacu da ta naquee da cuahan da.

Cuah̄an Saulo ñuu Jerusalén

²⁶ Tá nāxinū coo Saulo ñuu Jerusalén já nānducú dā ndique táhan dā xihín nā cúu cuéntá Jesús ndúu cán. Joo tóco ndihi nā cán nāyihví nā dā jáchi coo cándúsa nā ñā sā nāndiquehe dā íchi cuéntá Jesús.

²⁷ Joo nāndiquehe Bernabé sāhā Saulo. Nāsāhan dā najánāha dā dā nuú nā apóstol cán já ná ndique táhan nā xihín dá. Ta nāndicani Bernabé nu ná ndaja nāsāhiin tá nāxini Saulo Jesús íchi nu xíca dā cuah̄an dā chí ñuu Damasco. Ta nāndicani dā ñā nācāhan Jesús xihín Saulo. Ta nāndicani dā ñā coo nāyihví Saulo cāhan dā sāhā Jesús ñuu Damasco.

²⁸ Andā já nāndiquehe nā Saulo ta nācandoo dā ñuu Jerusalén. Ta nācasáhá xíca nuu dā xihín nā apóstol. ²⁹ Ta coo yihví dā cáhan dā sāhá Jesús.

Ta nānditúhún dā xihín nā nāquixi chichi Israel, nā cáhan tuhun griego ndúu ñuu cán. Joo mé nā cán ndúcú nā ndá quiāhva caja nā cahní nā dā.

³⁰ Tá nācandāa ini nā cúu cuéntá Jesús ñā ndúcú nā cahní nā Saulo já ñéhe nā dā cuah̄an dā ñuu Cesarea. Andā já nāchindahá nā dā cuanúhu dá ñuu Tarso.

³¹ Andā já nānduu vāha ini tóco ndihi nā cúu cuéntá Jesús ndúu ndijāá estado Judea xihín estado Galilea xihín estado Samaria. Ta nāndindacú chága ví ini nā xihín tuhun Ndióxi. Ta xihín ndinuhu ini nā cája cáhnu nā Ndióxi. Ta chíndeé ínimā yii mé á nā. Ta já nāndicuāha chága nā cuah̄an nā.

Ndívāha in dā naní Eneas

³² Ta ndaja coo xíca nuu Pedro xíto nihni dā nā cúu cuéntá Jesús ndúu ñuu váli cán. Ta já nāsāhan ri dā xíto nihni dā nā cúu cuéntá Jesús ndúu ñuu

Lida. ³³ Cán nanditahan da in dataa naní Eneas, da naxihí tuchu saha. Ta tixi una cuia nasandúhu dá jáchi a cuú caca da. ³⁴ Anda já nacahan Pedro xihín dá já nacachi da já:

—Eneas, viti ndája vaha Jesucristo yohó. Cuáhán ndacoo. Nditivún yívun —cáchi Pedro xihín dá.

Chí ivi laá nandacoo Eneas. ³⁵ Tóco ndihi na ndúu ñuu Lida xihín na ñuu Sarón naxini na da nandivaha yoho ta anda já najándacoo na costumbre yatá nasacaja na já nandiquehe na íchi cuénta Jesús, xitoho í.

Ndíta cu in ñáñáha naní Dorcas

³⁶ Ta ndaja coo nasahin in ñáñáha, ñá cúu cuénta Jesús ñuu Jope. Ta mé ñáñáha yoho naní ñá Tabita ta tuhun griego cáchi na Dorcas xihín ñá. Ta mé Dorcas yoho níi tiempo nandíhi ini ñá cája ñá ñamaní xihín ñayivi ta nachindeé ñá na ndahví. ³⁷ Ta mé tañu já naquehe cuehe Dorcas ta naxihí ñá. Ta tá sa nandicata na yiquí cuñu ñá já ñéhe na ñá nasahan na nachindúhu ná ñá piso ninu vehe cán. ³⁸ Ta yati va ñéhe táhan ñuu Jope cán xihín ñuu Lida nu ín Pedro. Tá nacandaa ini na cúu cuénta Jesús ñá ín yati Pedro já nachindahá na ivi dataa nasahan da cana da Pedro ñá ná cuhun quí dá ñuu Jope cán.

³⁹ Anda já ndáca táhan Pedro cuahan da xihín ndíví dataa cán. Tá naxinu coo Pedro ñuu Jope cán já najáquihvi na da ini vehe nu ndácaan mé ndí Dorcas cán. Nataca tiyivi cuahá najihí cuaan ndúu na sácu ndivaha na saha ñá naxihí cán. Ta najánaaha na jáhma ñá nacavaha Dorcas nu dá tá nasatacu ñá. ⁴⁰ Anda já nacachi Pedro xihín ndihi

ñayivi ndúu cán ña ná quee tóo na jata véhe. Tá sa ñaqueta na cán já ñacaxítí da xíca tahví da nu Ndióxi. Anda já ñacasáhá sándehe da ndii cán já ñacasáhá cáchi da já xihín ña:

—Cuáhán ndacoo, Tabita.

Tá ñacachi da já chí ivi laá ñanuna nduchú núu ña ñanditacu ñá. Tá ñaxini ñá Pedro já ñasacoo ñá. ⁴¹ Anda já ñatiin Pedro ndáha ña já ñandiñehe da ña. Anda já ñacana da ña cúu cuéntá Jesús xihín ña cuáan cán ná quihvi tucu na cán jáchi sa ñanditacu ñá. ⁴² Tóco ndihi ñayivi ñuu Jope cán ñacandaa ini na ña ñanditacu Dorcas chí cuaha ná ñacandúsa na Jesús ta ñandihvi na íchi cuéntá mé á. ⁴³ Ta chí ñacandoo Pedro cuahá quivi ñuu Jope cán. Ñacandoo tóo da vehe in da naní Simón, da ndája vií níi quiti.

10

Cáhan Pedro tuhun vaha saha Jesús nu Cornelio

¹ Ta ndaja coo ñasahiin in dataa naní Cornelio ñuu Cesarea cán. Ta mé Cornelio yóho cúu dá da cómi chuun nuú iñu ciento soldado. Ta mé táhnda soldado yóho naní a Táhnda Italiano. ² Ta mé Cornelio yóho xihín tóco ndihi ña vehe da cája cáhnu na Ndióxi xihín ndinuhu ini na. Ta jása da jiuhún da ña chíndeé da ña ñaquixi chichi Israel. Ta ní tiempo xíca tahví da nu Ndióxi. ³ In quivi tátuhun caa uní sahini nani xíca tahví da nu Ndióxi já ñaxini cáxi táhyí da ñaquihvi in tátó Ndióxi ini vehe nu ndacaan da já ñacachi a já xihín dá:

—Cornelio.

⁴ Ta chí ñayihvi Cornelio sándehe da tátó Ndióxi cán. Anda já ñacachi da já:

—Ndíá cúní ndo, tátō Ndióxi.

Anda já nanducú ñehe tátō Ndióxi cán tuhun nu dá já cáchi a já xihín dá:

—Xíni johō Ndióxi tá xíca tahvún nu á ta sa xíni a ña nachindeé cuahún na ndahví. Ta táhán ini mé á xihín ña cájún. ⁵ Ta viti cúní Ndióxi ña ná chindahún java dataa ná cuhún da ñuu Jope já ná cana da da naní Simón, da cáhan tucu na Pedro xihín ná quixi da. ⁶ Íin tóo Pedro vehe inga da naní Simón, da ndája vií níi quítí. Ta yati yuhú tañuhú íin vehe da. Ta mé Pedro cán caxi tuhun da xuhun ndíá ndítahan nuun cajún —nacachi tátō Ndióxi cán.

⁷ Tá sa naqueee tátō Ndióxi cán cuahan já nacana Cornelio iví mozo da ta nacana da in táhan soldado, da cómi da cuénta saha. Ta mé soldado yóho cúú dá in da cája cáhnu Ndióxi. Ta cándeé ini Cornelio da. ⁸ Ta tá nandihí nandicani Cornelio nu ndíhuni da ña nacachi tátō Ndióxi xihín dá já nachindahá ñahá da cuahan da ñuu Jope.

⁹ Ta inga quiví itaan xíca na cán cuahan na íchi ta sa yati xinu coo na ñuu Jope. Ta cúú á tátuhun caxiví ta mé hora já nandaa Pedro jiní véhe caça tahví da nu Ndióxi. ¹⁰ A juú quiahva cuíco Pedro chí naxíca da ña cuxu da. Ta nani cája ndíví na ña cuxu da já najánaḥa Ndióxi in ñaha nu dá. ¹¹ Ta ña naxini da quéa nandinuna indiví já nanuu in jáhma cáhnu tátuhun in sábaná ña ndíco ndícomí tito ta núu a vaxi ñuyíví yóho xíní da. ¹² Ta mé ini jáhma cán ñúhu tá nuú quítí, rí comí saha xihín coo xihín laa viti. ¹³ Anda já naxini johō da cáhan in a xihín dá já nacachi a já:

—Pedro. Candichi ta cahní quítí jan casún.

¹⁴ Anda já nanducú ñehe Pedro tuhun já cáchí da já:

—A cája toho i já, xitoho i jáchi ni in túhún tañu a ñáha caxí i quití quini tátuhun rí yóho. Jáchi cáchí ley nasahan ndó nuú nde ña ná a caxí toho nde ri —cáchí Pedro xihin á.

¹⁵ Anda já naçahan tucu a xihin dá já naçachi a já:

—Sa nandaja vii va Ndióxi rí jan. Sahá ña cán quéa co ndítahan cachún ña cúú rí rí quini —cáchí a xihin dá.

¹⁶ Tixi uní táhnda naxini da ña yóho naçaja Ndióxi. Anda já nandindita tucu jáhma cán cuahan chí indiví. ¹⁷ Chí naçasáhá ndícani ini Pedro ndía cúní cachi ña naxini da. Ta xihín ña yóho naxinu coo ndíhuni dataa, da nachindahá Cornelio mé vehe nu íin Pedro cán. Jáchi vaxi da ndaça tuhún da sahá vehe Simón janda quiahva nanditahan da ña. ¹⁸ Ndíta ndíhuni da cán yuyéhé vehe Simón ta cáyuhú da ndáça tuhún da sahá in da nani Simón, da cahan tucu na Pedro xihin. ¹⁹ Ta nani ndáça tuhún na yóho íin yii va Pedro jini véhe cán ndícani ini da sahá ña naxini da naçaja Ndióxi cán. Anda já naçahan ínima yii Ndióxi xihin dá já cáchí a já:

—Candehé, nandai cuu uní òa vehe yóho ta ndínducú da yohó. ²⁰ Cuáhán nuu cuhún xihin dá ta a ndícani inún jáchi mí i nachindahá i da vaxi —cáchí a xihin Pedro.

²¹ Anda já nanuu Pedro já naxinu da nu ndíta dataa nachindahá Cornelio cán. Já naçachi Pedro já xihin dá:

—Yehe cúú Pedro, da vaxi ndó ndínducú ndo ta viti cachi ndó xihín i ndá quéa cúní ndo.

²² Anda já nanducú ñehe da cán tuhun nu Pedro já cáchí da já:

—Da naní Cornelio cúú da nachindahá ndehe vaxi nde. Mé Cornelio cúú dá in da cómí cuéntá sahá iñu ciento soldado. Mé dá cúú dá in ɬa cája ña ndaa. Ta cája cáhnu da Ndióxi. Ta quihvi ndivaha ini na Israel da. Ta naçahan in tátō Ndióxi xihín dá ña ná chindahá da ndehe cana nde ndohó cuhun ndó vehe da já ná çahan ndó xihín dá ndá quéa cúni Ndióxi caja da —cáchí da xihín Pedro.

²³ Anda já najáyaha Pedro ndihuni dataa cán ini vehe. Já naçandoo da cán naquiji da ñuu vehe Simón cán. Ta inga quiví itaan já naquee Pedro cuahan da xihín ndihuni dataa cán. Ta ndáca Pedro java na cúú cuéntá Jesús ndúu ñuu Jope cán cuahan na xihín dá.

²⁴ Janda inga quiví itaan já naxinu çoo na ñuu Cesarea nu in Cornelio ndáti da na. Mé Cornelio yóho sa najátaca da tóco ndihi na vehe da xihín java na ñehe táhan vaha xihín dá ndúu na xihín dá ndáti na saa Pedro. ²⁵ Tá naxinu çoo Pedro vehe cán já naqueta Cornelio ndiquehe ñahá da. Ta tá nandihí já naçaxítí Cornelio nu Pedro ña caja cáhnu ñahá da. ²⁶ Joo nasacu ndichi Pedro da já naçachi Pedro já xihín dá:

—Candichi jáchi ñayivi xihín mé vún cúú yehe.

²⁷ Sa já çahan Pedro xihín dá ndáca táhan da nandihvi da ini vehe. Ta tá nandihvi da cán já naxini Pedro nanditútú cuahá ñayivi ndúu na cán.

²⁸ Anda já naçasáhá Pedro çahan da xihín ná já cáchí da já:

—Sa xini vaha ndó ña cúú yehe in da naquixi chichi Israel. Ta sa xini ndó ña sáhndá ley nuú nde

ñá ná a catáhan nde xihín ñayivi tóho. Ta ni vehe na ná a ndíhvi nde cáchí ley. Joo viti najánaḥa Ndióxi nuú i ña co cúu ndeḥe ñayivi víi chága a juú ga ndóhó, na tóho. ²⁹ Sahá ña cán queá tá naçana ndó yeḥe ivi laá naquee e vaxi i. Ta ni coó nandaja ndíchí i da ndáca yeḥe vaxi i yóho. Ta viti cúni candaḥ ini i ndá cuéntá queá naçana ndó yeḥe vaxi i —cáchi Pedro.

³⁰ Anda já nanducú ñehe Cornelio tuhun nu Pedro já cáchí da já:

—Janda comí quivi tátuhun hora viti, xíjuhun i ta xíca tahví i nu Ndióxi ndácaan i vehe e. Ta tá naṣandehé e já naḥini i in dataa ndíxi jahmá yeḥe cándichi da nuú i. ³¹ Já naçachi da já xihín i: “Cornelio, sa xíni joho Ndióxi nu xíca tahvún nu á. Ta quehe a cuéntá saḥá ñamañi cájún xihín na ndahví. ³² Ña cán queá chindahá java dataa ná cuhun da ñuu Jope cana da Simón, da cáhan tucu na Pedro xihín ná quixi da caḥan da xuhun. Viti ín tóo da vehe in da naní Simón, da ndája víi níi quíti. Ta yati yuhú tañuhú ndácaan vehe da”, naçachi tátō Ndióxi cán xihín i. ³³ Sahá ña cán queá ivi laá naçindahá i mozo i naṣaa da nducú da ndóhó. Ta vaha naçaja ndó vaxi ndó. Ta viti nanditútú ndihi nde ndáti nde nu Ndióxi. Ta cúni nde cuni joho nde tóco ndihi ña naṣahnda Ndióxi nu ndó cachi ndó xihín nde —cáchi Cornelio xihín Pedro.

Cáxi tuhun Pedro nuú ñayivi vehe Cornelio

³⁴ Anda já naçasáhá cáhan Pedro já naçachi da já:

—Viti cándaḥ ini i ña coó na náhnu chága a juú ga inga na nu Ndióxi jáchi nu mé á in cúu ndihi

ví. ³⁵ Ña cája mé á quéa ndíquehe vaha ndá ñayivi nacuú tá cándeé ini na mé á ta cája na ña vaha. Coó caja toho a á cúú ná na Israel á na tóho. ³⁶ Naçaxi tuhun Ndióxi nuú ñayivi Israel ndá quiahva cuu coo vaha ini na tá cándeé ini na Jesucristo, mé á cúú xitoho toco ndihí. ³⁷ Sa cándaá ini ndó ndaja nasahiin tá naçasáhá Juan cáxi tuhun da nuú ñayivi ndúu estado Galilea ña ná ndicó coo ini na nuú cuachi na ta já ná candúta na. Ta nandicutita nuu tuhun ndijáá nu ndúu na Israel. ³⁸ Ta sa cándaá ini ndó ndaja naçaja Ndióxi xihin Jesús, mé a naquixi ñuu Nazaret. Najándicutú ndaa Ndióxi Jesús xihin ínima yii mé á ta najándicutú a ña xihin ndée mé á. Ta mé Jesús naçica nuu a cája ndinuhu ña vaha xihín ñayivi. Ta nandaja vaha mé á na nasandoho ini naçaja tiñáhá sacuahá. Naçaja Jesús ña yóho jáchi nasahiin Ndióxi xihin á. ³⁹ Ta mé nde, na apóstol cúú na naçini ña naçaja Jesús tóco ndihi ña yóho tá nasahiin a estado Judea ta tá nasahiin a ñuu Jerusalén. Anda já nasahni na mé á tá naçata caa na a ndica crúxu. ⁴⁰ Joo tá nayaha uní quivi já najánditacu Ndióxi Jesús ta naçaja Ndióxi ña ná naça Jesús mé á nuú nde. ⁴¹ Coó nanaha toho Jesús mé á nu tóco ndihi ñayivi. Nuú ndehe, na naçaxi Ndióxi cuití va nanaha Jesús mé á. Jáchi janda jihna naçaxi mé á ndehe ña ná cuni nde ña ta ná cahan nde xihín ñayivi saha mé á. Ta tá sa nanditacu tucu a tañu ndii cán já naçixi nde xihin á. ⁴² Ta mé á nachindahá ndehe çaxi tuhun nde nuú ñayivi saha Jesús ta ná ndicani nde nu ná ña nasacu Ndióxi mé Jesús ña ná caja vii a sahá ñayivi. Coó caja toho a á tácu na á naçixi na. ⁴³ Ta jári na profeta va janda sanahá naçahan na

sahá Jesús ta ña cachi na ña caja cáhnu ini Ndióxi sahá cuachi ndijáá ñayivi tá ná candeé ini na mé á —cáchi Pedro xihín ndihi na ndúu vehe Cornelio cán.

Jándicutú Ndióxi na coó naquixi chichi Israel xihín ínimá yii mé á

⁴⁴ Ta nani cáhan Pedro cándichi da já ñaxinu ínimá yii Ndióxi najándicutú a ínimá tóco ndihi na táa johó ña cáhan da cán. ⁴⁵ Ta na cúu cuéntá Jesús, na naquixi chichi Israel, na ndáca Pedro vaxi xihín dá cán, ñacatóntó na tá ñaxini na ñandicutú na tóho cán xihín ínimá yii Ndióxi. ⁴⁶ Ta xini na ña cúu á ña ndaa jáchi ñaxini johó ña cája cáhnu na Ndióxi ta cáhan na inga tuhun ña coó ñasatiahva na. ⁴⁷ Anda já cachi Pedro já:

—Cája i cuéntá ni in túhún toho ñayivi a cúu caji nuu nuú na tóho yóho ña ná candútá ná jáchi sa ñandicutú ínimá ná xihín ínimá yii Ndióxi tátuhun ñandicutú mé nde xihín á —cáchi Pedro.

⁴⁸ Anda já ñasahnda Pedro chuun ña ná jácandútá ná na cuéntá Jesucristo. Tá ñandihí já ñaxica tahví na cán nu Pedro ña ná candoo da chága quivi xihín ná.

11

Ndicani Pedro nuú na cúu cuéntá Jesús ndúu ñuu Jerusalén sahá ña nayaha vehe Cornelio

¹ Tóco ndihi na apóstol xihín na cúu cuéntá Jesús ndúu estado Judea ñañehe ná tuhun ña ñandiquehe ri na coó naquixi chichi Israel tuhun Ndióxi. ² Ta tá ñandicó coo Pedro chí ñuu Jerusalén já ñacasáhá in táhnda na cúu cuéntá Jesús ndúu ñuu

cán cáhan núu na saha dá. Mé na yóho cáhán na ña ndítahan núu na tóho cahnda loho na yiquí cuñu na tátuhun ín costumbre na Israel. ³ Já cáchí na já xihín dá:

—Ndá cuéntá quéa nasahún naxito nihnún na coó naquixi chichi Israel. Ta ndá cuéntá quéa naxisún xihín ná. A váha toho nacajún cáhán nde —nacachi na Israel cán xihín Pedro.

⁴ Anda já nacasáhá Pedro ndícani da tóco ndihi ña nayaha janda saha. Já nacachi da já:

⁵ —Nasahiin i ñuu Jope. Ta nani xíca tahví i nu Ndióxi já najánaha mé á in ñaha núu i. Ta ña naxini i cúu in jáhma cáhnu tátuhun sábaná nanuu chí indivi ta ndícomí xoo tito á nactō. Ta chí janda yati nu ín i naxinu a. ⁶ Ta tá nasandehé vaha i ini a já naxini i ñúhu tá núu quití, rí comí saha xihín tá núu quití yúcu xihín coo xihín laa ñúhu ini a naxini i. ⁷ Anda já naxini johō i cáhan in a já nacachi a já xihín i: “Pedro, cuáhán ndacoo cahní quití jan casún.” ⁸ Anda já nanducú ñehe e tuhun já nacachi i já: “A cáxí toho i rí yóho, xitoho i jáchi co xini toho i caxí i quití quini tátuhun rí yóho”, cáchí i xihín Ndióxi. ⁹ Anda já nacahan tucu a cán chí indivi já nacachi a já: “Sa nandaja vií va Ndióxi rí jan. Saha ña cán quéa co ndítahan cachún ña cúu rí rí quini”, nacachi Ndióxi xihín i. ¹⁰ Uní táhnda nayaha ña yóho nacaja Ndióxi. Anda já nandaa tucu tóco ndihi ña cán cuahan tucu a chí indivi. ¹¹ Ta chí sa mé hora já naxinu coo uní taa ndínducú da yehe mé vehe núu nasahiin tóo i cán. Ta da cán naquixi da janda ñuu Cesarea ndínducú da yehe. ¹² Ta já nachindahá ínima yii Ndióxi yehe cuahan i xihín ná sahá ña cán quéa coó nayihví i cūhun

i xihin ná. Ta ndáca i iñu ñaní yóho nasahan da xihín i. Tá naxinu coo nde ñuu cán já naquihvi nde vehe Cornelio, da nachindahá da cán ndinducú yehe. ¹³ Ta tá sa ñúhu ndihi nde vehe Cornelio cán já nacasáhá ndícani da nuú nde ña naxini da cándichi in tátō Ndióxi ini vehe da ta naxachi a xihin dá já: “Chindahá java taa ná cuhun da ñuu Jope cana da in da naní Simón, da cáhan tucu na Pedro xihin. ¹⁴ Ta da cán caxi tuhun xuhun ta xihín ndihi na vehún ndaja caja ndó cacu ndaa ínimá ndó”, naxachi tátō Ndióxi xihin Cornelio cán. ¹⁵ Ta tá nacasáhá i cáhan i xihín na vehe Cornelio cán já nandicutú ndaa ínimá ná xihin ínimá yii Ndióxi tá quiahva najándicutú a ínimá mí jihna. ¹⁶ Xihín ña yóho nandicuhun ini i ña naxachi Jesús, xitoho í xihin yo tá naxachi a já: “Mé a ndaa najácandúta Juan ndohó xihín ticuú joo vaxi quivi jándicutú Ndióxi ndohó xihin ínimá yii mé á”, naxachi Jesús. ¹⁷ Ta tá sa nasahan Ndióxi ínimá yii mé á nuú na cán tá quiahva naxaja xihin mí sahá ña naxandúsa í Jesucristo, xitoho í ama ná cani táhan i xihin Ndióxi sahá ña cája mé á xihín na cán —naxachi Pedro.

¹⁸ Tá naxini johó na cán ña naxachi Pedro já naxatáji ná ta naxaja cáhnu na Ndióxi já naxachi na já:

—Mé a ndaa sahan ri Ndióxi ñamaní nuú na tóho ña ná ndicó coo ini na jándacoo na cuachi cája na já ná coo na xihin mé á anda ama cáa quivi —naxachi na cúu cuéntá Jesús, na naquixi chichi Israel cán.

Cuahá na ñuu Antioquía ndiquehe na íchi cuéntá Jesús

19 Tá nandihí nasahní na Esteban já nacasáhá cája xíxi na xihín na cúu cuéntá Jesús. Anda já nandicuita nuu na cuahan na ta java na naxinu na janda chí estado Fenicia. Java na naxinu na cuahan na chí isla Chipre. Ta java na naxinu na chí ñuu Antioquía. Ta cán nacasáhá cáhan na tuhun Ndióxi nuú na naquixi chichi Israel cuití va. Joo coó naxaxi tuhun na ña nuú na tóho cán. 20 Joo java na cúu cuéntá Jesús, na naquixi chí isla Chipre cán xihín na naquixi ñuu Cirene naxinu coo na ñuu Antioquía ta nacasáhá na cáhan na tuhun vaha saha Jesús, xitoho í xihín na coó naquixi chichi Israel ndúu cán. 21 Ta nasahan Ndióxi cuahá ndée mé á nu ná. Ta cuahá ndivaha ñayivi najándacoo na costumbre yatá na ta nandiquehe na íchi cuéntá Jesús, xitoho í.

22 Tá nacandaá ini na cúu cuéntá Jesús ndúu ñuu Jerusalén tóco ndihí ña nayaha cán já nachindahá na Bernabé cuahan da janda ñuu Antioquía cán. 23 Tá naxinu coo Bernabé ñuu Antioquía cán já naxini da ndá quiahva naxaja Ndióxi ñamaní xihín ñayivi ñuu cán chí naxaji ndivaha ini da. Ta naxahan da xihin ná ña ná candico na íchi cuéntá Jesús xihín ndinuhu ini na. 24 Mé Bernabé yóho cúu dá in ta vaha. Ta chútú ndaa ínima da xihin ínima yí Ndióxi ta cándéé cáhnu ini da mé á. Ta cuahá ñayivi nandiquehe na íchi cuéntá Jesús, xitoho í sahá ña naxaja da.

25 Tá nandihí já naquee Bernabé cuahan da ndinducú da Saulo chí ñuu Tarso. Ta tá nandiñehe dá Saulo já ñehe da da cuahan da chí ñuu Antioquía. 26 Ta nasanduu da xihín na cúu cuéntá Jesús mé ñuu cán tátuhun in cuia. Ta najána

da tuhun Ndióxi nuú cuahá ndivaha ñayivi. Ta mé ñuu Antioquía cán cúú nuú nu cuítí nasacu na quivi ná cananí na cúú cuéntá Jesús.

²⁷ Ta mé tiempo já naxinu ɔo java na profeta mé ñuu Antioquía cán. Mé profeta yóho naquixi na chí ñuu Jerusalén ta tiahva na jáyaha na tuhun cáhan Ndióxi nuú ñayivi. ²⁸ Ta in táhan da profeta cán, da naní Agabo nandaca ndíchí da tañu na cúú cuéntá Jesús mé vehe nuú nataca na cán. Já nacachi da já:

—Cáxi tuhun ínima yij Ndióxi xihín i ña quixi in tama ndeé ndivaha ndijáá ñuyiví yóho —nacachi da xihin ná.

Ta chí já ndusa nasahin jáchi naquixi in tama ndeé ndivaha tá nasacomí Claudio cuéntá sahá ñayivi ñuu Roma. ²⁹ Anda já na cúú cuéntá Jesús ñuu Antioquía cán najátaca na jihún chindeé ñahá na cán. Ta ndá quiahva xinu ɔo nu mé ná quiahva na, quiahva já sahan na. Anda já nachindahá na ña nuú na cúú cuéntá Jesús ndúu estado Judea. ³⁰ Ta mé Saulo xihín Bernabé cúú da ñéhe jihún cán cuahan da ndiquiahva da ña nuú na sacuahá cómi cuéntá sahá na cúú cuéntá Jesús ndúu estado Judea cán.

12

Tá nacasáhá ndóho chága ini na cúú cuéntá Jesús

¹ Ta mé tiempo já nacasáhá Herodes, da cómi cuéntá sahá ñuu Jerusalén cán cája xixi da xihin java na cúú cuéntá Jesús. ² Nasahnda da chuun ña ná cahni na Jacobo, ñani Juan xihin yuchú caní. Ta já nacaja na. ³ Ta tá naxini Herodes ña nacajii íni na sacuahá veñuhu Israel xihin ña nasahní da

Jacobo já natiin ri da Pedro. Ta ña yóho nasacuu a mé tiempo tá cája nã Israel víco tá xíxi na pan ña co cáva táhan yusá naxaa xihin. ⁴ Tá sa nachicaan Herodes Pedro vecaa já nasahnda da chuun nuú comi táhnda soldado ña ná candaa na da. Ta comi comi ta ndáca in in táhnda cán. Mé Herodes nasacu ini da tavá da Pedro vecaa ndiquiahva da da nuú ñayivi Israel ña ná cahni na da tá sa ná yaha víco. ⁵ Nani ndácaan Pedro vecaa ndáa vaha na da. Joo nã cúu cuéntá Jesús xihín ndinuhu ini na xíca tahví nã nu Ndióxi saha dá.

Tává Ndióxi Pedro vecaa

⁶ Ta in ñuú sácú ini Herodes tavá da Pedro vecaa inga quiví itaan ña ndiquiahva da da nuú ñayivi, nduu. Joo mé ñuú já nani cándúhu Pedro quíji da tañu ivi soldado ta ndíco jín ga cadena ndáha dá ta co cáhan sahá java ga soldado ndíta ndáa yéhe vecaa cán. ⁷ Ta in náá cuití naxinu co in tátō Ndióxi ini vecaa cán chí nandiyihvi ndaa ini a. Anda já naxinu co mé tátō Ndióxi nu cándúhu Pedro já naquiní a ndáha á yíca ndíca da já nandicáxi ini da. Anda já nacachi a já xihin dá:

—Camún ndacoo quíun.

Anda já nacuyu cadena ña nasandíco ndáha Pedro. ⁸ Anda já nacachi tucu tátō Ndióxi cán já xihin dá:

—Ndaja tuun níi tísun ta cayihi ndusun.

Ta tá sa nacaja da ña já nacachi tucu tátō Ndióxi já xihin dá:

—Quehe ticachí níhnu chinúú jatun ná cohō candíco yehe —cáchi a xihin dá.

⁹ Anda já tácaa Pedro jata tátō Ndióxi cán cuahan da. Joo co xini da á jivi quéa á a juú a. “Sání ví”,

cáhán da. ¹⁰ Ta xíca na cásahan na já nayaha na nu ndíta in táhndá soldado. Ta anda já nayaha na nu ndíta inga táhndá soldado. Ta tá sa naxinu coo na yéhe caa cán já nanuna mé va já naquee na vecaa cuahan na. Ta tá sa naxica chá na cáyé cán já naquee tátō Ndióxi cán cuahan ta já nacandoo Pedro cán. ¹¹ Anda já nacandaa ini Pedro ña nayaha. Ta nacachi da já xihin mé dá:

—Viti ndusa cándaā ini i ña mé a ndaa táhyí quéa nacaja tátō Ndióxi yóho. Mé Ndióxi nachindahá a tátō á já ná tavá a yehe ndáha Herodes já ná a cáhni da yehe tá quiahva cúni na Israel —nacachi da.

¹² Nani cáhán Pedro xíca da cuahan da vehe María, ña cúu náná Juan, da naní tucu Marcos. Cán nanditútú cuahá na cúu cuéntá Jesús ndúu na xíca tahví na nu Ndióxi saha Pedro. ¹³ Ta tá naxinu coo da vehe María cán já nacasáhá cáti ndáha dá yéhe cán. Anda já naxinu coo in ña loho naní Rode ña candehé ña ndá na cándichi jata véhe cán. ¹⁴ Tá naxini johó ña cáhan da já nandicuni ña tachí Pedro. Joo nandindójó ña cuná ña yéhe sahá ña cájii íni ña. Ta já xínu ña nandicó coo tucu ña ini vehe caxi tuhun ña xihin na java cán ña cándichi Pedro jata véhe. ¹⁵ Joo tá nandicani ña ña yóho nu ná já nacachi na já xihin ña:

—Tachí va cúu yóhó.

—Jivi da —cáchi ña cán ndúcú ndée ña cáhan ña xihin ná.

Anda já nacachi na cán já:

—Ndá ínimā va da quéa jan jáchi vecaa va ndacaan Pedro —nacachi na.

¹⁶ Joo ndaja coo Pedro cáti ndáha yii va da yéhe cán. Já naxinu coo na nasuná na yéhe nu dá ta chí

na_yi_hví na tá na_xini na da. ¹⁷ Joo na_cuu ndáha dá nu ná ña ná a cáhan chága na. Anda já na_casáhá da ndícani da nu ná ndaja na_caja Ndióxi na_tavá a da vecaa cán. Ta já na_cachi da xihín ná:

—Ndicani ndó ña yóho nu Jacobo ta ndicani ndó ña nu tóco ndihi na cúu cuéntá Jesús —na_cachi Pedro.

Anda já na_cueta Pedro cuahan da.

¹⁸ Tá na_tivi inga quiví itaan já na_catóntó soldado vecaa cán tá na_candaa ini da ña coó Pedro ín vecaa ta coó na_xini da ndáchí cuahan da. ¹⁹ Anda já na_sahnda Herodes chuun ña ná ndinducú na da. Joo coó na_ndiñehe ná da. Anda já na_casáhá da ndája ndíchi da soldado vecaa cán ndáchí cuahan Pedro. Joo coó na_cuu cachi na cán ndáchí cuahan da. Sahá ña cán quéa na_sahnda Herodes chuun ña ná cahní ndihi na soldado da na_sandaa yéhe caa cán. Tá na_yaha ña yóho já najándacoo Herodes estado Judea cán ta na_cquee da cuahan da chí Cesarea coo da.

Quiví na_xihi Herodes

²⁰ A juú quiahva xójo ini Herodes xihín ñayivi ndúu ñuu Tiro xihín na ndúu ñuu Sidón. Joo ndíví ñuu cán najándique táhan na tuhun na cuhun na cahan na xihín dá. Coo vaha ini na xihín dá cúni na jáchi ñundáhyi rey cán cána tóco ndihi ña xíxi na. Joo jihna ñúhú na_ndique táhan máni ná xihín in da naní Blasto. Mé Blasto yóho na_sacuu da in da cáhnu cája chúun nu rey cán. Ta na_cahan na ña ná cahan ndahví da cán nu rey saha ná. ²¹ Ta na_sacu Herodes in quiví nditútú ndihi na nu dá. Ta tá na_tandaa mé quiví já na_sacandixi Herodes jáhma vaha ndivaha da, ña sácandixi rey. Ta na_sacoo da

nu sác̄o rey. Ta já naçahan cóhó da xihín ñayivi.
 22 Tá naxinu coo ña cahan da já naçasáhá ñayivi cán
 cáyuhú na já cáchí na já:

—Ndióxi cúú da yóho ta co cúú dá ndá taa naçuu
 —cáchí na cája cáhnu na Herodes cán.

23 Ta chí sa mé hora já naxinu in tát̄o Ndióxi
 ta naçaja ña ná quehe Herodes cuehe jáchi coo
 naçaja cáhnu da Ndióxi ta já naçahan da ñamaní
 nuú ñayivi ña cáchí na cúú dá ndióxi. Chí sa mé
 hora já naquihvi ticujú yiquí cuñu da já naxihí da.

24 Ta ní cúú nandicuíta nuu tuhun vaaha saha
 Jesús xíca cuahan. Ta chí nandicuaha chága na cúú
 cuéntá Jesús.

25 Ta ndaja coo nandiquiahva Bernabé xihin
 Saulo mé jjuhún nuú na saçuaha veñuhu ndúu
 ñuu Jerusalén já nandicó coo da cuahan da ñuu
 Antioquía. Ta ndáca na Juan, da naní tucu Marcos
 cuahan da xihin ná.

13

Cája chúun Bernabé xihin Saulo cuéntá Ndióxi

1 Ta ndaja coo tañu na cúú cuéntá Jesús ndúu
 ñuu Antioquía cán ndúu na cúú profeta ta ndúu
 ri na jánaaha tuhun Ndióxi. Ta ña yóho cúú quivi
 ná: Bernabé xihin Saulo xihin Simón, da cahan na
 Taa Tuún xihin, xihin Lucio, da ñuu Cirene xihin
 Manaén, da naçahnu xihin Herodes. Mé Herodes
 yóho cúú dá da cómi cuéntá sahá ñayivi estado
 Galilea. 2 In quivi nani nanditútú ndihi na ndúu
 na xíjuhun na ta cája cáhnu na Ndióxi já naçahan
 ínima yii mé á xihin ná já naçachi a já:

—Tavá jíin ndó Bernabé xihín Saulo jáchi sa nacaxi mí i chuun quiahva i nu ná caja na — nacachi a.

³ Ta tá sa nandihí naxijuhun na ta tá nandihí naxica tahví na nu Ndióxi já nachojó na ndáha ná jiní Saulo xihín Bernabé já nandindayí na na cuahan na caja na chuun Ndióxi.

Cáhan Saulo xihín Bernabé tuhun vaha saha Jesús isla Chipre

⁴ Tá nandihí já nachindahá ínimá yíi Ndióxi Saulo xihín Bernabé cuahan na ñuu Seleucia. Ta cán nandaa na barco cuahan na isla Chipre. ⁵ Ta ndáca na Juan, da naní tucu Marcos cuahan da xihín ná já ná chindeé da na. Ta tá naxinu cōo na ñuu Salamina nu sá ndíchí barco cán já nacasáhá na cáhan na tuhun Ndióxi nuú ñayivi táca veñuhu na Israel cán. ⁶ Níí cúú isla cán naxica nuu na janda quiahva naxinu cōo na ñuu Pafos. Ta cán nanditahan na in da tají naquixi chichi Israel ta naní da Barjesús. Ta cúú dá in da tuhún jáchi cáchi da xihín ñayivi ña cáhan da cuénta Ndióxi. ⁷ Ta mé da tají yóho nasahin tuun da xihín in da naní Sergio Paulo, da cúú gobernador nuú ñayivi isla Chipre cán. Ta nasacuu da da ndíchí jiní. Ta mé gobernador yóho nacana da Bernabé xihín Saulo jáchi cuni da cuni johó da tuhun Ndióxi. ⁸ Joo da tají naní Barjesús, da naní tucu Elimas nacasáhá da sáji nuu da nuú Bernabé xihín nuú Saulo jáchi cō cuni da ña ná candeé ini gobernador cán Jesús. ⁹ Nandicutú ndaa ínimá yíi Ndióxi ini Saulo, da cáhan na Pablo xihín já nacasáhá sándehe ndaa da nuú da tají cán. ¹⁰ Já nacachi da já xihín dá:

—Yóhó cúún taa quini ta cúún jahyi tiñáhá, da xíca jándahvi ñayivi. Co cúún tóco ndihi ña vaha jáchi cúnun caji nuún nuú ñayivi ná a ndíquehe na íchi cuéntá Jesús. ¹¹ Ta viti jándoho Ndióxi inún. Jácuaa a yohó ta ni a cúún nuú candii tixi chá quivi —nacachi Pablo xihín da tají cán.

Tá nacachi Pablo já chí ivi laá nacuaá da cán. Jandá tiin ndaa na da xíca da jáchi co tívi nuú dá. ¹² Tá naxini da cúú gobernador cán ña yóho chí ivi laá nacandúsa da Jesús. Jáchi chí catóntó da xini johó da tóco ndihi ña cáhan na saha Jesús.

Xínu coo Pablo xihín Bernabé ñuu Antioquía ña ndácaan estado Pisidia

¹³ Nandaa Pablo xihín na xíca xihin dá barco ñuu Pafos cuahan na chí ñuu Perge ña ndácaan estado Panfilia. Joo nasahnda táhan Juan, da naní tucu Marcos xihin ná já nandicó coo da chí ñuu Jerusalén. ¹⁴ Tá nandihí já naquee Pablo xihín na xíca xihin dá ñuu Perge já naxinu na ñuu Antioquía ña ndácaan estado Pisidia. Ta mé quivi ndíquehe ndée ñayivi nandihvi na veñuhu já nasacoo na. ¹⁵ Ta tá sa nandihí nacahvi na ley Moisés xihín ña nacahyí na profeta já nacana na sacuahá veñuhu cán Pablo xihín na xíca xihin dá já nacachi na já xihin ná:

—Ñani i, tá iin tuhun vaha cúni ndó cahan ndó xihín ñayivi yóho cuu candichi ndó cahan ndó xihin ná viti —nacachi na cán xihin dá.

¹⁶ Anda já nacandichi Pablo já nacuu ndáha dá nu ná catáji yuhu ná já nacasáhá cáchí da já xihin ná:

—Cuni johō ndó ñayivi Israel xihin tóco ndihi ndó, na cája cáhnu Ndióxi. ¹⁷ Mé Ndióxi, mé a cája cáhnu ñayivi nación Israel naçaxi a tásáhnu jícó yo ta naçaja mé á ña ná ndicuahá ndivaha na nani naçacuu na na tóho nación Egipto cán. Joo tá nandihí já natavá mé á na xihin ndée mé á. ¹⁸ Ta cáhnu naçahin ini Ndióxi sahá cuachi na tañu ivi jico cuia nani naçica nuu na yucú íchí cán. ¹⁹ Ta najándihí Ndióxi sahá usa nación ñayivi naçanduu ñundáhyi Canaán já najáyaha ñundáhyi jan ndáha tásáhnu jícó yo jáchi janda sanahá naçahan mé á tuhun a nu ná ña caja já xihin ná. ²⁰ Anda já naçahnda Ndióxi chuun nu juexe já ná cacomí na cuéntá saha ná tixi comi ciento java cuia janda quiahva naçinu coo tiempo tá naçixi profeta Samuel, da jáyaha tuhun cáhan Ndióxi nuú ñayivi. ²¹ Anda já naçica tahví na Israel nu Ndióxi ña ná cacu mé á in rey ná cacomí da cuéntá saha ná. Sahá ña cán quea naçacu Ndióxi in da naní Saúl ná cacuu da rey nu ná. Naçacuu da jahyi Cis, da naçixi chichi Benjamín. Ta naçacomí Saúl cuéntá saha ná tixi ivi jico cuia. ²² Tá nandihí já natavá Ndióxi Saúl já naçhinúu a David ña ná cacomí da cuéntá saha ná. Já naçachi Ndióxi já saha dá: “Ín vaha ini i xihin David, jahyi Isaí jáchi xini ña caja mé dá tóco ndihi ña cuni”, naçachi Ndióxi saha David. ²³ Ta in da naçixi chichi mé David cán cúu Jesús, mé a naçahan Ndióxi tuhun a chindahá jáçacu ñayivi Israel janda sanahá ndivaha. ²⁴ Ta janda tá cámaní quixi Jesús já naçica nuu Juan, da jácandúta ñayivi naçahan da xihín ñayivi ña ndítahan nu ná jándicoo na cuachi cája na ta ná

candúta ná. ²⁵ Ta tá sa yati quivi da já nacachi da já xihín ñayivi: “A juú cahán ndo ña cúú yehe da nachindahá Ndióxi cacomí cuénta saha ñayivi, vaha. Jáchi ja chá xinu inga da ín chága saha a juú ga yehe. Ta da cán cacomí cuénta saha ndo ta cúú ndusa da cáhnu chága ta chí coó saha mí i caxítí i ndaxí i correa ndusa dá”, nacachi Juan xihín ñayivi cán.

²⁶ Cuni johó vaha ndó, ñani i, na naquixi chichi Abraham xihín tóco ndihi ndó, na cája cáhnu Ndióxi xihín ndinuhu ini. Mé Ndióxi cúni a ña ná candaá ini ndó ña nachindahá mé á Jesús ñuyíví yóho já ná jácacu a ndohó já ná a cühun ndó indayá. ²⁷ Tóco ndihi na ndúu ñuu Jerusalén xihín na sacuahá coó nacandaá ini na ña nachindahá Ndióxi Jesús ñuyíví yóho. Ta ni coó nacandaá ini na tuhun nacahyí profeta saha Jesús tá nasacahvi na ña veñuhu tá quivi ndíquehe ndée ná. Sahá ña cán quéa nasahní na Jesús joo xihín ña nacaja na yóho najáxinu coo na ña nacachi profeta sanahá. ²⁸ Ta vatí coó nañehe ná cuachi chicao na jata Jesús joo naxica na ñamaní nu Pilato ña ná cahnda da chuun ña ná cahní na Jesús. ²⁹ Ta tá sa naxinu coo tóco ndihi ña cáhí tuhun Ndióxi saha mé á coo anda já najánuu na a ndica crúxu já najánduxu na ña. ³⁰ Joo najánditacu Ndióxi Jesús tañu ndii. ³¹ Ta tixi cuahá quivi nanaha Jesús mé á nuú na nasañehe táhan xihín á tá naquee a estado Galilea cuahan chí Jerusalén. Ta mé na cán cúú na xica cahan saha mé á nuú ñayivi viti.

³² Sahá ña cán quéa cáxi tuhun nde tuhun vaha saha Jesús nu ndohó viti jáchi janda saha nacachi Ndióxi xihín tásáhnu jícó yo ña já coo. ³³ Ta

tá najánditacu Ndióxi Jesús najáxinu coo a tühun nasahan nu yó, na naquixi chichi na cán. Jáchí já nacahyi a nu Salmo ivi ta saha Jesús nacahan tá nacachi a já: “Jahyi mí i cúu yóhó. Ta yehe cája ña ná catacún quivi viti”, cáchí tühun Ndióxi. ³⁴ Joo Ndióxi sa nasahan va tühun a ña jánditacu a Jesús já ná a táhyi yiquí cuñu a. Jáchí já nacahyi a ini libro yii mé á já cáchí a já: “Nu yóhó quiahva i tóco ndihi ña vaha, ña nasahan i tühun i nu David quiahva i nu dá”, cáchí tühun Ndióxi. ³⁵ Já cáchí tucu inga Salmo já: “Mé ndó a quiahva toho ndó ñamaní tahyi yiquí cuñu i jáchí cúu u jahyi máni mé ndo, da cája chúun nu ndo”, cáchí tühun Ndióxi. ³⁶ Ta sa xini yo co cahan ña yóho sahá ña nacaja David jáchí tá nandihí nacaja da ña nasahnda Ndióxi nu dá já naxihí da ta najánduxu na da nuú nanduxu tásahnu jícó da. Ta natahyi yiquí cuñu da cán. ³⁷ Joo yiquí cuñu Jesús coo natahyi toho a jáchí najánditacu Ndióxi ña. ³⁸ Ña cán quéa vaxi nde caxi tühun nde ña yóho nu ndo, ñani i já ná candaa ini ndó ña cája cahnú ini Ndióxi sahá cuachi ñayivi sahá ña nacaja Jesús tá naxihí a ndica crúxu. ³⁹ Ta cája cahnú ini Ndióxi sahá cuachi ñayivi tá cándéé ini na Jesús. Jáchí ni in túhún ñayivi a cúu nduu ndaa nu Ndióxi sahá ña sácú vaha na ley Moisés. ⁴⁰ Joo cuéntá coo ndó a juú ndoho ndó ña nacachi na profeta sanahá tá nacachi na já: ⁴¹ Cuni johó vaha ndó, ndóhó na sácú ndaa ichi ña cahan Ndióxi.

Catóntó ndo jáchí cama chá ndihí saha ndo.

Jáchí yehe cúu Ndióxi ta cája i ña náhnú ndivaha, joo co cándúsa ndó ña cája i vatí ndicani java na

ñã nu ndo, ñacachi Ndióxi sanahá – ñacachi Pablo xihín ná.

⁴² Ta tá ñaqueta Pablo xihín ña xíca xihín dá veñuhu ña Israel cán já ñaxíca ñayivi, ña coo ñaquixi chichi Israel ñamaní nu dá ña ná cahan da xihín ná sahá tuhun Ndióxi inga quivi ndiquehe ndée ná. ⁴³ Tá ñaque ndihi na veñuhu cán já cuahá ña Israel xihín cuahá ña tóho, ña cándusa ley Moisés ta cája cáhnu na Ndióxi ñacasáhá ña ndíco ña jatã Pablo xihín jatã Bernabé. Ta Pablo xihín Bernabé jãnahã da ña ña ná candeé cáhnu ini na Ndióxi já ná caja mé á ñamaní xihín ná.

⁴⁴ Ta tá ñaxinu coo inga quivi ndiquehe ndée ná já ñataca tátuhun tóco ndihi ñayivi ñuu veñuhu cán ña taa johu na tuhun Ndióxi cúni ña. ⁴⁵ Joo tá ñaxini ña ñaquixi chichi Israel cán ña ñataca cuahá ndivaha ñayivi já ñacasáhá ña Israel cáhíhvi ini na. Já ñacasáhá ña cahan núu na saha Pablo ta ñacanahá ña xihín dá. ⁴⁶ Xihín ña cán ñandindeé chãga ini Pablo xihín Bernabé já ñacasáhá cáhí da já:

—Jihna ñúhú ndítahan nuú nde caxi tuhun nde tuhun Ndióxi nu mé ndó, ña ñaquixi chichi Israel. Joo sãndehé nde ña coo cúni toho ndó ndiquehe ndó ña. Ta cája nde cuéntã ña coo saha ndó cuhun ndó indiví. Sahá ña cán quéã vaha chãga ná cuhun nde cahan nde tuhun Ndióxi xihín ña coo ñaquixi chichi Israel. ⁴⁷ Jáchi já cáa chuun ñasahnda Ndióxi nuú nde tá ñacachi a já xihín nde:

Ñasacu yehe ndohó ña ná caxi tuhun ndó nuú ñayivi tóho ndúu ndijáá ñuyiví,

já ná candaa ini na ndaja caja na ná cacu ndaa ínimá ná, nacachi Ndióxi —nacachi Pablo xihin ná.

⁴⁸ Tá naxini johó nā tóho, nā cóo naquixi chichi Israel cán ña yóho chí nacajii ini na já nacasáhá nā cáhan na ña cúu ndusa tuhun Ndióxi ña vaha. Ta tóco ndihi nā nacaxi Ndióxi cacu ndaa ínimá, nandihvi na íchi cuéntá mé á. ⁴⁹ Já nasahiin nuú naxita nuu tuhun Ndióxi níi cúu ñundáhyi cán. ⁵⁰ Joo nā naquixi chichi Israel cán najándivaa nā java najihí, nā catóo cuhun veñuhu, nā có cáhan núu ñayivi saha. Ta najándivaa nā java dataa, da ín saha ñuu cán ña ná ndicuíta na xihin Pablo xihin Bernabé viti ta anda quiahva ná tavá nā da ñundáhyi cuéntá ñuu cán. ⁵¹ Anda já naquiji nihni Pablo xihin Bernabé ña yacá ndusá saha mé dá já ná nahá nuú nā cán ña cóo natahan ini da xihin ña cája nā Israel cán. Já naquee da ñuu Antioquia cán cuahan da inga ñuu naní Iconio. ⁵² Ta nā cúu cuéntá Jesús, nā nacandoo ñuu Antioquia cán nandicutú ndaa ínimá ná xihin ínimá yii Ndióxi ta cájii ndivaha ini na.

14

Cáhan Pablo xihin Bernabé tuhun Ndióxi nuú ñayivi ndúu ñuu Iconio

¹ Tá naxinu Pablo xihin Bernabé ñuu Iconio já nandihvi da veñuhu nu ndítaca nā Israel cán. Ta cán nacahan da tuhun vaha saha Jesús nu ná. Ta cuahá ndivaha nā Israel xihin nā cóo naquixi chichi Israel nacandeeé ini na Jesús. ² Joo java nā Israel, nā cóo nacandúsa tuhun Ndióxi nacasáhá nā cáva nā jiní ñayivi, nā cóo naquixi chichi Israel

ñã ná cahan núu na sahá na cúu cuéntá Jesús. ³ Sahá ñã cán quéã nasanduu nahá chága ví Pablo xihín Bernabé mé ñuu cán. Ta cõ ná yihví na cahan chága ví na tuhun Ndióxi jáchi cándeé ini na Jesús, xitoho na. Ta nasahan Ndióxi ndée á nu ná ñã ná cuu caja na cuahá nuú ñã náhnu ta xihín ñã yóho nacandaa ini ñayivi ñã mé a ndaa táhyi quíhvi ini ndusa Ndióxi ñayivi. ⁴ Joo ñayivi ñuu cán nacasáhá na sáhdá táhan na jáchi java na cuahan na jatá na Israel ta java na cuahan jatá na apóstol cán. ⁵ Anda já na Israel xihín na coó naquixi chichi Israel najándique táhan na tuhun na xihín na jutixia ñuu cán ñã ndúcú na canahá quini na xihín na apóstol ta nducú na cahní na da xihín yuu. ⁶ Joo tá nacandaa ini Pablo xihín Bernabé ñã sácú ini na cán caja xíxi na xihín dá já naxinu da cuahan da chí estado Licaonia. Naxinu coo da ñuu Listra xihín ñuu Derbe xihín java ga ñuu válí núhu ndijáá chí cán. ⁷ Ta cán nacahan ri da tuhun vaha saha Jesús nuú ñayivi ndúu cán va.

Cúun na yuu Pablo ñuu Listra

⁸ Tá naxinu coo da ñuu Listra cán já nandique táhan da xihín in dataa, da a cuú caca. Ta ín coo da cán jáchi cúu dá da quíhvi saha janda tá nacacu da cáa da já. ⁹ Ta ín coo da quíhvi saha yóho táa johu da nu cahan Pablo. Anda já nandicoto nihni Pablo nu dá ta cándaa ini Pablo ñã cuu ndivaha da jáchi cándeé ini da quíhvi cán Ndióxi. ¹⁰ Sahá ñã cán quéã nacayuhú Pablo nu dá já cáchí da já:

—Cuahán candichi —nacachi Pablo.

Ta chí ivi laá nacandita da ta nacasáhá xíca da. ¹¹ Tá naxini ñayivi ñuu cán ñã nandaja vaha

Pablo da cán já naçasáhá na cán cáyuhú cóhó na mé tuhun cáhan na ñuu Licaonia, ña cō cándaḡa ini Pablo. Já cáchí na já:

—Ndióxi cúu da yóho ña naquixi indiví túní a ñéhe cuití da nahná ñayivi —cáchí na cáyuhú na tuhun mé ná.

¹² Naçachi na cán ña Bernabé cúu dá in ndióxi naní Júpiter. Ta Pablo cúu dá in ndióxi naní Mercurio cáchí na jáchí mé dá cúu da cáhan chága. ¹³ Ta da cúu jutū nuú veñuhu Júpiter, ña ndácaan yuhú ñuu cán ñéhe da tindiꞗi xihín cuahá ita jáchí ndúcú ndihi na cán cahní na tindiꞗi joco na rí nu Pablo xihín nuú Bernabé caja cáhnu na da. ¹⁴ Joo tá naçandḡa ini Pablo xihín Bernabé ña ndúcú na cán caja cáhnu na da já nandatá da jáhma dá sahá ña cō táhán ini da xihín ña cája na. Ta já naçasáhá na xínu na naꞗihvi na tañu ñayivi cán. Ta cáyuhú Pablo já cáchí da já xihín ná:

¹⁵ —Candehé ndo. A váha toho ña ndúcú ndó caja ndó yóho jáchí ñayivi xihín mé va ndó cúu ndehe. Ndá cuéntá queá cúní ndó caja cáhnu ndó ndehe. Ta chuun vaxi nde yóho queá caxi tuhun nde xihín ndó tuhun vaha saha Jesús. Ta já ndítahan nu ndo jándacoo ndó ña a váha jan. Ta candico ndó Ndióxi tácu, mé á naçavaha indiví xihín ñuyívi xihín tañuhú xihín tóco ndihi ñaha ndúu nuú in in ña cán. ¹⁶ Anda sanahá najándicoo ndáha Ndióxi ñayivi ndijáá nación caja na ndía cúní mé va na caja na. ¹⁷ Joo ní tiempo najánaḡa Ndióxi yo cúu mé á nu ná jáchí ní tiempo naçaja vaha mé á xihín ná. Mé a chindahá javi nu yo. Ta mé á cája ña ná cana vaha ñundáhyi yo. Ta cája mé á ña ná a cámaní

ñā cuxú já ná cajii ínı yo –naçachi Pablo xihín na cán.

¹⁸ Ta vatı naçahan Pablo tuhun yóho xihín ná joo ihvi ndivaha já naçava da jinı ñayivi cán ñā ná a cáhni na tındiquı joco na nu dá ñā caja cáhnu na da.

¹⁹ Tá nandihı já naxinu coo java na Israel, na naquixı ñuu Antioquía xihín java na naquixı chí ñuu Iconio. Já naçava na jinı ñayivi já naçati na naçuun na yuu Pablo. Ta tá sa naçahan na naxihı da já ñúhu na da nasahan na najácana na da yuhú ñuu. ²⁰ Joo na cúu cuéntá Jesús nataka na ta naçava nuu na nu cándúhu Pablo ta já nandacoo da já naquihvi tucu da ñuu cán. Ta inga quıvi itaan já naquee da xihín Bernabé cuahan da ñuu Derbe.

²¹ Tá naxinu coo ndıví da cán ñuu Derbe já naçasáhá da cáxi tuhun da nuú ñayivi sahá Jesús ta cuaha ná nandiquehe íchı cuéntá Jesús ñuu cán. Anda jáví nandıcoo coo Pablo xihín Bernabé chí ñuu Listra xihín ñuu Iconio já naquee da cuahan da chí Antioquía. ²² Ta mé ñuu cán najáçahan da na cúu cuéntá Jesús ñā ná coo ndacú chága na ta ná a jándacoo na ñā cándeé ini na Jesús. Ta naçachi da ñā já ndusa ndoho ndivaha ini na janda quiahva ná xinu coo na cacomı Ndióxi cuéntá saha ná. ²³ Tá nandihı já nasacu Pablo xihín Bernabé java da saçuaha ñā ná cacomı da cuéntá sahá na cúu cuéntá Jesús in in ñuu cán. Ta tá nandihı naxijuhun na ta naxıca tahvi na nu Ndióxi saha ná já nandiquiahva da na ndáha Ndióxi ñā ná candaa mé á na jáchı cándeé ini na mé á.

Ndıcoo coo Pablo xihín Bernabé ñuu Antioquía ñā

ndácaan estado Siria

²⁴ Tá nandihí já nayaha Pablo xihín Bernabé chí estado Pisidia jandá quiahva naxinu coo na ñundáhyi cuéntá Panfilia. ²⁵ Ta nacahan na tuhun vaha saha Jesús nuú ñayivi ñuu Perge. Anda já naquee na cuahan na chí ñuu Atalia. ²⁶ Ta ñuu Atalia cán nandaa na barco já nandicó coo na chí Antioquía nuú naquee na jihna. Jáchí mé cán cúú nuú nandiquiahva na dá ndáha Ndióxi ña ná caja da chuun mé á. Ta viti sa najándihí da chuun natahnda nu dá cán. ²⁷ Tá naxinu coo Pablo xihín Bernabé mé ñuu Antioquía cán já najátaca da tóco ndihí na cúú cuéntá Jesús ndúu ñuu cán já nandicani da tóco ndihí ña nacaja Ndióxi xihín dá. Nandicani da ndá quiahva nasahan Ndióxi ñamaní nuú na coo naquixi chichi Israel ña ná ndiquehe na íchí cuéntá mé á. ²⁸ Ta nacandoo nahá Pablo xihín Bernabé ñuu Antioquía cán xihín na cúú cuéntá Jesús.

15

Ndítaca na sacuahá cuéntá Jesús

¹ Ta ndaja coo mé tiempo já java dataa, da naquixi chí estado Judea naxinu da ñuu Antioquía cán. Ta nacasáhá na jánaha na nuú na cúú cuéntá Jesús ña ndítahan nu ná caja na ña cáchí ley Moisés ña ná chicaan na marca yiquí cuñu na já ná cuu jácacu Ndióxi na. ² Joo Pablo xihín Bernabé nacasáhá cáni táhan ndeé yúhu dá xihín na Judea cán sahá ña yóho. Ta sahá ña nandituhún cuaha ná sahá ña yóho sahá ña cán quea nasacu ini na cúú cuéntá Jesús cán chindahá na Pablo xihín Bernabé

xihín java ga da cúu cuéntá Jesús ña ná cuhun na ñuu Jerusalén já ná nditúhún chága na sahá ña yóho xihín na apóstol ta xihín na sacuaḥa cómi cuéntá sahá na cúu cuéntá Jesús ndúu Jerusalén cán.

³ Anda já na cúu cuéntá Jesús ndúu Antioquía nachindahá na na cán chí naḡee na cuahan na. Ta nu xíca na cuahan na cán nayaha na chí ñundáhyi Fenicia xihín ñundáhyi Samaria. Ta cán nandicani na nuú na cúu cuéntá Jesús ndá quiahva nandiquehe na coó naquixi chichi Israel íchi cuéntá Jesús ta já najándacoo na costumbre yatá naḡaja na jihna. Chí naḡaji ndivaha ini na cúu cuéntá Jesús cán tá naḡini joḡo na ña yóho.

⁴ Tá naḡinu coo Pablo xihín Bernabé xihín java ga na cán ñuu Jerusalén já nandiquehe vaha na cúu cuéntá Jesús ndúu ñuu cán na. Ta jári na apóstol xihín na sacuaḥá veñuhu cán nandiquehe vaha na na. Anda já nandicani Pablo nuú na cán tóco ndihi ña náhnu naḡaja Ndióxi xihín dá. ⁵ Joo java na fariseo, na sa ndiquehe íchi cuéntá Jesús nandaca ndichi na já naḡasáhá cáchi na já:

—Ndítahan nuú na cúu cuéntá Jesús, na coó naquixi chichi Israel chicaan na marca yiquí cuñu na. Ta ndítahan nu mí cahan í xihín ná ña ná cacu vaha na ley Moisés —naḡachi na fariseo cán.

⁶ Anda já nataca na apóstol xihín na sacuaḥa veñuhu ña ná nditúhún na ndaja coo sahá ña yóho.

⁷ Sa nanditúhún cuahá ndivaha na cán sahá ña yóho. Anda já nandaca ndichi Pablo tañu na cán ta já naḡachi da já:

—Sa xini vaha ndó, ñani i ña naḡaxi Ndióxi yeḡe jihna ña ná caxi tuhún i tuhun vaha saḡa Jesús nuú na coó naquixi chichi Israel já ná candeé ri

ini na cán va Jesús ña ná jácaçu Ndióxi na. ⁸ Ta mé Ndióxi, mé a xíni ndaja cáa ínima in in ñayivi, mé a cán quéa najánaḥa nu yo ña ndíquehe vaḥa mé á na tóho. Jáchi naṣaḥan ínima yíi mé á nu ná tá quiahva naçaja xihín mí, na naquixi chichi Israel. ⁹ Ni in túhún toho í co cúu yo na vaḥa chága a juú ga inga na nu Ndióxi. Jáchi tá quiahva nandaja vií Ndióxi mí saḥá ña cándéé iní Jesucristo quiahva já nandaja vií ri a na cán va saḥá ña cándéé ini na Jesucristo. ¹⁰ Ta viti cúu á tátuhun nandindójó ndó ña naçaja Ndióxi tá naçindahá Jesucristo quivi a saḥá cuachí. Ta viti cúni ndó caja ndúsa ndó xihín na tóho yóho ña ná cacu vaḥa na ley Moisés. Ta sa cándaḥa ini ndó ña ni mí ta ni tásáḥnu jícó yo a cuú caja í cacu vaḥa í ley cán. ¹¹ Joo ña cándéé cáḥnu iní quéa ña jácaçu maní uun Ndióxi mí saḥá ña táḥvi ini Jesucristo saḥa mí. Ta quiahva já táḥvi ri ini a saḥá na tóho cán va —naçachi Pedro xihín ná.

¹² Ta xihín ña yóho naçatáji yúhu tóco ndihi na cán. Ta táa johó na tá naçasáḥa Pablo xihín Bernabé ndícani da nu ná tóco ndihi ña náḥnu xihín ña xitúhún ña naṣaḥan Ndióxi ñamaní nu dá caja da nuú na coo naquixi chichi Israel cán. ¹³ Tá nandihí naçahaḥan da cán já naçasáḥa Jacobo cáchi da já:

—Cuni johó ndó ná caḥan i xihín ndó, ñani i.

¹⁴ Sa naçaxi tuhún Simón, da naní tucu Pedro nu yo tá nu cuítí naçaja Ndióxi ñamaní xihín na tóho ta naçaxi a na ña ná nduu na ñayivi cuéntá mé á.

¹⁵ Ta in quiahva cáḥan ña yóho xihín ña naçahyí na profeta sanahá tá naçahyí na ña naçachi Ndióxi:

¹⁶ Tá sa nayaha tiempo já ndicó coo tucu ú. Ta tá quiahva naçaja cáḥnu ñayivi yeḥe tá tiempo naçacomí David cuéntá saḥá ñayivi Israel,

quiahva já vaxi quivi caja i ña ná caja cáhnu tucu na yehe.

17 Caja i já jáchi cúni ña ná ndinducú na tóho yehe ña ná cacuu u xitoho tóco ndihi na,

mé ná cúu ná naçaxi yehe ná cacuu na cuénta mí i.

18 Ña yóho quéa naçachi Ndióxi sanahá ndivaha tá naçaxi tuhun a ndaja coo tiempo viti — naçachi Jacobo xihín na cán.

19 Já naçachi tucu Jacobo já xihín ná:

—Sahá ña cán quéa cáhan i ña co ndítahan caja ndúsa yó xihín na tóho cacu vaha na ley Moisés jáchi naçasahá ndíco na íchi cuénta Ndióxi viti.

20 Joo ña ndítahan caja í quéa cahyí yo in carta ná cuhun a nuú na cúu cuénta Jesús ndúu ñuu Antioquía já ná caja na ñamani ña ná a cáxi na cuñu quíti, rí najoco ñayivi nuú tiniñu yúu. Ta ná a cóo na xihín na co cúu ñájhí na á yí ná. Ta coto ná a cáxi na cuñu quíti, rí nasahnú. Ta coto ná a cáxi na nji. 21 Jáchi janda sanahá najánaha na ña yóho nuú ñayivi ndijáá ñuu tá quivi ndíquehe ndée ná tá jánaha na ley Moisés nu ná ini veñuhu —naçachi Jacobo xihín ná.

22 Anda já na apóstol xihín na sacuahá veñuhu cán xihín tóco ndihi na cúu cuénta Jesús najándique táhan na tuhun na ña çaxi na tañu tóco ndihi na cúu cuénta Jesús cán java da ná cuhun ñuu Antioquía xihín Pablo xihín Bernabé. Ta da naçaxi na cuhun cúu Judas, da naní tucu Barsabás xihín Silas. Ndívi da yóho cúu da ín saha nuú na cúu cuénta Jesús cán. 23 Ta ña yóho cúu tuhun ndáa nu carta ñéhe na cán cuahan na:

“Tóco ndihi ndehe, na cúu apóstol xihín na sacuaḥa veñuhu xihín na cúu cuénta Jesús ndúu ñuu yóho chindahá nde Ndióxi coo ndóhó, na cúu cuénta Jesús, na coo naquixi chichi Israel, na ndúu ñuu Antioquía xihín ñundáhyi cuénta Siria xihín Cilicia jan. ²⁴ Sa nañehé nde tuhun ña naquee java na cúu cuénta Jesús ñuu yóho nasaa na chí jan tá coo naxica na ñamani nuú nde cuhun na. Ta najáquihvi na ndohó ta najájana na jiní ndó xihín tuhun cáhan na jáchi cáchí na xihín ndó ña ndítahan nu ndó chícaan ndó marca yiquí cuñu ndó ta ndítahan cacu vaha ndó ley Moisés já ná cuu cacu ndaa ínimá ndo. ²⁵ Sahá ña cán queá ñúhu johó ndihi nde ña ná caxi nde java ñaní já ná catáhan da xihín Pablo xihín Bernabé saa da coto nihni da ndohó. ²⁶ Mé Pablo xihín Bernabé yóho ndúu tiaḥva da quivi da saḥa Jesucristo, mé a cúu xitoho í. ²⁷ Ta chindahá nde Judas xihín Silas já ná cahan yúhu mé ná xihín ndo já ná ndicani na saḥa tóco ndihi ña yóho nu ndo. ²⁸ Mé ínimá yii Ndióxi najácahan ndehe ña co ndítahan nuú nde caja ndúsa nde xihín ndó cacu vaha ndó tóco ndihi ña sáhdá ley Moisés. Joo ná cahan nde xihín ndo ndía queá co ndítahan caja ndó: ²⁹ Coto a cáxí ndó cuñu quítí, rí najoco na nuú tiniñu yúu. Ta coto a cáxí ndo nii ta a cáxí ndó cuñu quítí, rí nasahnú. Ta coto a cóo ndó xihín ñájíhí á yí inga na. Tá ná cacu vaha ndó tóco ndihi ña yóho já queá cúu ndó na cája vaha. Ña yóho cúu tuhun cáhan nde xihín ndo ta ná coo Ndióxi xihín ndo.” Ña yóho cáchí carta nachindahá na nuú na ñuu Antioquía cán.

³⁰ Anda já naquee na cán cuahan na ñuu An-

tioquía. Ta tá naxinu na ñuu Antioquía cán já najátaca na tóco ndihi na cúu cuéntá Jesús cán já nandiquiahva na carta nu ná. ³¹ Ta tá nandihí nācahvi na cúu cuéntá Jesús mé carta já nācajii ndivaha ini na jáchi nandindeé chága ví ini na nācāja ña cáchí carta cán. ³² Mé Judas xihín Silas cúu da profeta, da jáyaha tuhun cáhan Ndióxi nuú ñayivi. Ta xihín ña yóho nasahan da cuahá tuhun ndeé ini na cúu cuéntá Jesús. ³³ Nasanduu na cán chá quivi ta chí nasacu ini Judas xihín Silas ndicó coo da ñuu Jerusalén jáchi cán ndúu na nāchindahá ñahá ñuu Antioquía. Já nandindayí na cúu cuéntá Jesús da ña ná coo vaha da tá cūhun da íchi. ³⁴ Joo nasacu ini Silas candoo da ñuu Antioquía cán. ³⁵ Ta nācandoo Pablo xihín Bernabé chága quivi ñuu Antioquía cán ta xihín cuahá java ga na najánaha chága na tuhun vaha saha Jesús nuú ñayivi.

Cuahan tucu Pablo cahan da tuhun vaha saha Jesús nuú ñayivi

³⁶ Tá nayaha quivi já nācachi Pablo já xihín Bernabé:

—Cóho coto nihní na cúu cuéntá Jesús ndúu ndi-jáá ñuu nuú naxica nuu í nācahan yó tuhun Ndióxi jihna já ná candehé yo á ndicó yii va na Jesús — nācachi da.

³⁷ Cándúsa Bernabé cūhun da joo cúni da candaca tucu da Juan, da cáhan na Marcos xihín ña cūhun da xihín ná. ³⁸ Joo Pablo nācāhán da ña vaha chága ná a cáñehe na da cūhun da xihín ná jáchi najándacoo da na tá naxinu na estado Panfilia sahá ña cóo nāxeen ga da caca nuu da caja da chuun Ndióxi xihín ná. ³⁹ Nānditúhún cuaha ná

sahá ña yóho joo coó nandique táhan tuhun na sahá ña cán queá nashnda táhan na. Sahá ña cán queá ñañehe Bernabé Marcos cuahan xihin dá chí isla Chipre. ⁴⁰ Ta ñaxaxi Pablo Silas candaca táhan xihin dá. Ta ñaxica tahví ña cúú cuéntá Jesús nu Ndióxi saha dá ña ná chindeé a da nuú cuhun da. Anda já ñaquee da cuahan da. ⁴¹ Nayaha da chí ñundáhyi Siria xihin ñundáhyi Cilicia ta níú cúú nuú cuahan da sahan da tuhun ndeé ini ña cúú cuéntá Jesús ña ná candeé chága ini na mé á.

16

Cátahan Timoteo xica da xihin Pablo xihin Silas

¹ Ta nayaha Pablo xihin Silas ñuu Derbe anda já ñaxinu coo na ñuu Listra. Ta cán nandiñehe ná in da cúú cuéntá Jesús, naní Timoteo, da cúú jahyi in ña cúú cuéntá Jesús, ña ñaquixi chichi Israel. Ta tátá da cúú griego. ² Ta ña cúú cuéntá Jesús ndúu ñuu Listra xihin ña ndúu ñuu Iconio ñacahan vaha na saha Timoteo. ³ Cúni Pablo ña ná catáhan Timoteo xihin dá caca nuu da xihin dá sahá ña cán queá ñacaja Pablo ña ñachicaan ña marca yiquí cuñu Timoteo tá quiahva cáchí ley Moisés já ná a cahan núu ña Israel ndúu ndijáá ñuu válí cán saha dá. Jáchi sa xini vaha ndihi ña cán ña cúú Timoteo jahyi in ña griego sahá ña cán queá coo ñachicaan ña marca Timoteo tá loho chá da. ⁴ Ta já ñaquee ndihi na cán cuahan ña ta níú cúú ñuu nu xica na cuahan ña cáxi tuhun na nuú ña cúú cuéntá Jesús ña ná caha na ña ñacachi ña sacuahá xihin ña apóstol ndúu ñuu Jerusalén cán. ⁵ Xihin ña yóho nandindacú chága ña cúú cuéntá Jesús ta candeé

cáhn̄u chága ini na mé á. Ta in in quiv̄i yáha joho ndícuah̄a chága ñayivi ndíhvi íchi cuéntá Jesús.

Ña naxini Pablo nacija Ndióxi tá nasah̄iin da ñuu Troas

⁶ Ta nasaji ínim̄a yii Ndióxi na cán ña ná a cúhun na estado Asia cahan na tuhun vaha saha Jesús nuú ñayivi cán. Sahá ña cán quéa nayaha na ñundáhyi cuéntá Frigia xihín Galacia cuahan na. ⁷ Já naxinu coo na yúhu estado Misia. Ta chí cán yaha na cūhun na ñundáhyi cuéntá Bitinia nacañan na. Joo coó nasahan ínim̄a yii Ndióxi ñaman̄i nu ná caja na ña. ⁸ Anda já nayaha saa na estado Misia janda quiahva naxinu coo na in ñuu naní Troas. ⁹ Ta in ñuú nani ín da mé ñuu Troas cán nasani ndímáhnú Pablo. Ta ña naxini da cúu in ta, da naquixi chí estado Macedonia. Ta cándichi da cahan ndahví da xihin Pablo já cáchi da já: “Naha ndó chí Macedonia yóho ña ná chindeé ndó ndehe.” ¹⁰ Tá nandicani Pablo ña yóho nuú nde chí ivi laá nacija tiahva nde ñaha nde jáchi sa nacandaá cáxi ini nde ña mé Ndióxi quéa cána ndehe ña ná cūhun nde estado Macedonia cán já ná caxi tuhun nde tuhun vaha saha Jesús nuú ñayivi ndúu cán.

Xinu coo Pablo xihín na xica xihin dá ñuu Filipos

¹¹ Tá nandih̄i já nandaa nde barco ñuu Troas já naquee nde cuahan ndacú nde isla naní Samotracia. Ta janda quiv̄i itaan já naxinu coo nde ñuu Neápolis. ¹² Ta cán nanuu nde mé barco cuahan sahá nde chí ñuu Filipos. Mé ñuu Filipos cán cúu á ñuu ña ín chága saha nuú java ga ñuu válí ñúhu chí Macedonia cán. Ta ndíco a ñuu Roma. Ta

naṣanduu nde ñuu Filipos cán chá quiv̄i. ¹³ Ta in quiv̄i ndiquehe ndée ná já naṣanee nde cuaḥan nde yuhú ñuu yati yuhú yuta nu sá taca ñayivi xica taḥví na nu Ndióxi. Já naṣaṣoo nde cán ta naṣasáhá nde cáḥan nde tuhun vaḥa saḥa Jesús nuú najihí, na táca cán. ¹⁴ In mé ñáñáḥa cán nani ña Lidia ta cúú ñá ñá ñuu Tiatira. Mé Lidia yóho cúú ñá ñá jíco jáhma vaḥa ña color ndihí. Ta cúú ñá in ñá cája cáhnu Ndióxi. Ta nani xini johó ñá ña cáḥan Pablo saḥa Jesús já naṣuná Ndióxi xini túni ña já naṣandúsa ñá ña cáḥan Pablo cán. ¹⁵ Tá nandihí naṣandúta ña xihín na vehe ñá ta já cáchí ña já xihín nde:

—Tá ta mé a ndaa ndícuni ndó yeḥe ña cúú u cuénta Jesús caja ndó ñamaní saa ndó vehe e coo ndó —naṣachi ñá xihín nde.

Ta naṣaja ndúsa ñá xihín nde chí naṣandoo too nde vehe ñá cán.

¹⁶ Ta ndaja coo in tañu tá cuaḥan nde nu sá xica taḥví nde nu Ndióxi já nanditahan nde in ñá tacú, ñá ndácaan ínima quini ini. Ta cája ña cán ña ná ndicuni ini ñá. Mé ñá tacú yóho cúú ñá naxeen na. Ta mé xitoho ñá cán táva cuaḥa dá jiuḥún saḥa ña ndícuni ini ñá. ¹⁷ Ta mé ñá tacú yóho naṣasáhá ña ndíco ñá jata Pablo xihín jata nde ta cáyuhú cóho ña já cáchí ña já:

—Da cája cáhnu Ndióxi, ña cáhnu íin indiví cúú da cáḥan yóho. Ta xica da cáxi tuhun da xihín ndó ndá quiaḥva cuu caṣu ndaa ínima ndo —cáchí ña cáyuhú ña.

¹⁸ Já cuití já cuití cája ñá cuaḥa quiv̄i janda quiaḥva co ndée ga ini Pablo xihín ña cája ñá. Chí

nandicotó nihni Pablo nu ñá já nacachi da já xihin ínimá quini ndácaan ini ñá cán:

—Xihín quivi Jesucristo sáhdá i chuun nuun ña ná queún ini ñá loho yóho —cáchi Pablo.

Chí ivi laá naqueta ínimá quini cán cuahan.

¹⁹ Joo tá naxini na cúu xitoho ñá cán ña a cóo ga cana jiuhún na caja ñá cán já natiin na Pablo xihín Silas já ñéhe na da nasahan na vechúun nuú na jutixia. ²⁰ Tá naxinu coo na cán já nacachi na já xihín da cúu juéxe cán:

—Da naquixi chichi Israel yóho nandai cuu da jándinihi da ñayivi ñuu í. ²¹ Jáchi jánaħa da costum-bre mé va da nuú ñayivi. Ta mí a cuú candúsa í ta ni a cúu caja í costumbre da yóho jáchi cúu yó ñayivi ndíco ñuu Roma —nacachi na cán xihín juéxe.

²² Anda já nandicuita ñayivi xihín dá. Já nasahnda juéxe cán chuun ña ná tavá na jáhma Pablo xihín Silas ta ná cani na ndívi da xihín yíto.

²³ Tá nandihí nacani quini ndivaha na da já nataán na da vecaa. Ta nasahnda na chuun nuú da ndáá vecaa cán ña ná candaa vaha da da. ²⁴ Tá natahnda chuun yóho nuú da ndáá vecaa cán já nachicaan da Pablo xihín Silas janda sa véhe cuí vecaa cán. Ta já nachicaan da saħa dá tañu ivi yíto naní cepo já ná ndituun vaha da.

²⁵ Joo tátuhun java ñuu xíca tahví Pablo xihín Silas nu Ndióxi ta xíta da ña cája cáhnu da mé á nani táa johó java ga na ñúhu ini vecaa cán nu cáhan da. ²⁶ In jonáa cuití nacasáhá táan ndeé ndivaha chí janda yuu ndúhu saħa vecaa cán cánda. Anda já nanuna tóco ndihí yéhe caa cán ta nacuyu cadera nasandico tóco ndihí na nasañuhu vecaa cán.

²⁷ Anda já nandicaxí ini da ndáá vecaa cán ta tá

naxini da núná yéhé c̄aa cán já natuhun da yuchú cáni dá ña cahní da mé dá jáchi n̄acahán da sa n̄aquee ndihi n̄a n̄asañuhu vec̄aa cán cuah̄an n̄a.
 28 Joo n̄acayuhú Pablo nu dá já n̄acachi Pablo já xih̄in dá:

—A cáhni tohún yohó jáchi yóho ndúu ndihi va nde.

29 Anda já n̄axica da ndáa vec̄aa cán in lámpara já xínu da n̄andih̄vi da nu ndúu na vec̄aa. Ta chí quiji mé dá xih̄in ña yih̄vi da já n̄acaxítí da nu Pablo xih̄in nu Silas. 30 Tá n̄andih̄i já natavá da n̄a já n̄acasáhá ndáca tuhún da n̄a já n̄acachi da já:

—Ndía ndítahan caja i já ná jác̄acu ndaa Ndióxi ínim̄a i —n̄acachi da.

31 Anda já n̄anducú ñehe Pablo xih̄in Silas tuhun nu dá já cáhí da já xih̄in dá:

—Ndítahan candúsún Jesucristo, xitoho í já ná cac̄u ndaa ínim̄un xih̄in ínim̄a tóco ndihi n̄a vehún —n̄acachi da.

32 Anda já n̄acasáhá Pablo ndícani da tuhun vaha saha Jesús nuú da cán xih̄in nu tóco ndihi n̄a ndúu vehe da cán. 33 Ta mé hora já n̄acaja tátá da ndáa vec̄aa cán nuú n̄andicuehe jata Pablo xih̄in jata Silas nuú n̄acani yító cán. Ta tá n̄andih̄i já n̄acandúta da ndáa vec̄aa cán xih̄in tóco ndihi n̄a vehe da. 34 Tá n̄andih̄i já ndáca da Pablo xih̄in Silas n̄asah̄an da xih̄in dá vehe da. Ta cán n̄acaja ndíví n̄a ña cuxu Pablo xih̄in Silas. Ta chí n̄acajii ndivaha ini da ndáa vec̄aa cán xih̄in n̄a vehe da jáchi sa n̄andiquehe na íchi cuéntá Jesús.

35 Ta naha inga quiví itaan já n̄achindahá n̄a cúu juéxe cán policia nuú da ndáa vec̄aa cán ña ná janí

da Pablo xihin Silas vecaa. ³⁶ Anda já nacachi da ndáá vecaa cán já xihin Pablo:

—Nasahnda na cúú juéxe chuun nuú i ña ná janí i ndohó cuhun ndo. Sahá ña cán quea cáxi tuhun i xihin ndó cuáhán quee ndó ta ná cuhun Ndióxi xihin ndo —nacachi da xihin dá.

³⁷ Joo nacahan Pablo xihín da cúú policia cán já nacachi da já xihin ná:

—A váha toho nacaja na xihín nde jáchi cúú nde na romano ta na jutixia jan nacani quini na ndehe nu táhyí tóco ndihi ñayivi tá camaní caja vií na sahá nde. Ta tá nandihí já nataán jíin ga na ndehe vecaa. Ta viti cúni na janí jehé na ndehe quee nde cuhun nde. Joo a váha toho cája na já. Sahá ña cán quea a queta nde janda quiahva ná quixi mé ná tavá na ndehe já quee nde —nacachi Pablo xihin da cúú policia cán.

³⁸ Anda já nasahan na cúú policia nandicani na nuú na cúú juéxe ña nacachi Pablo xihin ná. Tá nacandaa ini na cúú juéxe cán ña cúú Pablo xihin Silas da romano chí nayihví na. ³⁹ Anda já nasahan na naxica na ñamaní nu Pablo xihín nu Silas ña ná caja cáhnu ini da sahá ña nacaja na. Já natavá na da vecaa ta tá nandihí já naxica na ñamaní nu dá ña ná quee da ñuu cán cuhun da. ⁴⁰ Tá naquee Pablo xihin Silas vecaa já nasahan na vehe ña naní Lidia. Ta tá nandihí nandique táhan da xihín na cúú cuéntá Jesús ndúu cán já nasahan da tuhun ndéé ini na anda já naquee da cuahan da.

17

Ndínihí ñayivi ñuu Tesalónica

¹ Nani xíca Pablo xihín Silas cuahan da íchi nayaha da chí ñuu naní Anfípolis xihín inga ñuu naní Apolonia anda quiahva naxinu coo na ñuu Tesalónica. Cán nasahin veñuhu nu táca na Israel. ² Ta sahá ña naçaan Pablo sahan da veñuhu quivi ndíquehe ndée ná sahá ña cán quéa naquihvi da veñuhu cán. Ta tixi uní semana naçahan da tuhun Ndióxi xihín ná mé quivi ndíquehe ndée ná. ³ Ta nu libro yii Ndióxi tává Pablo tuhun ndícani da nu ná ña nditahan nuú Jesucristo ndoho ini a. Ta tá sa nandihí naxihí a já nditacu a jáchi já cáchi libro yii Ndióxi coo. Já naçachi Pablo já xihín ná:

—Mé Jesús, mé a cahan i saha nu ndo yóho, mé a yóho cúu Cristo, ña naçindahá Ndióxi cacomí cuénta sahá ñayivi —naçachi Pablo.

⁴ Ta chí naçandúsa java na Israel ña naçachi Pablo xihín ná. Anda já naçatáhan na xihín Pablo xihín Silas xíca nuu na. Ta cuahá ri na griego, na sa cája cáhnu Ndióxi ndúu cán naçandúsa na ña naçachi Pablo xihín ná. Ta naçandúsa ri cuahá najihí, na ín toní ñúhú ñayivi xihín ta nandihvi na íchi cuénta Jesús. ⁵ Joo na Israel, na co cándúsa Jesús naçasáhá cáhiví ini na. Sahá ña cán quéa najátaca na java taq quini, da coó chuun nu xíca nuu mé cáyé cán. Já naçasáhá na jándinihi na ñayivi mé ñuu Tesalónica cán. Anda já cáti na nasahan na vehe in da naní Jasón. Ta xihín ña ndúsa naquihvi na vehe da cán ña ndínducú na Pablo xihín Silas ña tavá na da ndíquiahva na da nuú na sacuahá ñuu cán. ⁶ Joo coó nandíñehe ná Pablo xihín Silas cán sahá ña cán quéa janda mé Jasón, da xihín ñaha vehe cán ñúhu na da xihín java ga na cúu cuénta Jesús cuahan na nuú na jutixia ñuu cán. Tá nandihí já cáyuhú na já

cáchí nā já xihín nā jutixia cán:

—Da naní Pablo xihín da naní Silas xíca nuu da níí cúú ñuyiví jájana da jiní ñayivi. Ta quiahva já cúni da caja da xihín ñayivi ñuu í. ⁷ Ta da naní Jasón yóho nandiquehe vaha da da cán vehe da. Ta xihín ña cája nā yóho náha ña co cája na ña sáhdá ley ñuu Roma ta ni co cája cáhnu na da cómi cuéntá sahá ñuu Roma. Jáchi mé nā yóho xíca na cáhan nā ña ín inga da cómi cuéntá sahá ñayivi. Ta cáchí nā cúú dá in da naní Jesús —nācachi na.

⁸ Tá naxini johō ñayivi xihín nā jutixia cán ña yóho chí nācasáhá nā ndívaā nā. ⁹ Joo nāchahvi Jasón xihín java nā cúú cuéntá Jesús cán jiuhún nuú nā jutixia cán já najaní ñahá nā.

Cuahān Pablo xihín Silas ñuu Berea

¹⁰ Ta tá sa nācuaá mé ñuu já nāchindahá nā cúú cuéntá Jesús cán Pablo xihín Silas já ná cuhun da chí ñuu Berea. Ta tá naxinu coo da ñuu Berea cán já nandihvi da veñuhu nā Israel cán. ¹¹ Ta nasuná chága nā Israel cán ínimā ná a juú ga nā ndúu ñuu Tesalónica chí cájií íní nā nandiquehe na tuhun Ndióxi. Ta ndijáá níí quiví ndínducú nā nuú tuhun Ndióxi ña á mé a ndaa cúú ña jánaḥa Pablo nu ná. ¹² Ta cuahā táhan nā naquixi chichi Israel cán nandiquehe na íchi cuéntá Jesús. Ta cuahá najihí griego, nā tácu ini nación cán xihín cuahá nataa griego nandiquehe na íchi cuéntá Jesús. ¹³ Joo tá nañehé nā Israel ñuu Tesalónica tuhun ña ín Pablo ñuu Berea cáhan da tuhun Ndióxi nuú ñayivi chí ivi laá nasahan nā jándinihi na ñayivi ñuu Berea cán já ná ndicuiṭa na xihín Pablo. ¹⁴ Joo ivi laá nā cúú cuéntá Jesús cán nāchindahá nā Pablo cuahān

da yati yuhú tañuhú nani naçandoo Silas xihin Timoteo ñuu Berea cán. ¹⁵ Ta java na cúu cuéntá Jesús ndáca na Pablo ta nañañe na da janda ñuu Atenas. Ta tá nandicó coo na cán ñuu Berea já ñehe na chuun ña ná cuhun quíj Silas xihin Timoteo ñuu Atenas ná ndique táhan da xihin Pablo.

Íin Pablo ñuu Atenas

¹⁶ Nani ndáti Pablo xinu coo Silas xihin Timoteo ñuu Atenas cán já naçasáhá ndíhi ini da jáchi níi cúu ñuu cán naçhutú ndaa xihín cuahá tiniñu yúu ndícahán ñayivi ñuu cán. ¹⁷ Sahá ña cán quea naçasáhá Pablo cáhan da tuhun Ndióxi xihín na Israel ini veñuhu na. Ta quiahva já naçahan ri da tuhun Ndióxi xihín java na tóho, na cája cáhnu Ndióxi cán. Ta jári ndijáá níi quivi cáhan da tuhun Ndióxi xihín ñayivi táca nuú yahvi ñuu cán. ¹⁸ Ta java ña, da jácuaha íchi cuéntá Epicureos xihín da jácuaha íchi cuéntá Estoicos naçasáhá ndítuhún na xihin Pablo. Joo java na cán cáchi na saha Pablo ña cuahá ndivaha cáhan da ta co cándaa ini na ndá quea cáhan da. Ta java na cáchi na já saha dá:

—Á tá coo ta java ga ndióxi xíca nuu da cáhan da saha —cáchi na.

Naçachi na ña yóho saha Pablo jáchi naxica nuu mé dá cáhan da tuhun vaha saha Jesús ta cáhan da ña nanditacu tucu Jesús. ¹⁹ Sahá ña cán quea ndáca na Pablo cuahan ná in nuú nani Areópago jáchi cán cúu nu ndítaca ñayivi ndítuhún na. Ta tá naxinu coo Pablo cán já naçasáhá ndáca tuhún na da já cáchi na já xihin dá:

—Á cajún ñamaní caxi tuhún xihín nde ndá cúu ña saá ña xícún jánahún nuú ñayivi. ²⁰ Jáchi

sa ñañehé nde tuhun ña cátóntó ñayivi xihín ña jánahún nu ná ta viti cúni nde candaá ini nde ndía queá jánahún nu ná —ñacachi na xihín Pablo.

²¹ Ñacachi na já xihín Pablo jáchi tóco ndihi ñayivi Atenas xihín na tóho ndúu cán ndijáá níi quivi ndinuhu ini na ndítúhún na ñaha saá, ña ñaxini johó na jánahá inga na.

²² Anda já ñacandichi Pablo tañu na ndúu mé nuú naní Areópago cán já ñacachi da já xihín ná:

—Candehé ndó, ñayivi ñuu Atenas. Cándaa cáxi ini i ña cúu ndó ñayivi cátóo ndicahán cuahá nuú tiniñu yúu, ña cúu ndióxi ndo ta ndicahán ndó ña xihín ndinuhu ini ndó. ²³ Jáchi tá xíca nuu i ñuu ndó já ñaxini i cuahá nunáa nu cája cáhnu ndó ña. Ta nu xíca nuu i cán ñaxini i inga nunáa. Ta nunáa cán ndáa in tuhun ta cáchi a: “Náa yóho cúu nu ndicahán nde ndióxi co xíni nde”, já ñaxini i cáchi a. Ta vatí co xíni ndó Ndióxi ndicahán ndo cán joo cája cáhnu ndó ña. Ta mé Ndióxi cán queá cúni cahan i saha nu ndó viti.

²⁴ Mé Ndióxi cán queá ñacavaha ñuyívi xihín tóco ndihi ñaha ín ñuyívi yóho. Ta mé á cómi a cuénta sahá indivi xihín ñuyívi. Ta co ndácaan toho mé á ini veñuhu ña ñacavaha ndahá ñayivi.

²⁵ Ta ni co xíni ñúhú a chindeé ñayivi mé á jáchi sa mé á queá cája ña ná catacu mí. Mé Ndióxi queá sahan tachí yó nu yo ta mé á sahan tóco ndihi ñaha nu yo.

²⁶ Mé Ndióxi cán ñacavaha in ta nu cuítí. Ta tóco ndihi ñayivi ndúu ñuyívi ñaquixi na chichi mé ta, da ñacavaha Ndióxi cán. Tá ñandihí já najándicuita nuu Ndióxi ñayivi ñaquixi chichi da cán níi cúu ñuyívi já ñatahnda in in nación canduu

a. Ta sa nasacu ini Ndióxi ndaja tiempo canduu in in nación ñuyívi yóho ta nasacu ini mé á ndáchí coo in in nación. ²⁷ Já naçaja Ndióxi jáchi cúni a ña ná ndinducú ñayivi mé á ta já ná ndiñehe ná íchi cuéntá mé á. Joo mé a ndaa yati va ín Ndióxi nu tóco ndihi ñayivi. ²⁸ Jáchi mé á cája ña ná catacú ta ná canda yiquí cuñu í. Sanahá naçachi java ta cuéntá mé ndó já: “Cúu yó na vehe Ndióxi.” ²⁹ Joo tá mé a ndaa cúu yó na vehe Ndióxi co ndítahan cahán yo ña Ndióxi cúu tiniñu yúu ña najándicuchu na xihín jiuñun cuáán á xihín jiuñun cúxú. Ta ni co ndítahan cahán yo ña Ndióxi cúu tiniñu yúu cávaha ndahá ñayivi xihín yuu. Jáchi jiní mé va na jan cána ña cávaha na. ³⁰ Jihna nasacu ini Ndióxi ña a jándoho toho a ini ñayivi sahá cuachi nasacaja na jáchi co cándaa ini na ña cúni mé á, nduu. Joo viti sáhdá Ndióxi chuun nu tóco ndihi ñayivi ña ná ndicó coo ini na ta ná a cája cáhnu ga na tiniñu yúu. ³¹ Jáchi sa nasacu Ndióxi in quiví caja vií a saha tóco ndihi ñayivi ndúu ñuyívi yóho. Ta sa naçaxi mé á Jesús ña caja vií ndaa mé á saha ná. Ta najánditacu tucu Ndióxi Jesús tá nandihí nañihí a. Ta xihín ña yóho nanaha nuú ñayivi ña mé a ndaa caja vií Jesús saha ná —naçachi Pablo xihín ndihi na cán.

³² Tá nañini joho na cán ña cáchí Pablo ña vaxi quiví nditacu ndji já naçasahá java na cán sácu ndaa na da. Joo java na cáchí na já xihín dá:

—Vaha chága ná cahún sahá ña jan nuú nde inga tañu —cáchí na xihín dá.

³³ Anda já naquee Pablo nu Areópago cán cuahan da. ³⁴ Joo java ñayivi, na naçandúsa ña

cáchí dā nacasáhá ndíco nā dā xíca na. Tañu nā cán nasandacaan in dā naní Dionisio, dā cúú táhan nā ndítaca Areópago cán. Ta tañu nā nacandúsa cán ndácaan ri in ñáñáha naní Dámaris. Ta jári java chága nā cándúsa nandihvi na íchi cuéntá Jesús.

18

Xínu coo Pablo ñuu Corinto

¹ Tá nandihí já naquee Pablo ñuu Atenas cán já cuahān dā chí ñuu Corinto. ² Ta mé cán nandique táhan da xihín in dā Israel naní Aquila, dā nasacuu estado Ponto. Ta jacá cúu saá va naxinu coo Aquila ñuu Corinto cán xihin ñájíhí dā, ñá naní Priscila. Ta ndíví nā yóho sá naquee na ñuu Roma ndácaan nación Italia jáchi Claudio, dā cómí cuéntá sahá nā ñuu Roma cán nasahnda dā chuun ñā ná quee ndihí nā Israel cuhun nā. Ñā cán queā naxinu Aquila xihin ñájíhí dā ñuu Corinto cán. Andā já nasahan Pablo naxito nihni da nā nu ndúu nā cán. ³ Ta nacandoo Pablo vehe nā cán cája chúun da xihin ná jáchi sá mé chuun ñā cája nā cán tiahva ri dā cán va. Ta chuun nasacaja na queā cávaha na vehe lona, ñā ndeé. ⁴ Ta tá xínu coo quivi ndíquehe ndéé ná já sahan dā veñuhu nā Israel cahan dā tuhun Ndióxi xihin ná. Ta já najaxinu dā ini nā Israel xihin nā tóho já nacasáhá nā cándúsa na Jesús.

⁵ Ta ndaja coo najándacoo Silas xihin Timoteo estado Macedonia ta naxinu coo na ñuu Corinto cán. Andā jáví najándacoo Pablo chuun cája dā cán já nacasáhá dā ndúcú ndéé chága dā cahan dā tuhun Ndióxi nuú ñayivi. Ta cáxí táhyí cahan dā

xihín na naquixi chichi Israel ña mé Jesús cúú á ña ndáti na chindahá Ndióxi quixi. ⁶ Joo na naquixi chichi Israel cán coó nandiquehe na tuhun cáhan Pablo ta nacasáhá canahá na xihín dá ta cáhan núu na saha Jesús. Anda já naquiji nihni Pablo jáhma dá já ná candaá ini na ña co ndójo ga da cuachi sahá na Israel cán ta já nacachi da já xihín ná:

—Tá ná cuhun ndó indayá ta cómi mé va ndó cuachi sahá. Joo yehe co ndójo ga i cuachi saha ndo jáchi sa nacahan i tuhun Ndióxi xihín ndo ta co cúní ndó cándúsa ndó ña. Viti xihín chí nuu cuhun i cáhan i tuhun vaha saha Jesús nuú na coó naquixi chichi Israel —nacachi Pablo xihín ná.

⁷ Já naqueta da veñuhu na cán cuahan da. Já nasaa da vehe in da naní Justo, da cája cáhnu Ndióxi. Ta yati jín veñuhu cán íin vehe da. ⁸ Ta in da naní Crispo, da sáhdá chuun veñuhu cán nacandúsa da Jesús, xitoho í xihín tóco ndihi na vehe da. Ta cuaha táhan mé na ñuu Corinto cán nandiquehe na íchi cuéntá Jesús ta nacandúta ná tá naxini johó na tuhun Ndióxi nacahan Pablo xihín ná. ⁹ Ta ndaja coo in ñuu naquixi tátuhun in sani nu Pablo ta xihín ña cán nacahan Ndióxi xihín dá já nacachi a já:

—A yíhvún cahún sahá i nuú ñayivi ta coto a catáji yuhun cahan chágun xihín ná saha i. ¹⁰ Jáchi íin vi xuhun ta ni in na a cúu tiin yohó ña ná caja xíxi na xuhun. Jáchi sa ndúu cuahá ndivaha ñayivi ñuu yóho, na cacuu cuéntá mí i —nacachi Ndióxi xihín dá.

¹¹ Sahá ña cán queá nasahjin tóo Pablo in cuia java ñuu Corinto cán ta najánaaha da tuhun Ndióxi nuú ñayivi cán.

¹² Joo mé tiempo cán naçasáhá cómi in da naní Galión cuéntá sahá ñayivi estado Acaya nu ndácaan ñuu Corinto cán. Já nandique táhan ndihi na Israel ña cúni na caja xíxi na xihín Pablo chí natiin na da já ñéhe na da cuahan da vechúun. ¹³ Ta mé cán naçasáhá cáchi na já xihín da cúu gobernador cán:

—Da naní Pablo yóho xíca da jácahan da ñayivi ña ndítahan nu ná caja cáhnu na Ndióxi ta co sáhdá ley yo cája í já —cáchi na cán xihín gobernador.

¹⁴ Anda já ndúcú Pablo candichi da cahan da joo mé Galión cán naçasáhá cáchi da já xihín na Israel cán:

—Tá cuachi ndeé ná caja da yóho já quéa cuu cuni johó i nu cáhan ndo ná ndaja ndichi i saha dá, nduu. ¹⁵ Joo co cúni toho i caja vií sahá ña jan jáchi cúu á sahá tuhun cáhan ndo xihín sahá quivi ñayivi Israel xihín saha ley mé va ndó ña cán quéa vaha chága ná caja vií mé va ndó sahá ña yóho —naçachi da cúu gobernador cán xihín ná.

¹⁶ Tá nandihí já natavá da na Israel vechúun cán. ¹⁷ Anda já natiin tóco ndihí na griego cán da naní Sóstenes, da sáhdá chuun veñuhu cán. Ta natiin na da mé nu táhyí mé da cúu gobernador cán naçani na da. Joo coó naçahní toho Galión mé dá sahá ña naçaja na.

Ndícó coo tucu Pablo chí Antioquía

¹⁸ Cuahá va quivi naçandoo too chága Pablo ñuu Corinto cán. Anda já nandindayí da na cúu cuéntá Jesús ndúu cán já naçuee da cuahan da ñundáhyi cuéntá Siria. Ta ndáca da Aquila xihín Priscila cuahan na xihín dá. Ta tá naxinu da ñuu Cencrea

tá cámanj ndaa da barco cuhun chága da chí nuu já najatá lahla da jini dá já ná xinu coo nuú tūhun naçahan da. ¹⁹ Ta tá naxinu coo da ñuu Efeso xihín na ndáca táhan xihín dá cán já najándacoo da Priscila xihín Aquila. Ta naquee da cuahan da chí veñuhu ñuu Efeso cán nuú naçahan da tūhun Ndióxi nuú na Israel, na táca cán. ²⁰ Tá nandihí já naçasáhá cáhan ndahví na Israel cán xihín Pablo ña ná candoo too da chága quiví xihín ná. Joo coo naxeen toho da. ²¹ Ña naçaja da quéa nandindayí da na já naçachi da já xihín ná:

—Ndítahan cuhun i coo i Jerusalén jáchi sa nandindaa quiví vaxi víco. Joo ndicó coo tucu u coto nihni i ndohó tá cúni Ndióxi —naçachi Pablo xihín ná.

Tá nandihí já nandaa da barco naquee da ñuu Efeso. ²² Ta tá naxinu coo da ñuu Cesarea já naquee da cuahan da chí ñuu Jerusalén çahan Ndióxi da xihín na cúu cuéntá Jesús ndúu cán. Tá nandihí já naquee da cuahan da chí inga ñuu naní Antioquía. ²³ Ta tá nandihí nasahiin da chá quiví cán já naquee tucu da cuahan da tá in tá in ñuu válí ñúhu chí estado Galacia xihín estado Frigia ña quiahva da tūhun ndeé ini na cúu cuéntá Jesús ndúu cán.

Cáhan Apolos tūhun Ndióxi nuú na ñuu Efeso

²⁴ Mé tañu já naxinu coo in da naquixi chichi Israel naní Apolos mé ñuu Efeso cán. Mé Apolos yóho cúu dá da naçacu ñuu Alejandría. Ta cúu dá in da tiahva vaha tūhun Ndióxi ta tiahva vaha da jánaħa da ña nuú ñayivi. ²⁵ Mé Apolos yóho sa najácuaha vaha da íchi cuéntá Jesús, xitoho í

ta xihín ndinuhu ini da cáhan da saha mé á nuú ñayivi. Ta cáxí táhyí jánaha da saha Jesús nu ná. Ta naçahan da xihín ná ña ndítahan candúta ñayivi tá quiahva najácandúta Juan ñayivi jihna. Joo co xíni vaha da tóco ndihi ña najánaha Jesús. ²⁶ Chí já naquihvi mé Apolos veñuhu cán çahan da tuhun Ndióxi xihín ñayivi jáchi co yíhvi da çahan da xihín ná. Ta ndaja coo naixiní johó Priscila xihín Aquila nu cáhan da. Ta tá nandihí já ñéhe na da cuahan na já nandicani vaha chága na nu dá ndaja íin íchi cuéntá Ndióxi. ²⁷ Ta tá nasacu ini Apolos çuhun da chí estado Acaya já nachindeé na cúu cuéntá Jesús da já ná cuu çuhun vaha da. Ta naçahyí na in carta nasahan na nu dá ná quiahva da ña nuú na cúu cuéntá Jesús ndúu cán já quéa ná ndiquehe vaha na da. Ta tá naxinu coo Apolos yóho estado Acaya cán nachindeé cuahá ndivaha da na cúu cuéntá Jesús, na naçandeé ini mé á sahá ña natahvi ini Ndióxi saha ná. ²⁸ Ta nu cáxí táhyí ndihi ñayivi nanaha da ña a juú ña ndaa cúu ña jánaha na Israel nuú ñayivi. Ta xihín tuhun Ndióxi nanaha da nu ná ña mé Jesús cúu Cristo, mé a nachindahá Ndióxi cacomí cuéntá sahá ñayivi.

19

Tá íin Pablo ñuu Efeso

¹ Ta nani íin Apolos ñuu Corinto cán já nayaha Pablo chí yúcu janda quiahva naxinu coo da ñuu Efeso. Ta cán nandíñehe dá java na cúu cuéntá Jesús. ² Já nandaca tuhún da na já naçachi da já xihín ná:

—Á nandicutú ndaa ínimā ndo xih̄in ínimā yii Ndióxi tá ñacandúsa ndó Jesús —ñacachi da xih̄in ná.

Já nanducú ñehe ña cán tuhun nu dá já cáchí ña já xih̄in dá:

—Chí a ñáha mé va candaa ini nde saha ínimā yii Ndióxi jan —ñacachi ña cán xih̄in Pablo.

³ Andā já ñandaça tuhún Pablo ña já cáchí ña já xih̄in ná:

—Ndaja vaha ñacandúta ndo, dá já.

Andā já nanducú ñehe ña cán tuhun nu dá já ñacachi na já:

—Ñacandúta nde tá quiahva najánaha Juan —ñacachi na.

⁴ Andā já ñacachi tucu Pablo já xih̄in ná:

—Najácandúta Juan ñayivi já ná ñaha ña nuú ñayivi ña nandijama na ta co cája ga ña cuachi ñasacaja na jihna. Joo ñacahan Juan xih̄in ná ña ndítahan nu ná candúsa na inga ña vaxi jata dá. Ta ña ñacahan Juan cán saha cúu Jesús, mé a ñachindahá Ndióxi cacomí cuéntá sahá ñayivi —ñacachi Pablo xih̄in ná.

⁵ Tá ñaxini joho ña cán ña ñacachi Pablo xih̄in ná chí ivi laá ñacandúta ná cuéntá Jesús, mé a cúu xitoho í. ⁶ Ta tá ñachojó Pablo ndáha dá jini ná já ñaxinu ínimā yii Ndióxi najándicutú a ini na. Andā já ñacasáhá ña ndícahan ña inga tuhun ña coó ñasatiahva na. Ta jáyaha na tuhun ñacahan Ndióxi nuú ña ndúu cán. ⁷ Ta tixi ndihi ña cán cúu ná tátuhun uxu ivi ña.

⁸ Ta tixi uní yoo ñasahjin Pablo ñuu cán sahan ña veñuhu jánaha ña saha Jesús nuú ñayivi xih̄in ndinuhu ini da. Ta jáxinu ña ini ñayivi ña ná

ndihvi na íchi cuéntá Jesús já cuu cacomí mé á cuéntá saha ná. ⁹ Joo java na cán sáá ini na ta coó naxeen na candúsa na nu cáhan da. Ña nacaja na quéa nacasáhá cáhan núu na sahá tuhun vaha cáhan saha Jesús nuú ñayivi. Sahá ña cán quéa natavá xoo Pablo na cúu cuéntá Jesús tañu na cán já nasahan ndaca da na in vehe escuela nu in in da naní Tiranno ta cán jánaha Pablo tuhun Ndióxi nu ná ndijáá ní quivi. ¹⁰ Já nasacaja Pablo tixi ivi cuia ta xihín ña caja da naxini johu ndihi na ndúu estado Asia tuhun vaha saha Jesús, xitoho í. Ta na naxini johu tuhun Ndióxi cán cúu ná na naquixi chichi Israel xihín na tóho viti. ¹¹ Ta nacaja Ndióxi ña ná cuu caja Pablo cuahá ña xituhún nuú ñayivi ndúu cán. ¹² Jáchi janda pañito á jáhma ña cáni ndaa Pablo cán ñéhe na ña cuahan na ta jácani ndaa na ña na quihvi xihin á chí ndivaha na. Ta tá ñúhu ínimá quini ini na janda rí cán quéta cuahan.

¹³ Joo java na Israel, na co cúu cuéntá Jesús xica nuu na tává na ínimá quini ñúhu ini ñayivi. Ta ndaja coo nasacu ini na caja chúun na quivi Jesús, xitoho í, ña ná tavá na ínimá quini. Já nacachi na cán já xihín ínimá quini ndacaan ini ñayivi:

—Xihín quivi Jesús ña xica nuu Pablo cáhan da saha, sáhdá nde chuun nuun ña ná queún cuhun —nacachi na cán.

¹⁴ Já nacaja ndihusa jahyi in da naní Esceva, da cúu da sacuaha nuú jutú veñuhu na Israel ndúu ñuu cán. ¹⁵ Joo tá nacachi na ña yóho xihin rí quini ñúhu ini in dataa já nanducú ñéhe rí cán tuhun nu ná já cáchi rí já:

—Xíni vi yo cúu Jesús ta xíni ri ndá da cúu Pablo

va. Joo mé ndó, co xini toho i ndohó –nacachi rí quini.

¹⁶ Tá nacachi ínima quini cán já chí ivi laá nandava dataa ndácaan ínima quini ini cán jata ndíhusa na cán ta nacaja xixi quini da xihin ná jáchi a juú quiahva ndacú da. Quini nacaja da cán xihin ná anda naxinu lahla ndihi na jata véhe ta chí a váha na nandicuehe na nacaja ínima quini cán.

¹⁷ Ta chí nacandaa ini ndihi ñayivi ndúu ñuu Efeso cán sahá ña nayaha yóho vatí cúu ná na Israel á cúu ná na tóho ñañehe ndihi na tuhun. Sahá ña cán quea nayihví na. Ta cuaha ná nacahan na ña cánu cúu quivi Jesús ña cúu xitoho í.

¹⁸ Ta cuaha táhan na cándusa Jesús cán nacasáhá na náhma na tóco ndihi cuachi nacaja na. ¹⁹ Ta cuahá na nasacuu na tají ñéhe ndihi na libro ña tají naxinu na ta nachicaan ñúhu ná ña nuú ndihi ñayivi. Tá najitá na cuénta sahá yahvi tóco ndihi libro nacayi cán naxinu a tátuhun ivi jico uxu mil jiuhun cúxú. ²⁰ Já nacasáhá xita nuu tuhun vaha saha Jesús. Ta náha ña mé a ndaa ín ndée Jesús caja tóco ndihi ñaha.

²¹ Tá sa nayaha ndihi ña yóho já nasacu ini Pablo cuhun da coto nihni da estado Macedonia xihin estado Acaya. Já quehe tucu da íchi cuhun da janda Jerusalén. Ta nacachi da ña tá sa nasahan da ñuu Jerusalén já yaha da cuhun da chí ñuu Roma.

²² Ta mé Pablo yóho nachindahá da ivi táhan da xica chindeé táhan xihin dá ña ná cuhun da chí estado Macedonia. Ta da nachindahá da cán cúu Timoteo xihin Erasto ta mé Pablo nacandoo tóo chága da estado Asia.

Ndávaa ñayivi ndúu ñuu Efeso

²³ Mé tiempo já a juú quiahva cuahá ñayivi ñuu Efeso nandivaa na sahá ña nandihvi cuahá ñayivi íchi cuéntá Jesús. ²⁴ In da naní Demetrio cúú dá da najándivaa na cán. Mé Demetrio yóho cávaha da tiniñu yúú xihín jiuñun cúxú ta mé tiniñu yúú cán ndáa tá quiahva cáa in veñuhu cuéntá Diana, ñá cúú ndióxi cája cáhnu na ñuu cán. Ta a juú quiahva vaha cána jiuñun na cája chúun xihín dá cán. ²⁵ Sahá ña cán quéa mé Demetrio yóho najátaca da tóco ndihi na cája chúun xihín dá ta najátaca ri da java ga táhan na cája mé chuun cávaha tiniñu yúú cán. Já ñacachi da já xihín ná:

—Candehé ndo, sa cánda vaha ini ndó ña vaha ndivaha cána jiuñun yo xihín chuun cája í yóho ta ndúu vaha í cája ña. ²⁶ Joo sa xíní ndo ta ñeñe mé ndó tuhun sahá da naní Pablo. Xíca nuu da cáhan da xihín ñayivi ña a juú toho ndióxi cúú ña cávaha ndahá ñayivi. Ta sa cuahá ndivaha ñayivi ñacava da jini. Ta a juú in túhún ñuu Efeso yóho cuití va jáchi sa ñacandee da ñacava da jini cuahá na ndúu chí estado Asia viti. ²⁷ Ta ihvi ndivaha cáa ña yóho jáchi cuu cahnu da nuú chuun cája í ta nu cána jiuñun yo quéa yóho. Ta janda veñuhu ndióxi yo, ñá naní Diana cuu ndihi saha vatí ní cúú cáhan vaha na saha veñuhu ñá. Joo xihín ña cája Pablo yóho tá xíca nuu da cuu casahá ñayivi cahán núu na saha Diana ta cuu casahá na candají na ñá cúú ndióxi yo, mé Diana yóho. Ta mé ñá cúú ñá ñá cáhnu ndivaha ta ñayivi ní cúú estado Asia yóho xihín ñayivi ní cúú ñuyiví cája cáhnu na ña —ñacachi Demetrio cán xihín java ga da cávaha tiniñu yúú cán.

28 Ta tá naxini joho ndihi na cán ña nacachi Demetrio chí ivi laá najaa quini na já nacayuhú na já nacachi na já:

—Cáhnú ná cacuu Diana, ñá cúú ndióxi ndícahán na Efeso.

29 Ta xihín ña yóho tóco ndihi ñayivi ñuu cán nacasáhá na ndívaá na. Sahá ña cán queá natiin na ivi dataa, da naní Gayo xihín da naní Aristarco. Ndíví da yóho cúú da da estado Macedonia ta xíca nuu da xihín Pablo. Ta mé ñayivi cán natiin na da já ñúhu na da cuahan da vehe nu ndítaca ñayivi cán. 30 Ndúcu Pablo quihvi nuu da tañu ñayivi cán ña cahan da xihín ná cúni da. Joo na cúú cuéntá Jesús cán coó naxeen na ña ná cuhun da. 31 Ta jári java na jutixia cuéntá estado Asia ndúu cán ta xíní táhan vaha xihín Pablo sahá ña cán queá nachindahá na chuun nu dá ña ná a quihvi nuu da cahan da xihín na cán. 32 Tañu nu táca ñayivi ndívaá nahá cán sa jíin sa jíin ñaha cáyuhú na ndúu na. Jáchí cuahá na nataca cán ni co xíni na ndá cuéntá queá nataca na tañu ñayivi cuaha cán. 33 Joo java ñayivi ndúu cán nandicani na ndaja cáa ña cúú cán nuú in da naní Alejandro. Ta java na Israel ndúu cán nachindahá na Alejandro já ná candichi da cahan da xihín ñayivi cán. Anda já nandiñehe Alejandro ndáha dá já ná catáji tóo yúhu ná já nacasáhá ndíquehe da sahá na cúú cuéntá Jesús. 34 Joo tá naxini ñayivi cán ña cúú Alejandro in da Israel chí ivi laá nacasáhá tóco ndihi na cán cáyuhú na já cáchí na já:

—Cáhnú ná cacuu Diana, ñá cúú ndióxi ndícahán na Efeso.

Ta coó ñacatáji na tixi ivi hora cáyuhú na mé tuhun yóho.

³⁵ Ta tá sa ñacatáji loho ñayivi já ñacasáhá da cúu da cáhyí tutu ñuu cán cáhan da xihín ñayivi já cáchí da já xihín ná:

—Candehé ndó, na Efeso. Sa cándaá ini ndihi ñayivi ndúu ñuyiví ña ndítahan nuú ñayivi ndúu ñuu Efeso candaa vaaha na veñuhu ña cúu ndióxi naní Diana. Jáchi mé ña cúu ña ña cáhnu ndivaha ta indivi ñaquixi nahná ña ñandicava nu yo. ³⁶ Ta ni in na a cúu cachi ña cáhan i ña tuhún sahá ña cán queá caja ndó ñamaní catáji ndó ta ndicani vaaha ini ndó sahá ña cúni ndó caja ndó. ³⁷ Jáchi ndíví da ndáca ndó ñacasaá ndó yóho co cája cuíhná da veñuhu Diana ta ni co cáhan núu da saha ña. ³⁸ Ta tá co táhán ini Demetrio xihín na cája chúun xihín dá sahá ña cája Pablo já ndítahan nu ná cuhun na vechúun nuú jutixia ta cán cuu ndiquehe in in na saha mé ná jáchi sahá ña cán ndúu juéxe cán caja víi na saha ñayivi. ³⁹ Joo tá inga ñaha queá cúni ndó caja víi ndó saha, xíní ñúhú nditaca ndihí já ná cuu caja víi yó sahá. ⁴⁰ Jáchi cája i cuéntá cuu chicaan na cuachi jata yo sahá ña jándicuita í ñayivi cani táhan na saha tóco ndihi ña nayaha quiví viti. Jáchi mé a ndaa co xini yo ndá tuhun nducú ñehé tá ná ndaca tuhún na mí ndá cuéntá queá ñandivaa nahá yo —ñacachi da xihín ná.

⁴¹ Tá ñandihí ñacachi da cáhyí tutu cán tuhun yóho xihín ñayivi cán já najánduta da na.

20

Cuahan Pablo estado Macedonia xihín estado Grecia

¹ Tá sa nanduta ndihi ñayivi, na nandivaa nahá cán já nacana Pablo tóco ndihi na cúu cuéntá Jesús jáchi cúni da cahan da xihin ná sahá java ñaha ña ndítahan nu ná caja na. Ta tá nandihí nacahan da xihin ná já nanumi da na ta nandindayí da na já naquee da cuahan da chí Macedonia. ² Níí cúu estado Macedonia cán naxica nuu da sahan da tuhun ndéé ini na cúu cuéntá Jesús xihin tuhun cahan da. Tá nandihí já naquee da cuahan da ta naxinu da chí estado Grecia. ³ Ta nacando da cán tixi uní yoo. Ta tá ja chá quehe da barco cuhun da chí ñundáhyi cuéntá Siria já nañehe dá tuhun ña sácu ini na Israel cán cahní na da. Sahá ña cán quéa nasacu ini da ña vaha chága ná cuhun sahá da já ná yaha tucu da chí Macedonia. ⁴ Ta ndáca táhan java na cúu cuéntá Jesús cuahan na xihin Pablo. Ta na cán cúu na yóho: in da naní Sópater, da ñuu Berea xihin Aristarco xihin Segundo, da ñuu Tesalónica xihin Gayo, da ñuu Derbe xihin Timoteo. Ta tañu na cán cuahan ri Tíquico xihin Trófimo, da naquixi estado Asia. ⁵ Tóco ndihi na ndáca táhan xihin Pablo yóho nasahan cuéé na chinu candati na ndehe ñuu Troas. ⁶ Joo ndehe, da cúu Pablo xihin Lucas tá sa nayaha víco tá xíxi na pan ña co cáva táhan yusá naxaa xihin já nandaa nde barco ñuu Filipos cuahan nde chí Troas. Ta janda quiví uhun já nandique táhan nde xihin ndihi na cán. Ta chí nacando too chága nde usa quiví ñuu Troas cán.

Xíto nihni Pablo ñuu Troas

⁷ Ta quiví domingo nataca ndihi nde, na cúu cuéntá Jesús ña cuxu nde pan yii. Ta sahá ña queta Pablo cuhun da inga quiví itaen sahá ña cán quéa

najánaha cuaha dá nu ná janda quiahva naxinu java ñuu. ⁸ Tóco ndihi na cúu cuénta Jesús cán nanditútu nde ndúu nde in vehe cánúu jiní ninu. Ta chí ndíyihvi ndaa nu ndúu nde jáchi cuahá lámpara cáyi. ⁹ Ta ndaja coo in da loho naní Eutico in coo da ventana xini joho da nu cáhan Pablo. Joo sahá ña cuaha cáhan Pablo sahá ña cán quéa nanaá ini da loho cán chí naquiji da. Já najani dá nandicava da janda nu ñúhu piso uni. Ta tá nanuu na cúu cuénta Jesús cán nandiñehe na da jandá ndii cúu dá. ¹⁰ Anda já nanuu Pablo ta najáca da mé dá jatá da loho cán ta nanumi da da ta já nacachi da já xihin na cúu cuénta Jesús cán:

—A cáyhvi toho ndó jáchi tácu va da yóho — nacachi Pablo chí najánditacu ñahá da.

¹¹ Anda já nandaa tucu Pablo cuahan da vehe piso ninu cán. Já nasahnda java da pan yii cán ta naxixi na ña. Anda já nacahan chága da xihin ná janda quiahva nativi. Já naquee da cuahan da. ¹² Ta sahá mé da loho, da nandicava cán cájii iní na ndáca vaha na da cuahan na jáchi nanditacu da.

Quéé Pablo ñuu Troas ta cuahan da chí ñuu Mileto

¹³ Nasacu ini Pablo cuhun sáhá da anda ñuu Asón. Joo mé nde nandaa nde barco nasahan nde mé ñuu cán jáchi janda cán nacandoo nde ndique táhan nde xihin dá. ¹⁴ Ta tá nandique táhan nde ñuu Asón cán xihin dá já nandaa da xihin ndihi nde ini barco. Já naquee nde cuahan nde ñuu Mitilene. ¹⁵ Casahan nde ini barco ta inga quivi itaan já nayaha nde yati isla Quío ta janda tá nayaha inga tucu quivi já naxinu coo nde ñuu Samos.

Ta naquee tucu nde cuahan nde janda quiahva naxinu coo nde ñuu Trogilio. Ta cán nandiquehe ndée nde ta janda inga quivi itaan naxinu coo nde ñuu Mileto. ¹⁶ Co cuni Pablo cayancá da estado Asia sahá ña cán quéa coo nasahan nde ñuu Efeso. Númi da cuhun da ñuu Jerusalén coo da quivi víco Pentecostés jáchi nasacu ini da coo da víco cán tá ná quiahva Ndióxi ñamanj nu dá.

Cáhan Pablo xihin na sacuahá ñuu Efeso

¹⁷ Ta nani ndúu nde ñuu Mileto cán já nacana Pablo tóco ndihi na sacuahá veñuhu ñuu Efeso cán já ná quixi na. ¹⁸ Ta tá sa nataca na nu ndúu nde já nacachi da já xihin ná:

—Sa xini vaha ndó ndaja nacaja i janda quivi nu cuítí tá naxinu coo i estado Asia yóho. ¹⁹ Níi tiempo nasahjin i tañu ndó cán nacaja chúun i cuénta Jesucristo, xitoho í. Ta coo nandinehe jícó i mí i sahá ña nacaja i. Ta cuahá tañu nasacu u saha ndo. Ta nandoho ini i sahá ña cuni na Israel cahni na yehe. ²⁰ Ta coo najandacoo i cáhan i tuhun Ndióxi xihin ndo jáchi xini vaha i ña jan cuu chindeé a ndohó. Ta najánaaha i ndohó nu táhyí ñayivi ta jari ini vehe ndó. ²¹ Ta najánaaha i nuú na Israel xihin nuú na tóho ña ndítahan nu ná ndicó coo ini na ta jándacoo na cuachi cája na. Ta nacachi i xihin ná ña ndítahan candeé ini na Jesucristo, xitoho í. ²² Ta viti cuhun i chí ñuu Jerusalén jáchi cuni ínima yji Ndióxi ña ná cuhun i cán ta co xini ndía cuu ndoho i ñuu cán. ²³ Ña xini ndusa i quéa ña nacaxi tuhun ínima yji Ndióxi xihin i ña ndá ñuu nacuu nuú cuhun i ña jivi i chicaan ñayivi yehe vecaa á jivi i caja xíxi na xihin i. ²⁴ Joo ni in ña yóho co cája

toho a nuú i. Ta vatí ná cahní na yehe co yíhvi toho i. Jáchí ña cúní mí i quéa cajii ínii jáxinu coo i chuun nasahan Jesucristo nuú i caja i. Ta ña yóho cúu á cáxi tuhun i nuú ñayivi tuhun vaha saha mé á ta saha ndá quiahva quíhvi ini a ñayivi.

²⁵ Sa naxica nuu i tañu ndó ta nacahan i xihin ndó ña vaxi quivi cacomí Ndióxi cuéntá sahá ñayivi. Ta viti xini vaha i ña ni in ndó a cúní ga ndó yehe. ²⁶ Sahá ña cán quéa cáxi tuhun i xihin ndó quivi víti ña co ndójo ga i cuachi saha ndo tá ná jándicoo ndó íchi cuéntá Jesús. ²⁷ Jáchí sa nacaxi tuhun i nu ndo tóco ndihi ña sácú ini Ndióxi caja ta coo nachijehé tuhun toho i sahá nu ndo. ²⁸ Sahá ña cán quéa ndítahan candaa vaha ndó mé va ndó ta candaa vaha ndó tóco ndihi na cúu cuéntá Jesús ná cuahnu chága na xihin tuhun Ndióxi. Jáchí mé ínimá yii Ndióxi nasacu a ndohó ña ná cacomí ndo cuéntá sahá na cúu cuéntá mé á jáchí naxita nii mé á sahá ndihi na tá naxihí a ndica crúxu. ²⁹ Cahan i ña yóho xihin ndo jáchí sa cándaa vaha ini i ña tá sa ná quee yehe cuhun i já quixi java ñayivi ta cacu ini na jándihi na sahá na cúu cuéntá Jesús. Ta tá quiahva cája ndivahyí jándihi rí sahá ndicachi quiahva já cacúni na jándihi na sahá na cúu cuéntá Jesús. ³⁰ Ta jandá mé tañu mé ndó jan va cana java na ta jánahá na ña tuhún nuú ñayivi. Ta nducú na ndiquehe na na sa cúu cuéntá Jesús cuhun na jatá na cán. ³¹ Ña cán quéa cuéntá vaha coo ndó ná a jándahvi na ndohó. Xíní ñúhú ndicuhun ini ndó ña tixi uní cuia coo najándacoo i cahan i xihin ndó ndáa quéa ndítahan nu ndó caja ndó. Ta ñuú ta ndiví nacahan i xihin ndó sahá ña yóho ta chí anda

nasacu u saha ndo ña ná caja ndó ña cúni Ndióxi.

³² Viti jándacoo i ndohó, ñani i, ndahá Ndióxi jáchi cáchi tuhun mé á ña quíhvi ini a tóco ndihi ñayivi. Íin ndée Ndióxi caja ndacú a ndohó já ná cuu coo ndó xihin tóco ndihi na ñacaxi mé á caja ñamaní xihin. ³³ Ta xíní ñúhú ndicuhun ini ndó ña cóo nandiava ini i quehe e jiuhún á jáhma vaha cómi java ga ñayivi. ³⁴ Ña ñacaja i quéa ñacaja chúun i xihin ndahá i já ná a ndímaní ñaha catacu u ta já ná cuu catacu na xíca xihín i. ³⁵ Ta ní tiempo najánaha i nu ndo ña quiáhva já ndítahan nu ndó caja chúun ndó já ná coo ñaha catacu ndó ta já ná cuu chindeé ndó na ndímaní ñaha nuu. Ndítahan ndicuhun ini ndó tuhun ñacachi Jesucristo tá ñacachi a: “Cáji chága ini na jása ñaha a juú ga na ñéhe á”, ñacachi Pablo xihin na sacuahá veñuhu ñuu Efeso cán.

³⁶ Tá nandihí ñacahan Pablo já ñacaxítí da já ñacasáhá xíca tahví da nu Ndióxi xihín ndihi na cúu cuéntá Jesús cán. ³⁷ Ta tóco ndihi na cán nasacu na xihin dá ta ñanumi na da ta já natatí yúhu ná sajóho da ña ndíndayí na da. ³⁸ Tóco ndihi na ñacacuéha ini na saha Pablo jáchi ñacachi da xihin ná ña a cúni ga na da. Tá nandihí já ndáca táhan ndihi na nasahan na xihin dá janda nuú nandaa da barco cán.

21

Cuahan Pablo chí ñuu Jerusalén

¹ Tá nandihí nandindayí nde na cúu cuéntá Jesús cán já nandaa nde barco ñaquee nde cuahan ndacú nde in ñuu naní Cos. Ta inga quiví itaan

já naquee tucu nde cuaḥan nde chí inga ñuu naní Rodas. Ta já naquee nde cuaḥan nde chí ñuu naní Pátara. ² Ta mé cán nandique táhan nde xihín in barco, dó cuḥun chí estado Fenicia ta chí nandaa nde dó cuaḥan nde. ³ Ta nani cásahan nde ini dó já naxini nde isla Chipre xoo íti nde. Joo nayaha saa va nde janda quiahva naxinu coo nde ñuu Tiro ndácaan estado Siria jáchi mé cán ndítahan nu ná jánuu na ñaha ndójo dó. ⁴ Mé ñuu Tiro cán nanditahan nde na cúu cuéntá Jesús ta naçandoo tóo nde xihín ná tixi usa quivi. Ta najácahan ínimā yii Ndióxi na cán ña ná caxi tuhun na xihín Pablo ña ná a cuḥun da ñuu Jerusalén. ⁵ Joo tá sa nayaha usa quivi já naquee nde cuaḥan nde chí ñuu Jerusalén. Ta naqueta tóco ndihi na cúu cuéntá Jesús cán xihín ñájíhí na xihín jahyi válí na já ndáca táhan na xihín nde cuaḥan nde anda yuhú ñuu cán. Ta yatí yuhú tañuhú cán naçaxítí ndihi nde naxica tahví nde nu Ndióxi. ⁶ Ta tá nandindayí táhan nde já nandaa nde barco ta na cán naquee na cuanúhu ná vehe na.

⁷ Naquee nde mé ñuu Tiro cásahan nde nuú tañuhú janda quiahva naxinu coo nde ñuu Tolemaida. Ta mé cán naçahan Ndióxi nde xihín na cúu cuéntá Jesús ndúu cán. Ta chí naçandoo nde in quivi xihín ná. ⁸ Ta inga quivi itaan já naquee nde cuaḥan nde janda quiahva naxinu coo nde ñuu Cesarea. Ta cán naçahan nde vehe in da sáxica nuu cáhan tuhun Ndióxi xihín ñayivi. Mé da yóho naní da Felipe ta naçacuu da in táhan ndíhusa da chindeé na apóstol veñuhu ñuu Jerusalén. Ta chí naçandoo tóo nde vehe da cán. ⁹ Ta naçahiin comí jahyi jíhí da, na tacú. Ta tiaḥva ndícomi ná jáyaha

na tuhun cáhan Ndióxi nuú ñayivi. ¹⁰ Tá sa ñacaja chá quivi ndúu nde vehe da cán já ñaxinu coo in profeta, da ñaquixi estado Judea ta naní da Agabo. ¹¹ Mé da yóho ñasaá da coto nihni da ndehe nu ndúu nde cán. Ta nani íin da xihín nde cán já ñatiin da cinturón ñaha Pablo. Já ñacató da ndáha dá xihín saha dá xihin mé cinturón ta já ñacachi da já:

—Cáchi ínima yii Ndióxi ña tá quiahva ñacaja i ñacató i mí i quiahva já cató na Israel da xihín ñaha cinturón yóho. Ta já ndiquiahva na da ndahá na tóho —ñacachi Agabo cán xihín nde.

¹² Tá ñaxini joho nde ña ñacachi Agabo yóho já ñacasáhá nde cáhan ndahví nde xihin Pablo ña ná a cühun da ñuu Jerusalén. Ta jári na cúu cuéntá Jesús ndúu ñuu Cesarea cán cáhan ndahví na xihin dá ña ná a cühun da. ¹³ Joo ñanducú ñehe Pablo tuhun nuú nde já ñacachi da já:

—Ndá cuéntá quéa sácu cóhó ndo ta cája ndó ña cándí ini i. Candehé ndo ná cahan i xihin ndo. Coó caja toho a ná cató na yehé jáchi íin tiahva i ndiquiahva i mí i quivi i saha Jesús, xitoho í mé ñuu Jerusalén cán —ñacachi da.

¹⁴ Coó ñacuu caja nde cava nde jini dá ña ná a cühun da. Chí coó ñacahan chága nde sahá ña yóho xihin dá ta ñacachi nde:

—Ná coo tá quiahva cúni Ndióxi va.

¹⁵ Tá ñandihi já ñacaja tiahva nde ñaha nde ta já ñaquee nde cuahan nde ñuu Jerusalén. ¹⁶ Ta ndáca táhan java na cúu cuéntá Jesús ñuu Cesarea cán cuahan na xihin nde. Ta tañu na cán ndácaan in da naní Mnason, da ñaquixi isla Chipre. Ta anda sanahá ndíco da íchi cuéntá Jesús. Ta sa mé vehe

da yóho sácú ini nde canduu tóo nde ñuu Jerusalén cán.

Xíto nihni Pablo da nani Jacobo

¹⁷ Tá naxinu coo nde ñuu Jerusalén já cávatá na cúú cuéntá Jesús cán nandiquehe na ndehe. ¹⁸ Ta inga quiví itaan já ndáca Pablo ndehe nasahan nde coto nihni nde Jacobo. Ta tá naxinu coo nde cán já naxini nde ña nataca tóco ndihi na sacuahá nuú na cúú cuéntá Jesús cán. ¹⁹ Ta nacañan Ndióxi Pablo xihin ná já nacasáhá ndícani da nu ná tá in tá in ña náhnu nasahan Ndióxi ñamaní nu dá caja da tañu na tóho, na coo naquixi chichi Israel. ²⁰ Tá naxini johu na cán ña yóho já nacaña cáhnu na Ndióxi. Ta tá nandihí já nacasáhá cáchí na já xihin Pablo:

—Candehé, ñani i. Sa xini vahún ña cuahá ndivaha táhan na naquixi chichi Israel sa ndíco na íchi cuéntá Jesús viti. Ta tóco ndihi na cáchí na ña ndítahan caja na ña sáhdá ley Moisés. ²¹ Joo nañehe ná tuhun ña xíca nuún jáñahún nuú na Israel, na ndúu ñuu tóho ña co xini ñúhú ga caja na ña sáhdá ley Moisés ta ni marca cán co xini ñúhú chicaan ga na yiquí cuñu jahyi na. Ta jáñahún na ña co ndítahan caja na costumbre najándacoo tásáhnu jícó yo nu yo. ²² Ta co xini nde ndía caja nde viti jáchi nditútú na ndúu Jerusalén yóho tá ná candaa ini na ña nacasauñ yóho. ²³ Sahá ña cán quéa caja nde cuéntá ña vaha chága ná cajún ña cáchí nde yóho: Cañehún comí ta ndúu tañu nde yóho já ná cuhun na xuhun. Jáchi sa naxinu coo quiví caja ndícomí da yóho ña nasahan da tuhun da nu Ndióxi caja da. ²⁴ Ná cuhún xihin dá já ná ndaja viún mún xihin dá tá quiahva sáhdá ley

Moisés ta já ná chahvún nuú jatá jini dá. Ta xihín ña yóho cuni na Israel ña a juú ña ndaa cúu tóco ndihi tuhun cáhan ihvi na sahun. Ta xihín ña yóho cuni na ña cája tá cájún ña sáhdá ley Moisés. ²⁵ Ta sahá na tóho, na cúu cuénta Jesús, sa nacahyí nde in carta cuahan nu ná ña ná a jándihí na mé ná caja na ley Moisés. Joo nacachi nde xihín ná ña ná a cáxi na cuñu quíti, rí najoco na nuú tiniñu yúu. Ta ná a cáxi na nji ta ni ná a cúxu na cuñu quíti, rí nasahnú. Ta ná a cóo na xihín ta a ñaha, na co cúu yí ná a ñájihí na. Ña yóho cúu tuhun nacahyí nde nu carta cuahan nuú na tóho –nacachi na sacuaña cán xihín Pablo.

²⁶ Anda já naquehe Pablo ndícomí dataa cán ndaca da cuahan xihín dá. Ta inga quiví itaan já nandaja vií da mé dá nu Ndióxi ta nandivií ndícomí da cán viti. Ta tá nandihí já naquihvi da veñuhu ña caxi tuhun da xihín ná ndá quiví xinu coo ña ndivií na já ná cuu joco in in da cán ñaha nu Ndióxi.

Tín na Pablo veñuhu cáhnu ñuu Jerusalén cuahan da vecaa

²⁷ Tá ja chá xinu coo quiví usa já naxinu coo java da Israel, da naquixi chí estado cuénta Asia. Ta tá naxini na cán ndacaan Pablo ini veñuhu cáhnu cán já najándivaa na ñayivi já ná ndicuíta na caja xíxi na xihín dá. ²⁸ Ta nacasáhá cáyuhú na nuú ñayivi já cáchi na já xihín ná:

—Candehé ndó, na Israel. Caja ndó ñamaní chindeé ndó ndehé xihín da yóho jáchi ní cúu nu xíca da yóho cáhan núu da sahá ñayivi Israel ta jánaña da ñayivi ña co ndítahan nu ná candúsa

na ley Moisés ta ni co ndítahan nu ná caja cáhnu na veñuhu cáhnu ndácaan Jerusalén yóho. Ta viti cája núu chága da jáchi janda java da tóho, da ñuu Grecia najáquihvi da veñuhu í ta jáyuxu da veñuhu yii yóho xihín da tóho jan —cáchi na.

29 Tóco ndihi ña yóho nacachi taa Israel naquixi Asia cán xihín ñayivi jáchi nacahán da ña najáquihvi Pablo cán da naní Trófimo, da tóho ñuu Efeso ini veñuhu joo a juú a já. Nacahán na já jáchi naxini na ndáca táhan Trófimo xihín Pablo xíca nuu da ñuu Jerusalén cán.

30 Xihín ña nacachi da naquixi Asia yóho nandivaa tóco ndihi ñayivi ñuu Jerusalén já xínu na naxinu coo na ñatiin na Pablo. Já ñúhu na da ñatavá na da jatá veñuhu cán ta ivi laá nachicaji na yéhe veñuhu cán. 31 Chí ndúcú na cahní na da joo da cúu jefe soldado cán ñañehé dá tuhun ña nandivaa ndihi ñayivi ñuu Jerusalén cán. 32 Anda já najátaca da cúu jefe soldado xihín java ga da náhnu já xínu da naxinu coo da nu ndívaa ñayivi cán. Tá naxini ñayivi cán vaxi da cúu jefe soldado cán xihín java soldado já najávaa ñahá na chí co cáni ga na Pablo. 33 Anda já nacayati da cúu jefe soldado cán nu Pablo já ñatiin da da cuhun da vecaa. Ta ñasahnda da chuun ña ná cató na da xihín ivi cadena. Tá nandihí já nacasáhá ndáca tuhún da ñayivi ña ndá da cúu da yóho ta ndía nacaja da. 34 Joo sa jíin sa jíin tuhun cáyuhú in in ñayivi cán. Sahá ña cán quéa coo nacuu candaa ini da cúu jefe soldado cán ndá cuachi quéa jácojo na jata Pablo jáchi a juú quiahva ndívaa na cán ndúu na. Sahá ña cán quéa ñasahnda mé jefe

soldado cán chuun ña ná cañehe na Pablo vehe nu ndúu soldado. ³⁵ Ta tá naxinu coo na cán naçahán na ndaa na cuani vehe soldado cán xihín Pablo joo coó naçuu ndaa na jáchi chí cándíhi táhan ñayivi cúní na cani na Pablo. Sahá ña cán quea nasajocó soldado cán Pablo já nandaa na cuani vehe soldado cán xihín dá. ³⁶ Ta tóco ndihi na cán cáyuhú cóhó na ndícaa na jata soldado já cáchi na já:

—Cahní ndó da. Ná quivi da —cáyuhú na.

Ndíquehe Pablo saha mé dá nuú ñayivi cán

³⁷ Ta tá sa ndúcú na jáquihvi na Pablo ini vehe soldado cán já naçachi Pablo já xihín da cúu jefe soldado cán:

—Á quiahva ndó ñamaní nuú i ná cahan i ivi joho tuhun xihín ñayivi yóho.

Anda já nanducú ñehe da cúu jefe soldado cán tuhun nu Pablo já naçachi da já:

—Á tiahvún cahún tuhun griego, dá já. ³⁸ Á a juú toho yóhó cúu da naquixi nación Egipto viti chá va, da najácahan ñayivi ná ndicuíta na cani táhan na xihín gobierno ta nasandaca da comi mil da sáhní ndii nasahan da chí yucú íchí nuú coó ñayivi. Á a juú toho yóhó cúu mé da cán —naçachi da cúu jefe soldado cán xihín Pablo.

³⁹ Anda já nanducú ñehe Pablo tuhun nu dá já naçachi da já:

—Jín va cúu yehe jáchi cúu u in da naquixi chichi Israel ta naçacu u ñuu Tarso, in ñuu cáhnu ndácaan estado Cilicia. Ta viti á cuu quiahva loho ndó ñamaní nuú i ná cahan i ivi tuhun xihín ñayivi yóho —naçachi Pablo xihín da cúu jefe soldado cán.

⁴⁰ Anda já nasahan da cán ñamaní nu Pablo ña ná cahan da xihín ñayivi. Anda já nandaca ndichi Pablo nuú cuani vehe cán já nandiñehe da ndáha dá nu ná já ná catáji yúhu ná. Ta tá sa ñacatáji yúhu ná já ñacasáhá cahan da tuhun hebreo xihín ná.

22

¹ Já ñacasáhá Pablo cáchi da já xihín ná:

—Cuni johó ndó nu cahan i xihín ndóhó, na sacuahá xihín ñani i jáchi cuni ndiquehe e sahá i viti —ñacachi Pablo xihín ná.

² Tá naxini johó na cán ña cahan Pablo tuhun hebreo, mé tuhun cahan mé ná já ñacatáji chága yúhu ná. Anda já ñacachi Pablo já xihín ná: ³ —Yehe cúu u da ñaquixi chichi Israel. Ta ñacacu u ñuu Tarso ndacaan estado Cilicia. Joo nasahnu u ñuu Jerusalén yóho ta mé yóho najacuaha vi xihín in da naní Gamaliel. Ta tá quiahva sáhdá ley Moisés, ña nasacu vaha tásáhnú jícó yo quiahva já nandihi ini i cája i. Ní tiempo nandihi ini i cája chúun i cuéntá Ndióxi xihín ndinuhu ini i tá quiahva cája mé ndó anda quivi viti. ⁴ Naxica nuu i cája xíxi i xihín na ndíco íchi cuéntá Jesús janda quiahva sáhní i na. Ta cuahá taa, ñáha viti naxica nuu i játaca i na ña ná cahun na vecaa. ⁵ Ta xini vaha da cúu sacuahá nuú jutú xihín ndihi na sacuahá veñuhu ña cahan i ña ndaa xihín ndo. Jáchi mé na yóho cúu na ñacahyí tutu nasahan na nuú i já ná ndiquiahva i ña nuú ñani, na ñaquixi chichi Israel ndúu ñuu Damasco cán. Ta nasahan i cán ndínducú u na cúu cuéntá Jesús ña cañehe e na quixi i ñuu Jerusalén yóho caja xíxi nde xihín ná.

Ndícani Pablo ndaja n̄acuu n̄andiquehe da íchi cuéntá Jesús

(Hch. 9:1-19; 26:12-18)

⁶ Joo nani xíca i íchi cuahan i tátuhun caxivi cáa tá sa yati xinu coo i ñuu Damasco cán já in cuití n̄andiyehē ndaa nu íin i ta mé a yóho naquixi a indiví. ⁷ Chí n̄andicava i nu ñúhu ta já n̄axini johō i in a cáhan xihín i já n̄acachi a já: “Saulo, Saulo ndá cuéntá quéa ndícutún cája xísún xihín i”, n̄acachi a xihín i. ⁸ Anda já n̄acasáhá ndáca tuhún i já cáchí i já: “Ndá n̄a cúú ndóhó ta ndaja naní ndo”, n̄acachi i xihín á. Anda já n̄anducú ñehē a tuhun nuú i já cáchí a já: “Yehē cúú Jesús, da ñuu Nazaret ta xihín yehē ndícutún cája xísún viti”, n̄acachi a cán xihín i. ⁹ Ta n̄a cuahan xihín i cán nayihví n̄a tá n̄axini na ña n̄andiyehē nu íin i cán. Joo coo n̄axini johō na ña cáhan xihín i cán. ¹⁰ Anda já n̄acachi i já xihín Jesús: “Cahan ndó xihín i, xitoho i ndíá ndítahan caja i.” Anda jáví n̄acachi a já xihín i: “Candichi ta cuáhán ñuu Damasco nu cáhún cuhun jan. Ta ñuu jan ndicani in da nuun ndíá ndítahan cajún”, n̄acachi Jesús xihín i. ¹¹ Ta chí n̄acuaá nuú i n̄acaja ña n̄andiyihví cán. Sahá ña cán quéa jandá n̄atiin ndaa n̄a ndáca táhan i cán yehē cuahan nde janda quiahva n̄axinu coo nde ñuu Damasco cán.

¹² Ta mé cán nasahjin in da naní Ananías, da cája ña sáhná ley Moisés xihín ndinuhu ini da. Ta tóco ndihi n̄a Israel ndúu Damasco cán cáhan n̄a saha dá ña cúú dá ta vaha. ¹³ Ta mé Ananías yóho nasaa da n̄axito nihni da yehē. Já n̄acasáhá cáchí da já xihín i: “Saulo, ñani i candehé tucu viti.” Tá n̄acachi da já chí ivi laá nanuna nuú i já n̄axini i da. ¹⁴ Anda já n̄acachi da cán já xihín i: “Mé

Ndióxi, ña ñacaja cáhnu tásáhnu jícó yo, mé a cán quéa ñacaxi a yohó já ná candaá inún ndá quéa sácú ini mé á caja xuhun. Ta ñacaxi a yohó já ná cunún Jesús, mé a cája ndinuhu ña ndaa. Ta ñacaxi a yohó já ná cuni johún nu cáhan Jesús. ¹⁵ Já quéa cuhún cahún saha mé á nu tóco ndihi ñayivi. Já ná ndicanún nu ná sahá ña ñaxinún xihín ña ñaxini johún. ¹⁶ A cándati chágun viti. Cuándaco. Cándéé inún Jesucristo viti chí cuáhán candúta já ná ndoo cuachún, caja Ndióxi”, ñacachi Ananías xihín i.

Ndicani Pablo ña ñachindahá Ndióxi da cahán da tuhun vaha saha Jesús nuú na tóho

¹⁷ Tá ñandihí já ñandicó coo i ñuu Jerusalén ta ñasahan i veñuhu cáhnu cán caça tahví i nu Ndióxi. Ta nani xíca tahví i cán já ñaquixi tátuhun in sani nuú i vatí ndíta i. ¹⁸ Ta ñaxini i Jesús, xitoho i já ñacachi a já xihín i: “Camún cuáqueún ñuu Jerusalén yóho jáchi a cándúsa toho ña yóho tuhun vaha cahun sahá i”, ñacachi Jesús xihín i. ¹⁹ Anda já ñanducú ñehe e tuhun nu Jesús já cáhí i já xihín á: “Candehé ndo, xitoho i. Sa xini vaha tóco ndihi ñayivi ña ñaxica nuu i ndijáá veñuhu tiin i ña cándéé ini ndohó ta já ñacani i ña ta ñataán i ña vecaa. ²⁰ Ta sa xini ña ña tá ñasahní ña Esteban, mé da ñaxica nuu cáhan tuhun vaha saha mé ndó, in ñasacuu u xihín ña ñasahní ñahá cán. Jáchi táhán ini i cándichi i ndáá i jahmá ñayivi cán nani sáhní ña Esteban”, ñacachi i xihín Jesús. ²¹ Anda já ñacachi Jesús já xihín i: “Cuáqueún cuhun jáchi chindahá xíca i yohó cuhún cahún sahá i nuú ñayivi tóho, ña coo ñaquixi chichi Israel”, ñacachi Jesús xihín i — ñacachi Pablo xihín ña cán.

Cáhan chága Pablo xihin mé da cúu jefe nu ndíhi soldado

²² Nasanduu táji na Israel cán nani cáhan Pablo xihin ná. Joo tá naçahan da sahá na tóho cán já naçasáhá cáyuhú na já cáhí na já:

—Cahní ndó da jan. Ná quivi da. Co ndítahan ga nu dá coo da ñuyíví yóho —cáhí na cán cáyuhú na.

²³ Ta sahá ña ndúcú ndeé na cáyuhú na ta jáni na jáhma ná nu táchi ta janda ña yácá jácana nihni na nu táchi. ²⁴ Sahá ña cán quéa nasahnda da cúu jefe soldado cán chuun ña ná jáquihvi na Pablo cán ini vehe soldado. Ta tá nandihvi da já nasahnda da chuun ña ná jácaxáhan na da xihin churú ní já ná nahma da ndía naçaja da ta ndá saha quéa ndícuíta ñayivi cán xihin dá. ²⁵ Joo tá sa naçató na Pablo ta ndúcú na jácaxáhan na da já naçachi Pablo já xihín in soldado cán:

—Ta viti cahan ndó xihín i á núná nu ndo jácaxáhan ndó in da cúu taa romano tá cámaní yíi caja vií ndó saha dá tá quiahva sáhdá ley romano jáchi yehe cúu u da romano —naçachi Pablo xihín soldado cán.

²⁶ Tá naxini johó da ña yóho chí ivi laá nasahan da cáxi tuhun da nu da cúu jefe soldado cán já cáhí da já xihín dá:

—Cuéntá vaha coo ndó ta coto a cája xíxi ndó xihín da jan jáchi cúu dá taa romano —naçachi in soldado cán.

²⁷ Anda já naçayatí da cúu jefe soldado cán nu Pablo já naçasáhá ndáca tuhún ñahá da já cáhí da já:

—Á ndaa cúun taa romano —cáhí da.

—Ajan, taa romano cúu u —nacachi Pablo xihin dá.

²⁸ Anda já nacasáhá cáchí mé da cúu jefe soldado cán já xihin Pablo:

—Yehe nachahvi i cuahá ndivaha jjuhún já nacuu nanduu u in taa romano —nacachi da cán xihin Pablo.

Ta já cáchí Pablo já xihin dá:

—Joo yehe cúu u taa romano jáchí já nacacu u —nacachi Pablo.

²⁹ Tá naxini johu na cúni jácaxáhan Pablo cán ña yóho chí nayihví na já nacasáhá xíca játá na cáxoo na nu dá. Ta janda mé da cúu jefe soldado cán nayihví da jáchí sa natiin na da vatí cúu dá taa romano.

Ndíquehe Pablo saha mé dá nuú na sacuahá Israel

³⁰ Ta inga quivi itaan natavá da cúu jefe soldado cán cadena nasandico ndáha Pablo. Ta sahá ña cúni da cán candaa ini da ndá cuachi quea jácojo na jata Pablo sahá ña cán quea najátaca da na sacuahá nuú jutu xihin na sacuahá Israel. Anda já ñéhe da Pablo já nasacu da da nuú na cán.

23

¹ Anda já nasandehé Pablo nu tóco ndihi na sacuahá nuú na Israel cán já nacasáhá cáchí da já xihin ná:

—Candehé ndo, ñani i. Janda jihna ta janda quivi víti cája i ña cúni Ndióxi ta xini mé á ndaja ndacaan jiní i —nacachi Pablo.

² Joo da cúu sacuahá nuú jutu naní Ananías cán nasahnda da chuun nuú na ndíta yati xihin Pablo

cán ña ná cani na jahndá yúhu dá. ³ Anda já ñacachi Pablo xihín Ananías cán:

—Tá quiahva ñacani na jahndá yuhú i quiahva já cani Ndióxi yohó, da cō cúú tá quiahva ndáa da. Íun jan ndaja ndíchún yehe jáchi jácojo na cuachi jatá i ña cō sácú vaha i ley. Joo yohó ñandava ndojún ña sáhndá ley jáchi ñasahndún chuun ña ná cani na yehe —ñacachi Pablo xihín Ananías cán.

⁴ Anda já ñacasáhá ña ndúu cán cáhan ña xihín Pablo já cáchi ña já xihín dá:

—Cuéntá coún jáchi cáñahún xihín da cúú jutú sacuahá chága ñu ndíhi jutú cuéntá Ndióxi —ñacachi na xihín Pablo.

⁵ Anda já ñacachi Pablo já:

—Cáñnu coo ini ndó, ñani i jáchi cō xini toho i ña cúú da jan jutú sacuahá chága ñu ndíhi jutú cuéntá Ndióxi. Mé tuhun Ndióxi sáhndá chuun já cáchi a já: “A cáñahún xihín da cómi chuun sahá ñuu ndó” —ñacachi Pablo.

⁶ Tá ñandihi já ñandicuni Pablo ña ndúu java ña saduceo ta ndúu ri java ña fariseo mé cán. Sahá ña cán quéa ñacahan cóhó Pablo já ñacachi da já:

—Candehé ndo, ñani i. Yehe cúú u in da fariseo ta in fariseo ñasacuu ri tátá i. Ta viti cája vii ña yóho sahá i sahá ña cándúsa i ña vaxi quiví nditacu tucu ndii —ñacachi Pablo.

⁷ Tá ñacachi Pablo já ivi laá ñandicuita ña fariseo xihín ña saduceo ndítuhún xihín táhan na já ñasahnda java táhan na. ⁸ Jáchi ña saduceo cán cō cándúsa na ña vaxi quiví nditacu tucu ndii. Ta ni cō cándúsa na ña ndúu tátó Ndióxi. Ta ni cō cándúsa na ña íin ínimá ñayivi. Joo ña fariseo cándúsa va na tóco ndihi ña yóho. ⁹ Tóco ndihi ña cán cáyuhú ña

ndúu na. Sahá ña cán quéa nandaca ndichi java na jánaha ley Moisés, mé na cuahan xoo na fariseo cán. Já nacasáhá cáchi na já xihin tóco ndihi ñayivi cán:

—Coó toho cuachi ná caja da nani Pablo yóho. Jáchi ndá ínima yii quéa nacañan xihín da yóho á tá coó ta ndá tát Ndióxi quéa nacañan xihín da yóho. Sahá ña cán quéa tá ná cañan ihvi yó xihín da yóho cúú á tátuhun cáni táhan í xihín Ndióxi —nacachi na jánaha ley Moisés xihin ná.

¹⁰ A juú quiahva nacasáhá ndíva ñayivi cán sahá ña cán quéa nacasáhá yíhvi da cúú jefe soldado cán ña tiahva náá tiin na Pablo ta jácuachi na da. Sahá ña cán quéa nasahnda da chuun ña ná quixi soldado tavá da Pablo tañu ñayivi cuaha cán. Ta já ná cañehe tucu na da cuhun da vehe soldado cán.

¹¹ Ta ñuú inga quiví itaan já nacañaha nuu Jesús, xitoho í nu Pablo ta nacañan xihin dá já nacachi a já:

—A ndícani inún, Pablo jáchi tá quiahva nacañun sahá í nuú ñayivi ñuu Jerusalén yóho quiahva já cañun sahá í nuú ñayivi ndúu ñuu Roma —nacachi Jesús xihin dá.

Sácú ini na Israel cañí na Pablo

¹² Ta inga quiví itaan já najándique táhan java na Israel tuhun na ña cañí na Pablo. Ta nacachi na a cúxu na ta ni ticuúí a cóho na janda quiahva ná cañí na Pablo. Ta nacachi xihin táhan na ña cuhun cháhan jata ndá da naxixi á naxihi ticuúí nani tácu Pablo. ¹³ Ta yáha ga nuú ivi jico ta a cúú da najándique táhan tuhun caja ña yóho. ¹⁴ Tá nandihí já naquee na nasahan na cañan na xihín

da sacuaḥa nuú jutu cán xihín na sacuaḥa nuú na Israel cán já nacachi na já xihín ná:

—Tóco ndihi nde najándique táhan nde tūhun nde cahní nde Pablo. Ta nachicaan nde cháhan jata ndá da ná cuxu nani tácu Pablo. ¹⁵ Sahá ña cán quéa caja ndó ñamaní jándique táhan ndó tūhun ndó xihín java ga na sacuaḥa jan já ná caḥan ndó xihín da cúú jefe soldado já ná cañehe tucu da Pablo quixi da nu ndo. Ta caḥan loho ndó xihín dá ña cúni ndó caja vii cuéé chága ndó sahá ña nacaja Pablo. Já va cachi ndó xihín da cúú jefe soldado cán ta ndehe canduu tiaḥva nde cahní nde da tá ná quixi da íchi —nacachi na xihín na sacuaḥa cán.

¹⁶ Joo in ta loho, da cúú jaxi Pablo nañehe dá tūhun ña sácú ini na cahní na Pablo sahá ña cán quéa xínu da nasahan da cáxi tūhun da nu Pablo vehe soldado cán. ¹⁷ Tá nandihí nandicani ta loho cán ña yóho nu Pablo já nacana da in táhan da cúú soldado cán já nacachi da já xihín dá:

—Cajún ñamaní candacún da loho yóho ná cuḥun da nuú da cúú jefe nu soldado. Jáchi ín tūhun cúni da yóho caḥan da xihín da cán —nacachi Pablo xihín dá.

¹⁸ Anda já ndáca soldado cán da cúú jaxi Pablo nasahan da nuú da cúú jefe soldado cán já nacachi da já xihín dá:

—Da naní Pablo ndácaan vehe soldado naxica da ñamaní nuú i ña ná candaca i da loho yóho quixi i ñehé e da jáchi ín tūhun cúni da caḥan da xihín ndo —nacachi da.

¹⁹ Anda já naṭiin jefe soldado cán ndahá ta loho cán já naṭavá xóo da da já nacasáhá ndáca tūhun ñahá da já nacachi da já xihín dá:

—Ndíá cúnun cahún xihín i —nacachi da.

²⁰ Anda já nacasáhá taa loho cán cáxi tuhun da já nacachi da já:

—Najándique táhan na Israel tuhun na ña caça na ñamaní nu mé ndó ña ná cañhe tucu ndó Pablo nuú na sacuaña nuú na Israel cán ña cavií vaha chága sahá dá. ²¹ Joo a cándúsa ndó caja ndó ña cúní na jáchi yáha chága nuú ivi jico taa ndáti jehé na íchi ña cahní na Pablo. Ta nandique táhan tuhun na ña a cúxu na ni a cóho na ticuú janda quiahva ná cahní na Pablo. Ta viti ndáti na candehé na á caja ndó ña cúní na —nacachi jaxi Pablo cán xihín da cúu jefe soldado.

²² Ta tá nandihí já nacachi da cúu jefe soldado cán xihín dá ña ná a ndícani da nuú ni in ñayivi sahá ña sácú ini na Israel caja na xihín Pablo. Chí naquee da loho cán cuahan da.

Chíndahá na Pablo cuahan da nuú gobernador naní Felix

²³ Anda já nacana jefe soldado cán ivi da sáhná chuun nuú soldado ta nasahnda da chuun nu dá ña ná caja tiahva da ivi ciento soldado táhan da xíca sáhá xihín uní jico uxu soldado táhan da cándójó cuáyí. Ta natahnda chuun nu dá ña ná caja tiahva da inga ivi ciento táhan da ñéhe lanza já ná candaca na Pablo cuhun da ñuu Cesarea cán. Ta ná quee na cuhun na tátuhun caa in sacuaá. ²⁴ Ta nasahnda da chuun ña ná caja tiahva na cuáyí canúu Pablo cuhun da. Ta nasahnda da chuun ña ná candaa vaha na Pablo já ná cuu xinu coo vaha da nuú da cúu gobernador naní Felix ñuu Cesarea cán. ²⁵ Ta nachindahá da in carta cuahan xihín

ná ja na ndiquiahva na ña nuú da cúu gobernador cán ta ña yóho cúu mé tuhun nacahyi nu carta cán:

²⁶ “Yehe cúu Claudio Lisias ta chindahá i carta yóho nu ndo, tá Felix. Ta nu carta yóho cáhan Ndióxi yehe xihin ndo, da cúu da cáhnu ñuu Cesarea cán. ²⁷ Candehé ndo, tá Felix. Chindahá i da yóho nu ndo jáchi natiin na Israel da ta ndúcú na cahní na da. Joo tá nacandaa ini i ña cúu dá da romano já nasahan i xihin java soldado ta nacandaa nde da ndáha na cán. ²⁸ Ta sahá ña cuni candaa ini i ndá cuachi jácojo na jata dá sahá ña cán quea nasanehe e da nasahan i nuú na sacuaha nuú na Israel cán. ²⁹ Já nacandaa ini i ña jácojo na cuachi jata dá saha ley mé va na. Ta sahá ña coo cuachi nacaja da nu mí sahá ña cán quea coo naxeen nde ña ná cahní na da ta ni janda vecaa coo cáni nu dá cuhun da, cáhan i. ³⁰ Joo nacandaa ini i ña sácú ini na Israel cahní na da sahá ña cán quea chindahá vaha i da nu mé ndó. Ta nacachi i xihin na xójo ini xihin dá ña ná saa na nu mé ndó cacu na saha dá ndía ndóho na xihin dá. Ña yóho cúu ndihi ña cáhan i xihin ndo, tá Felix. Ndióxi ná coo xihin ndo”, cáchi carta cuahan xihin Pablo.

³¹ Ta nacaja mé soldado cán tá iin natahnda chuun nu dá. Ta já ñehe ñuu na Pablo nasahan na janda ñuu Antípatris. ³² Ta inga quivi itaan já nandico coo java soldado, da nasahan sahá cán chí vehe soldado. Joo java da cándójó cuayi cán catáhan yii dá xihin Pablo cuahan da. ³³ Ta tá naxinu coo da ñuu Cesarea já nandiquiahva da carta cán nuú da cúu gobernador. Ta nandiquiahva ri da Pablo nuú da cán. ³⁴ Ta tá sa nandihí nacahvi da cúu gobernador

carta cán já naçasáhá ndáca tuhún da Pablo saha ndá ñuu naquixi da. Ta tá naçandaä ini da ña cúú Pablo da ñuu Cilicia ³⁵ já naçachi da já xihín dá:

—Janda quiahva ná xinü çoo na jácojo cuachi jatun anda já caja víi i sahún —naçachi Felix cán xihín Pablo.

Tá nandihí já naçahnda da chuun ña ná candaa vaha na Pablo nani ndácaan da vechúun Herodes cán.

24

Ndíquehe Pablo saha mé dá nuú da cúú gobernador naní Felix cán

¹ Ta tá sa nayaha uhun quivi já naxinü çoo da cúú sacuaḥa nuú jutü, da naní Ananías cán. Naxinü çoo da ñuu Cesarea xihín java ga na sacuaḥa ta ndáca da in da ndíquehe sahá na Israel naní da Tértulo. Tóco ndihí na yóho naçatáhan na naçahan na sácú na saha Pablo nuú gobernador cán. ² Ta tá nandihí já naçahan quehe na Pablo já naxinü da nuú ndihí na cán. Anda já naçasáhá Tértulo cán sácú da saha Pablo já naçachi da já:

—Ndíquiaḥva nde ndixahvi nu ndó, tá gobernador jáchi sahá ña ndíchí jiní ndó cúú ndáa vaha ndó ndeḥe. Ta çoo tandóhó tañu nde ta tóco ndihí nde ndúu táji nde. ³ Ñayivi ndúu ndijáá ñuu ín toni ñuhú na xihín ndo ta ndíquiaḥva na ndixahvi nu ndo, tá Felix jáchi cája cuaha ndó ñamaní xihín nde. ⁴ Ta viti ço cúní nde jáquihvi nde ndohó joo caja ndó ñamaní cuni johó loho ndó ña cúní nde çahan nde xihín ndo yóho. ⁵ Candehé ndo, tá Felix. Nanditahan nde da naní Pablo yóho xíca nuu da jáquihvi da ñayivi. Ta níi cúú xíca

nuu da sáhndá java táhan da ñayivi naquixi chichi Israel. Ta mé Pablo yóho cúú dá jiní nuú in táhndá ñayivi, na naní nazarenos. ⁶ Ta jivi mé da yóho nanducú da jáyuxu da veñuhu cáhnu nde ndácaan ñuu Jerusalén cán. Sahá ña cán quéa natiin nde da ta nanducú nde caja vií nde saha dá tá quiahva sáhndá ley mé nde caja nde. ⁷ Joo da cúú jefe soldado, da naní Lisias cán naquihvi da tañu nde ta xihín ña tóyí nacandaa da Pablo ndahá nde. ⁸ Ta nacachi da xihín nde ña ná quixi nde cahan cuachi nde nu mé ndó saha Pablo. Ta viti, tá Felix cuu ndaca tuhún ndó Pablo jan ta já nahma mé va da nu ndo. Ta xihín ña yóho cuu candaá ini ndó ña ndaa cahan nde sácú nde saha dá nu ndo –nacachi Tértulo cán xihín Felix.

⁹ Ta jári na Israel ndúu cán nacachi na ña jivi ndusa ña ndaa quéa. ¹⁰ Anda já nandiñehe gobernador cán ndáha dá ña ná cahan Pablo. Ta já cáchí Pablo já:

—Cáji ini i ndiquehe e sahá i nu mé ndó, tá Felix jáchi sa cuahá cuia cája vií ndó saha ñayivi Israel. ¹¹ Tá ná ndaca tuhún ndó ñayivi yóho já candaá ini ndó ña sa íin uxu ivi quivi naxinu coo i ñuu Jerusalén caja cáhnu i Ndióxi. ¹² Ta ni in tuhún toho ñayivi co ndítuhún ihvi yehe xihín. Ta ni in tuhún toho ñayivi coo najándinihi i veñuhu cáhnu ndácaan Jerusalén cán. Ta ni na táca veñuhu válí ta ni na táca cáyé ñuu Jerusalén cán coo najándinihi i. ¹³ Ta na jácojo cuachi jatá i yóho a cúu caja na nahá na nu mé ndó ña ndaa cahan na saha i. ¹⁴ Ña cúni ndusa i caxi tuhun i xihín ndihi ndó quéa cája cáhnu i Ndióxi, mé a nacaja cáhnu tásáhnu jícó i tá quiahva najánaha Jesús caja í. Vatí cáchí na Israel

yóho ña co xíca i íchi ña ndaa. Joo cándusa i tóco ndihi ley ñacahyí Moisés ta cándusa i ña ñacahyí ña profeta sanahá. ¹⁵ Ta tá quiahva cándusa na yóho quiahva já cándusa ri yehe va jáchi cándusa nde ña vaxi quiví nditacu tóco ndihi ña sa ñaxihí. Coó caja toho á cúu ná ña vaha á ña quini. ¹⁶ Sahá ña cán queá xíni Ndióxi ña ndijáá níi quiví cája i ña vaha xihín ndinuhu ini i nu mé á xihín nuú ñayivi.

¹⁷ Sa íin chá cuiá ñaxica nuu i java ga ñuu. Anda jávi ñandicó coo tucu u ñuu Jerusalén ña quiahva i jiuhún nuú ña Israel ta joco i nu Ndióxi ña ndítahan nuú i joco i nu á. ¹⁸ Ta nani cája i mé ña yóho ndácaan i veñuhu cáhnu Jerusalén cán já java da Israel, da ñaquixi chí estado Asia cán ñaxini da yehe nu ndácaan i ve ñuhu cán. Ta tá ñandihí ñandaja víi i mí i tá quiahva sáhdá ley cája nde, coó ñayivi cuaha ñasanduu cán ta ni in túhún toho ña cán coó ñajándinihi i. ¹⁹ Ta ña ñaquixi chí Asia cán, ña cán va cúu ña ndítahan cacu sahá i nu ndo, tá Felix tá íin a ndóho na xihín i. ²⁰ Joo ña ndúu yóho coó saha toho na cacu na sahá i nu mé ndó. Á tá coó ná cahan ña tá ñandiñehe ná cuachi i tá ñacaja víi ña sahá i nuú ña sacuaha nuú ña Israel cán, dá já. ²¹ In túhún ña ñacaja i tá cája víi ña yóho sahá i queá ñacayuhú u ta ñacachi i: “Cája víi ndó sahá i sahá ña cándusa i ña vaxi quiví nditacu tucu ndii”, ña cán cúu ndihi va ñacachi i xihín ná –ñacachi Pablo cán xihín da cúu gobernador cán.

²² Sa xíni vaha Felix cán ndaja íin ña jánaha ña cúu cuéntá Jesús cán sahá ña cán queá cuni da candati too da caja víi da saha Pablo. Sahá ña cán queá já ñacachi da já xihín ña Israel cán:

—Candati ndó janda quiahva ná casaa da naní Lisias, da cúu jefe soldado ñuu Jerusalén já cuu caja vií i sahá da yóho —ñacachi Felix.

²³ Tá nandihí já ñasahnda Felix chuun nuú da sáhnda chuun nuú soldado cán ña ná chicaan tucu na Pablo vecaa. Ta ñasahnda da chuun ña ná caja vaha da xihín Pablo ta ná quiahva da ñamaní nuú na xíca xihín Pablo coto nihni na da ña ná caja ndíví na nu dá.

²⁴ Tá nayaha chá quiví já ñacasaa tucu Felix cán xihín Drusila, ñájihí da, ña cúu ña Israel. Ñacana tucu Felix Pablo ña ná quixi da ta ná ndicani da nu ná ndá quiahva caja na ndiquehe na íchi cuéntá Jesús. ²⁵ Ta nandicani Pablo nu ná ña ndítahan nu ná caja na ña ndaa cuití va ta ndítahan nu ná cahnu na nuú ña xíca ini yiquí cuñu na caja. Ta nandicani Pablo nu ná ña vaxi quiví caja vií Ndióxi sahá cuachi ñayivi. Anda já nayihví Felix cán já ñacachi da já xihín Pablo:

—Cuáhán viti. Tá núná nuú i já cana tucu u yohó quisún —ñacachi Felix xihín Pablo.

²⁶ Mé Felix yóho ndáti da quiahva Pablo jjuhún nu dá já janí ñahá da. Sahá ña cán quea cuahá ndivaha tañu ñacana da da ndituhún da xihín dá. ²⁷ Ta tixi iví cuia já cuití ñacaja da xihín Pablo janda quiahva nandicojo da naní Porcio Festo chuun cacuu da gobernador saá cán. Ta mé Felix cán coó ñaxeen da janí da Pablo jáchi cúni da candoo vaha da nuú na Israel cán.

25

Ndiquehe Pablo saha mé dá nuú gobernador Festo

¹ Tá sa nayaha uní quiví nandicojo Festo chuun cúu dá gobernador já naquee da ñuu Cesarea cán nasahan da chí ñuu Jerusalén. ² Ta tá naxinu coo da cán nasahan na sacuahá nuú jutú xihín java ga na Israel, na ín chága saha cahan cuachi na saha Pablo nu Festo. ³ Ta ñamani cáhnu naxica na nu dá quéa ña ná cahnda da chuun ná quixi Pablo chí ñuu Jerusalén yóho. Jáchi mé na cán nasacu ini na tiin na Pablo íchi cahní na da. ⁴ Joo coo nacandúsa Festo caja da ña cúní na sahá ña cán quéa nacachi da xihin ná ña ndáá vaha na Pablo ñuu Cesarea cán. Ta sahá ña sácú ini da cuhun yachi da mé cán ⁵ sahá ña cán quéa nacachi da xihin ná já:

—Ndá na cúu na sacuahá nu ndó jan xíní ñúhú cuhun na ñuu Cesarea xihín i já ná cuu cacu na saha Pablo tá ín cuachi nacaja da —nacachi Festo xihín na Israel cán.

⁶ Ta nasahin Festo tátuhun una á uxu quiví cuití va ñuu Jerusalén cán já nandico coo tucu da chí ñuu Cesarea. Ta inga quiví itaan já nasacoo da nu silleta nu sácoo na cája vii sahá ñayivi. Anda já nasahnda da chuun ña ná cana na Pablo quixi da nu dá. ⁷ Ta tá naxinu coo Pablo nu Festo cán já tóco ndihi na Israel, na naquixi ñuu Jerusalén cán nacava nuu na jata Pablo já nacasáhá jácojo cuaha ná cuachi ndeé jata dá. Joo coo ñehe ná ndaja naha na nu Festo cán ña cahan na ña ndaa saha dá. ⁸ Ta nacasáhá Pablo ndíquehe da saha mé dá já nacachi da já:

—Ni in túhún toho cuachi coo nacaja i xihin ley na Israel ta ni xihín veñuhu cáhnu coo nacaja i cuachi. Ta ni nuú da cómí cuéntá sahá ñuu Roma

coó ñacaja i cuachi –ñacachi Pablo xihin tóco ndihi ñayivi ndúu cán.

⁹ Ta sahá ña cúní Festo candoo vaha da nuú na Israel sahá ña cán quéa nandacá tuhún da Pablo já ñacachi da já:

—Á cándúsún cuhún ñuu Jerusalén já ná caja vií i sahún cán –ñacachi da xihin Pablo.

¹⁰ Anda já nanducú ñehe Pablo tuhun nu dá já ñacachi da já:

—Uhun. Coó saha cúu á cuhun i ñuu Jerusalén jáchi viti ñuhú cándichi i nu mé ndó ta cúu ndó gobernador romano. Ta mé ndó ndítahan nuu caja vií sahá i jáchi sa cándaá cáxí ini ndó ña coó cuachi toho ñacaja i xihín na Israel jan. ¹¹ Joo tá ñacaja ndusa i cuachi, mé a ndaa co yíhví toho i quivi i sahá cuachi i. Joo a juú toho ña ndaa cúu tóco ndihi cuachi jíquí jácojo na Israel jan jatá i sahá ña cán quéa co ndítahan nu ndó ndiquiahva ndó yehe nuú na yóho. Ta viti xíca i ñamani nu ndo ña ná chindahá ndó yehe ná cuhun i nuú emperador ñuu Roma ná caja vií mé dá sahá i –ñacachi Pablo xihin Festo cán.

¹² Tá nandihí já nandituhún Festo cán xihín na sacuaḥa cája chúun nu dá cán ndaja ndítahan coo caja da. Anda já ñacachi tucu Festo cán já xihin Pablo:

—Vaha dá já. Nu emperador íin ñuu Roma ñacachún cuhun cúnun. Ta cán cuhun cavií sahún –ñacachi Festo xihin Pablo.

Tá íin Pablo nu rey Agripa

¹³ Tá nayaha chá quivi já ñaxinu coo in rey naní Agripa xihín ña naní Berenice ñuu Cesarea cán

coto nihni na Festo. ¹⁴ Ta nasanduu na chá quivi xihin Festo cán. Ta nani ndúu na cán nandicaní Festo nu rey Agripa ndaja cáa ña ndóho Pablo já nacachi da já xihin dá:

—Ini vechúun yóho ndácaan in da naní Pablo ta anda tá nasacuu Felix gobernador já natiin na da. ¹⁵ Ta tá nasahan i ñuu Jerusalén já sácú na sacuahá nuú jutu xihin na sacuahá nuú na Israel saha dá ña ná quivi da caja i. ¹⁶ Anda já nanducú ñehe e tühun nu ná ña co sahan ley ñuu Roma ñamaní ña cahní na ñayivi tá coo na sácú saha dá ndíta nu táhyí da já ná cuu ndiquehe da saha dá nu ná. ¹⁷ Saha ña cán quéa tá nandai cuu na Israel cán ñuu Cesarea yóho já nandíhi ini i já nasahan i nasacoo i inga quivi itaan nu sacoo na caja vii saha ñayivi. Já nasahnda i chuun ña ná cañehe na Pablo quixi da nuú i. ¹⁸ Tá naxinu coo na cán sácú na saha dá coo nasacu na cuachi cáhnu saha dá tá quiahva cáhán i. ¹⁹ Joo cáhí na ña co cúní da candúsa da tá quiahva cándúsa mé ná. Ta sácú na saha dá jáchi xíca da jánaha dá saha Jesús, mé a naxihí jihna. Joo jánaha Pablo ña tácu yíi va mé Jesús. ²⁰ Ta saha ña co cándaq ini i ndaja caja i caja vii i saha ña yóho saha ña cán quéa nandaca tühún i Pablo ña á cándúsa da cühun da ñuu Jerusalén caja vii i saha dá. ²¹ Joo nacachi da xihin i ña cúní da cavií saha dá nuú da cúu emperador naní Augusto, da íin ñuu Roma cán. Saha ña cán quéa nasahnda i chuun ña ná candaa vaha na da janda quiahva ná cuu chindahá i da nuú emperador já ná caja vii da cán saha dá — nacachi Festo xihin rey Agripa cán.

²² Anda já nacachi rey Agripa cán já xihin Festo:

—Cúni ri yehe va cuni johō i ndá quiahva cáhan da naní Pablo jan —cáchi Agripa.

Anda já nācachi Festo já xihin dá:

—Itaan já cuni johún nuú cáhan da —cáchi Festo.

²³ Ta inga quiví itaan naxinu coo rey Agripa xihin Berenice nu íin Festo cán. Ta ndíxi vaha ndivaha na nandihvi na xihín in yíco da cúu sacuahā nu soldado xihín nātaa íin saha űuu cán. Ta tá nāsanduu na já nāsahnda Festo chuun ña ná cuhun nā quehe na Pablo. ²⁴ Ta tá nāsaā da nu ná já nācachi Festo já:

—Mé ndó, rey Agripa xihín ndihi ndó, nā nātaca ndúu xihín nde yóho. Candehé ndó da naní Pablo cándichi yóho. Cuahá ndivaha táhan nā Israel, nā ndúu űuu Jerusalén xihín nā ndúu űuu Cesarea yóho sácú nā saha dá nuú i. Ta a juú quiahva ndúcú ndéé nā cáhan nā ña ndítahan quivi da caja i. ²⁵ Joo yehe cáhán i ña co ndítahan toho nu dá quivi da jáchi coo cuachi cáhnu ná caja da. Ta sahá ña nāxica mé dá cavií saha dá nuú emperador Augusto íin űuu Roma cán sahá ña cán quéa sácú ini i chindahá i da cuhun da cán cavií saha dá. ²⁶ Joo co xini ndía cahyí i nuú da cúu emperador űuu Roma sahá cuachi sácú nā saha dá. Sahá ña cán quéa nāsani ndichi i da nuú ndihi ndó xihín nu mé ndó rey Agripa já ná ndaja ndichi ndó da já ná ñehe íni i ndāa cahyí i nu carta chindahá i nu emperador űuu Roma cán. ²⁷ Jáchi coo saha cúu á chindahá i da űuu Roma tá a cuú cahyí i ndá cuachi jácojo na jata dá —nācachi Festo xihín nā cán.

26

Ndíquehe Pablo saha mé dá nu rey Agripa

¹ Anda já ñacachi rey Agripa cán já xihin Pablo:
—Viti va sáhan nde ñamaní nuun ndiquehún sahun.

Anda já nandiñehe Pablo ndáha da já ñacasáha cáchi da já:

²—Cájií íní í ña cuu ndiquehe e saha mí í nu ndó, rey Agripa jáchi a juú quiahva cuahá cuachi jíquí jácojo na Israel jatá í. ³ Cájii íní í cáhan í nu mé ndó, rey Agripa jáchi cándaá vaha ini ndó ndaja ín costumbre na Israel. Ta cándaá ini ndó ndá ñaha quéa ndítuhún táhan nde saha. Saha ña cán quéa xíca tahví í nu ndó ña ná caja ndó ñamaní cáhnu coo ini ndó cuni johó ndó ña cahan í xihín ndo yóho.

⁴ Tóco ndihi na Israel xíni vaha na ña ñacaja í tá ñasacuu u da tacú. Ta anda viti xíni na yehe ta xíni na ña ñacaja í ñuu í xihín ñuu Jerusalén. ⁵ Ta xíni vaha na ña janda yúta í ñasacuu u ta fariseo ta chí cuu ndicani na nu mé ndó tá cúni na. Ta ndehe, na fariseo cúu nde na cája ley Moisés xihín ndinuhu chága ini nde a juú ga inga na. ⁶ Ta saha ña cándeé cáhnu ini í ña vaxi quiví jánditacu tucu Ndióxi tóco ndihi na ñaxihí saha ña cán quéa na Israel yóho ñehe na yehe ñacasaá na caja víí na saha í nu mé ndó. Ta mé Ndióxi quéa ñasahan tuhun a nu tásáhnu jícó nde ña nditacu tucu ndii. ⁷ Tóco ndihi ñayivi táhan na ñaquixi chichi ndíhuxu ivi jahyi Israel cán ndáti na cuni na nuú jáxinu coo Ndióxi nuú tuhun a. Saha ña cán quéa ñuu ta ndiví cája cáhnu na Ndióxi. Candehé ndo, rey Agripa. Saha ña cándúsa í tá quiahva cándúsa na cán saha ña cán quéa jácojo na Israel cuachi jatá í viti —ñacachi Pablo xihín rey Agripa.

8 Anda já nacaḥan Pablo xih̄in na Israel ndúu cán já:

—Á mé a ndaa cándúsa ndó ña cuu caja Ndióxi ña nditacu tucu ndii —nacachi Pablo xih̄in na Israel ndúu cán.

9 Anda já nacachi tucu Pablo xih̄in rey Agripa já:

—Yehe nacaḥán i jihna ña ndítahan caja xíxi i xih̄in na cúu cuéntá Jesús, mé a naquixi ñuu Nazaret. 10 Sahá ña cán quéa já nacaja i ñuu Jerusalén jihna. Ta nasahan i naxica i ñamani nuú na sacuaḥa nuú jutú já ná quiahva na ñamani nuú i caja i ña yóho. Ta tá nañehé e ñamani já nataán cuahá i na cúu cuéntá Jesús vecaa. Ta tá nasahní ñahá na, cájii ini i sahá ña cája na já xih̄in ná.

11 Ta cuahá tañu nacaja xíxi i xih̄in ná ña ná caḥan ihvi na saḥa Jesús, mé a cándeé ini na. Níi cúu veñuhu naxica nuu i cája i já xih̄in ná. Ta janda ñuu tóho nasahan i nandicuita ñee e na jáchi nasaxojo ndivaha ini i xih̄in ná.

Ndicani Pablo ndaja nandihvi da íchi cuéntá Jesús (Hch. 9:1-19; 22:6-16)

12 In tañu nañehé e ñamani nuú na cúu sacuaḥa nuú jutú ñuu Jerusalén ña ná cuhun i ñuu Damasco taán i na cúu cuéntá Jesús vecaa. Sahá ña cán quéa naquee e cuahan i. 13 Candehé ndó, rey Agripa. Nani xica i cuahan i íchi cán cúu á tátuhun caxivi já naxini i nandiyihvi ndaa in ñúhu indiví ta yéhe chága ña a juú ga candii. Ta nacava nuu a jatá i xih̄in jatá da casahan xih̄in i cán. 14 Anda já nacuyu ndihi nde nu ñúhu ta já naxini joho nde in a caḥan tuhun hebreo já nacachi a já xih̄in i: “Saulo, Saulo ndá cuéntá quéa ndicuitún cája xísún

xihín i. Candehé. Cája xísún xihín mé vún. Ña cájun xihín i cúú á tátuhun ña cája tindiquí tá sání ndaa rí nu póyá”, ñacachi a cán xihín i. ¹⁵ Anda já ñacasáhá ndáca tuhún i já cáchí i já: “Yo cúú mé ndó cáhan xihín i.” Anda já ñanducú ñehe a cán tuhun nuú i já ñacachi a já: “Yehe cúú Jesús, mé a xíca nuún cája xísún xihín. ¹⁶ Ta viti cuáhán ndacoo, candichi. Ñañaha i mí i nuun já ná cajú chún cuéntá mí i viti já ná ndicanún nuú ñayivi ndaja cáa ña ñaxinún viti ta já ná ndicanún nu ná java ga ñaha jáñaha i nuun chága chí nuu. ¹⁷ Mí i jáca u yohó já ná a cáhni na Israel yohó ni na tóho a cáhni na yohó jáchí nu mé na tóho cán chindahá i yohó cuhún cahún sahá i viti. ¹⁸ Ta jáñahún nu ná ndaja cajú na jándicoo na íchí naá ndivaha nu xíca na viti. Jáchí ndítahan nu ná ndicaca na íchí mí i nu yehe ndivaha. Ta jáñahún nu ná ña ná a ndíquiahva ga na mé ná ndahá tiñáhá sacuaña. Ña ndítahan cajú na quéa ndíquiahva na mé ná ndáhá Ndióxi ta ná cajú na ña cúni mé á. Ta ndítahan candeeé ini na yehe já ná cajú cáhnu ini i sahá cuachi na. Ta já ná cuu in nduu na xihín na ñacaxi i ñehe táhvi ña cúni Ndióxi quiahva nu na”, ñacachi Jesús xihín i tá ñasahan i íchí ñuu Damasco.

Ndicani Pablo sahá chuun cája da

¹⁹ Candehé ndó, rey Agripa. Coó ñacaja sáa ini i. Jáchí ñacaja i tá ín ñasahnda Jesús nuú i cajú i. ²⁰ Sahá ña cán quéa ivi laá ñacasáhá cáhan i tuhun vaha saha Jesús nuú ñayivi ñuu Damasco cán. Tá ñandihí já ñaquee e ñasahan i cahan i ña xihín na ndúu ñuu Jerusalén xihín na ndúu ndijáa ñuu estado Judea. Ta janda xihín na coó ñaquixi chichi

Israel nacahan i saha Jesús. Ta nacachi i xihin ná ña ndítahan nu ná jándacoo na ña núu cája na ta ná ndicó coo na nu Ndióxi. Ta ndítahan caja na ña vaha já ná naha ña mé a ndaa táhyí nandiquehe na íchi cuéntá Jesús. ²¹ Ta sahá ña yóho cuití natiin na Israel yehe nani ndácaan i veñuhu cáhnu ñuu Jerusalén ta viti ndúcú na cahní na yehe. ²² Joo Ndióxi nachindeé a yehe sahá ña cán quea coo najándihi na sahá i. Ta anda viti xíca nuu i cahan i tuhun Ndióxi nuú ñayivi ta coo caja toho a á cúu ná na ndahví á cúu ná na íin cuahá saha. Ta tóco ndihi ña jánaha i nu ná coo cúu á ña quíxi jini mí i jáchi cúu á ña nacachi na profeta xihín ña nacachi Moisés coo. ²³ Ta ña nacachi na cán quea vaxi quiví quixi Jesucristo ñuyiví yóho ta a juú quiahva jándoho na ini a. Ta cahní na ña ta tá nandihí jánditacu tucu a. Ta mé á cacuu ña nu cuití nditacu nuú tóco ndihi na sa naxihi. Ta mé á jánaha nuú ñayivi ndaja cuu cacu ndaa ínima ná coo caja toho a á cúu ná na Israel á cúu ná na tóho —nacachi Pablo xihin rey Agripa cán.

Cúni Pablo ná ndihvi Agripa íchi cuéntá Jesús

²⁴ Tá nacatáji loho Pablo nu cahan da já nacayúhú cóhó Festo nu dá já cáchi da já:

—Nacatáchi vún, Pablo. Nayaha ndivaha quiahva najácuahún sahá ña cán quea nacatáchun —nacachi Festo cán xihin Pablo.

²⁵ Anda já nacachi Pablo já xihin dá:

—Coó nacatáchi toho i, tá Festo jáchi ndinuhu ña ndaa cahan i xihin ndo. ²⁶ Ta xini vaha mé rey Agripa yóho ña cahan i ña ndaa. Ta coo yíhvi cahan i nu dá jáchi cándaq ini i ña xini vaha mé dá ndá saha

cáhan i jáchi co cúu á ñaha nayaha nuú jehé. ²⁷ Ta viti cachi ndó xihín i, rey Agripa á cándúsa ndó ña ñacahan na profeta sanahá. Cája i cuénta cándúsa ndó ña ñacachi na –ñacachi Pablo.

²⁸ Anda já nanducú ñehe rey Agripa cán tuhun já ñacachi da xihín Pablo:

–Ja lóho cuití ta cavún jiní i ña ná nduu u cuénta Jesús, nduu –ñacachi rey Agripa.

²⁹ Anda já ñacachi Pablo já xihín dá:

–Á yachi á cuee coó caja toho a. Ña xíca tahví i nu Ndióxi quéa ná xinu coo mé ndó, rey Agripa xihín tóco ndihi na ndúu yóho cacuu ndó tátuhun mí i jáchi cándeé cáhnu ini i Jesús vatí mé a ndaa co cúni ña ná candico ndáha ndo tátuhun yehé –ñacachi Pablo xihín dá.

³⁰ Tá nandihí ñacahan Pablo já nandaca ndichi rey Agripa cán xihín Berenice ta nandaca ndichi Festo xihín java ga na nasanduu coo xihín dá cán.

³¹ Já natavá táhan na ndítuhún na saha Pablo já cáchi xihín táhan na já:

–Co ndítahan toho nuú da yóho quivi da jáchi coó cuachi ndeé ná caja da ta janda ni vecaa co ndítahan ndacaan da –cáchi na.

³² Anda já ñacachi rey Agripa cán já xihín Festo:

–Tá ná a cáhan da yóho ña cúni da cavií saha dá nuú da cúu emperador ñuu Roma ta cuu janí vún da, nduu –ñacachi Agripa cán xihín Festo.

27

Chindahá na Pablo ñuu Roma

¹ Tá nasacu ini na chindahá na Pablo ná cahun da chí nación Italia nu ndacaan ñuu Roma cavií saha dá já nandiquiahva na da xihín java ga da

ndácaan vecaa cán nuú da naní Julio, da sáhndá chuun nu soldado cuéntá Roma. Mé Julio yóho cúú dá da cómi cuéntá sahá in táhndá soldado naní Augusto. Ta tañu na cūhūn xihūn Pablo cán cuahān ri yehe, da naní Lucas. ² Ta tañu nde cán cuahān ri da naní Aristarco, da ñuu Tesalónica, ña ndácaan estado Macedonia. Nandaa nde ini barco, dó naquixi chí Adramitio. Mé barco yóho cúú dó cūhūn ndijáá ñuu válí ñūhu estado Asia cán. Cándójó nde barco cán cuahān nde. ³ Ta inga quiví itaan naxinu coo nde ñuu Sidón. Ta cán nācāja vaha da naní Julio cán xihūn Pablo jáchī nāsaḥān da ñamanī nu Pablo ña ná coto nihni da na xíní táhan xihūn dá ndúu ñuu Sidón cán já ná caja ndíví na nu dá. ⁴ Ta inga quiví itaan já nandihvi tucu nde barco já naquee nde ñuu Sidón cán. Ta sahá ña vaxi tachī xoo nuú cūhūn barco cán sahá ña cán quéa nayaha nde xoo íti isla Chipre jáchī co xícó cuahá tachī cán. ⁵ Naxojo cava nde anda inga xoo tañuhú ta já nayaha nde in xoo estado Cilicia xihūn estado Panfilia. Anda já naxinu coo nde ñuu Mira ndácaan estado Licia.

⁶ Mé ñuu Mira cán nandiñehé da sáhndá chuun nu soldado cán in barco, dó naquixi chí Alejandría ta cūhūn do chí Italia. Ta najāndaa da ndehē jatā dó cán já naquee tucu nde cuahān nde. ⁷ Cuéé vaha va cuahān nde ta nandoho chá ini nde cuahān nde sahá ña cán quéa cuahá quiví nācāja nde jandā quiahva naxinu coo nde ñuu Gnido. Ta sahá ña xícó ndivaha tachī xoo nuú cūhūn nde cán sahá ña cán quéa nandijama nde nuú cūhūn nde. Ta já nayaha nde inga xoo isla Creta nuú nayaha nde ñuu Salmón. ⁸ Cuéé ndivaha cuahān nde já yaha

nde yati yuhú tañuhú isla Creta cán. Anda jáví naxinu coo nde nuú coo vaha barco naní Puerto Vaha yati ñuu Lasea.

⁹ Sa nayaha cuahá quivi ta nacacuáchi nde. Ta iyō ndivaha cáa cuhun nde xihin barco jáchi nacayati tiempo vixi. Sahá ña cán quéa nacañan Pablo xihin ndihi na cán já cáchí da já xihin ná:

¹⁰ —Candehé ndo. Cája i cuénta iyō ndivaha cáa coho xihin barco jáchi cuu ndihi saha barco xihin ña ndójo dó cuañan do. Ta janda mí cuu quivi — nacachi Pablo xihin ná.

¹¹ Joo coo naxeen da sáhdá chuun nuú soldado cán cuni johō da nu cáñan Pablo. Nacandúsa chága da nuú nacañan da ñéhe barco xihin da xíñaha barco a juú ga nuú nacañan Pablo. ¹² Ña nacachi na quéa a cuú candoo na yóho tiempo vixi jáchi xicó ndivaha tachí. Ta tóco ndihi na nacachi na ña vaha chága ná cuhun nde. Tiahva náá jana quee vaha nde xinu coo nde janda ñuu Fenice cáhán na. Mé ñuu Fenice cán ndacañan isla Creta ta co xicó ndeé nahá tachí cán. Sahá ña cán quéa nasacu ini na canduu na cán tiempo vixi.

Tá naxicó ndivaha tachí nuú tañuhú

¹³ Tá nandihí já nacasáhá vitá uun xicó tachí sahá ña cán quéa nacañan na ña cuu va quee nde cuhun nde. Anda já naquee nde cuañan nde yati yuhú isla Creta cán xica nde cuañan nde. ¹⁴ Joo tá nandihí já naxinu tachí ndeé jata barco. Mé tachí ndeé cán vaxi a chí xoo norte xihin chí nu cána candii. ¹⁵ Ta nacasáhá ñúhu mé tachí ndeé cán barco cuañan do. Ta sahá ña coo nacu caca nde jándicaca nde barco cán xoo nuú vaxi tachí sahá ña cán quéa nasahan nde ñamani ña

na cañehe a barco cuhun do tá quiahva cúni tachi.
 16 Tá nandihi já nayaha nde jatá in isla loho naní
 Clauda. Ta mé cán coó naxicó nahá tachi ndeé.
Anda já nacasáhá nde jándaa nde lancha loho, dó
jítá barco cáhn cán. Joo nandoho chá ini nde
 já nacuu najándaa nde do jata barco cáhn cán.
 17 Tá nandihi já nacava nuu na rieta jata mé barco
cáhn já ná coo tóyí do. Tá nandihi já najánuu
 na jáhma cáhn sándaca barco cán ña ná cañehe mé
tachi do. Nacaja na ña yóho jáchí yíhví na xinu
coo barco xoo naní Sirte nu yají tañuhú ta cán cuu
cachihin dó ñutí. 18 Ta chí coó nasacuiin tachi
ndeé nahá cán inga quíví itaan sahá ña cán quéa
nacasáhá na jácana nihni na ñaha ndójo barco cán
 ini tañuhú já ná ndicama dó. 19 Ta tá naxinu quíví
uni janda mé nde viti nacasáhá nde jácana nde ña
sácaja chúun barco cán ini tañuhú já ná ndicama
chága do. 20 Ta tixi cuahá ndivaha quíví coó naxini
nde nuú candii ta ni quimi co tívi. Ta javí nacuun
quini ndivaha dó ta a juú quiahva naxicó ndivaha
tachi. Sahá ña cán quéa chí nasahnda vaha ini nde:
 “Yóho quíví viti”, nacahán nde.

21 Cuahá ndivaha quíví nayaha ta ni in nde co
cúni cuxu. Sahá ña cán nandaca ndichi Pablo tañu
tócó ndihi na cán já nacasáhá cáchí da ja:

—Tá ná coo joho ndó tá nacahan i xihin ndo ta ná
candoo í ñuu Creta, nduu. Ta ni a ndóho í ña ndóho
í yóho viti ta ni a tívi toho ndihi ñaha nasandojo
barco yóho, nduu. Joo coó naxeen ndó candúsa
ndó ña nacahan i xihin do. 22 Joo cáchí i xihin
ndó viti ña co ndítahan ndicani ini ndó. Jáchí ni in
tuhún toho ndó a quíví vatí mé barco ndihi saha
do. 23 Jáchí yehe cúu u cuénta Ndióxi ta cája cáhn i

mé á. Ta mé ñuú janda véhe nanaha in tátō Ndióxi mé á nuú i. ²⁴ Ta já nacachi a já xihín i: “A cáyihví tohún, Pablo. Jáchi ndítahan xinun tá xinun nuú da cúú emperador ñuu Roma cán. Ta saha yóhó jácacu ri Ndióxi tóco ndihi na ñúhu xuhun ini barco jan já ná a quívi na ini tañuhú”, já nacachi tátō Ndióxi xihín i. ²⁵ Saha ña cán quea a ndícani ga ini ndó jáchi cándeé cáhnu ini i Ndióxi ta cándaá cáxí ini i ña coo tá ín nacachi tátō Ndióxi xihín i. ²⁶ Joo in tachí ndeé caja ña ná tiví barco yóho yati in isla — nacachi Pablo xihín na cán.

²⁷ Sa naxinu sahun quívi xíca nde ini barco cán cuahan nde. Ta in ñuú naxinu coo nde in xoo tañuhú naní Adria. Joo tá xoo johó tá xoo cáa ñéhe tachí nde cuahan nde. Joo tátuhun java ñuu já naxini da ñéhe barco cán ña cáyati nde yuhú tañuhú cuahan nde. ²⁸ Anda já nacasáhá chíquiahvá na ndá quiahva cúná tañuhú yati yúhu nu ndúu nde cán. Ta quiahva cúná do nasacuu oco sahun in metro. Tá nacasáhá cáyati chága barco yúhu cán já nachi quiahva tucu na. Ta cán sa yáji chága ta cúú á oco usa metro quiahva cúná a. ²⁹ Ta saha ña yíhví na xinu coo barco caní ndaa dó tótō ñúhu yati cán saha ña cán quea natiin na rieta ña ndíco comí caa gáncho cáhnu nu cán. Ta najácana na ña ini tañuhú chí xoo cáha mé barco cán já ná tiin a barco ná a cáca ga dó cuhun do chí nuu. Ta a juú quiahva yíhví na ndáti na ná tiví. ³⁰ Joo ndaja coo java da cája chúun xihín barco cán nacahán da quee jehé da xihín lancha loho cán cuhun da. Saha ña cán quea nacasáhá da ndáxí da lancha loho cán ña jánuu da do nuú tañuhú ta já cuhun da, cáhán da. Ta nacasáhá cája da tátuhun táán chága da caa

gáncho cán ini tañuhú já ná tiin a barco xoo chí nuu do. ³¹ Joo naxini Pablo ña cája da sahá ña cán quéa nacaxi tuhun da nuú da sáhndá chuun nuú soldado ta xihín nuú soldado cán já cáchí da já xihín ná:

—Tá ná quee da jan cuhun da já quéa ndihi saha ndó ini tañuhú —nacachi Pablo.

³² Anda já nasahan soldado cán nasahnda da rieta ndíco lancha loho cán já najándicava da dó ini tañuhú.

³³ Ta tá sa yati tivi yaa já najácahan Pablo tóco ndihi na cán ña ná cuxu na vatí loho. Já nacachi da já xihín ná:

—Sa nayaha sahun quivi co xíxi ndó ta ni co quíji ndo. ³⁴ Sahá ña cán xíca i ñamaní nu ndó ña ná cuxu ndó vatí chá va. Xíni ñuhú cuxu ndó já ná coo ndéé ndo chindeé ndó mé ndó já ná cacu ndó. Jáchi cacu ndihí. Ta ni janda in túhún ijí jini yo a ndíhi saha —nacachi Pablo xihín ná.

³⁵ Tá nandihí nacachi Pablo ña yóho xihín ná já natiin da in pan ta nu táhyí ndihi na cán nandiquiahva da ndixahvi nu Ndióxi. Tá nandihí já nasahnda java da ña ta nacasáhá da xíxi da.

³⁶ Xihín ña yóho nandindeé ri ini na java cán ta nacasáhá na xíxi na. ³⁷ Ta tóco ndihi nde, na nasañuhu ini barco cán nasacuu nde ivi ciento uní jícó sahun in ñayivi. ³⁸ Tá nandihí naxixi nde ña cúni nde já nasata na trigo ini tañuhú já ná ndicama chága jata barco cán.

Cácoo barco cahá tañuhú

³⁹ Joo tá nativi yaa já naxini na ñundáhyi. Joo cóo nacuu ndicuni da cája chúun xihín barco cán

ndá ñuu cúu á. Ta tá nandihí já naxini na ña ín ñutí nu yáji yuhú tañuhú cán. Anda já naçahán na jácayati na barco yati yúhu cán. ⁴⁰ Sahá ña cán quea ñasahnda na rieta ndíco barco cán já najani dó. Ta naçandoo çaa gáncho ini tañuhú naçaja na. Ta tá nandihí já najánditayi na yitó nuú jahnda ta xihín yító cán naçasáhá na jándicaca na barco cán nuú tañuhú. Ta najándindita tucu na jahmá cáhnu xoo nu barco cán já ná cuu caca dó xihín taçhi. Ta xihín ña yóho naçasáhá barco cán cáyati dó yuhú tañuhú. ⁴¹ Ta in cuití naxinu barco cán nu ndíque táhan ivi táhnda tañuhú. Ta sahá ña naçayáji tañuhú nuú ñutí cán sahá ña cán quea naçatiin nuú barco cán. Ta ni loho ga coo naçuu çuhun do. Joo xihín ña quiçhva ndeé ndacú cáni ndaa tañuhú cán xoo cáha do sahá ña cán quea naçasáhá cháchi dó. ⁴² Anda já nanducú soldado cahni ndihí da na çuahan vecaa ñuu Roma cán. Jáçhi tiaçhva náa jítá na çuhun na nuú tañuhú ta cunu na çuhun na tá sa naçqueta na yuhú tañuhú, cáhán na. ⁴³ Joo da sáhnda chuun nuú soldado cán coo naçahan da ñamani ña ná çaja na já jáçhi cuni da jáçacu da Pablo. Ña naçaja da quea ñasahnda da chuun nuú na tiaçhva jítá ticuií ña ná jácana na mé ná ini tañuhú cán já ná xinu na nuú ñuhú. ⁴⁴ Ta na java, na co tiaçhva jítá ticuií cán naçachi da xihín ná ña ná ndaa na jata yító á jata túhun barco cán já ná xinu na nuú ñuhú. Anda jáví naxinu coo vaça tóco ndihí nde nuú ñuhú.

28

Ín Pablo isla Malta

¹ Tá sa naxinu coo vaha ndihi nde yuhú ñundáhyi cán já nacandaa ini nde ña naní a isla Malta. ² Ta vaha ndivaha nacaja ñayivi ndúu isla cán xihín nde. Nandicahmi na ñúhu jáchi nacasáhá cúun ga javi ta a juú quiahva vixi xíní nde. Chí nacahan na xihín nde ña ná cativi nde catúní nde. ³ Anda já najátaca Pablo java titó íchí, dó quee yávi núhu. Ta tá chójó da títo cán nu ñúhu já naqueta in coo tañu títo cán xínu rí sahá ña ihní ñúhu. Ta natiin rí ndáha Pablo. ⁴ Ta tá naxini na isla Malta cán ña ndícaa coo ndáha Pablo já nacasáhá cáchí xihin táhan na já:

—Ndá da sáhní ndji cúu da yóho jáchi vatí coo naxihí da ini tañuhú joo yóho cúni Ndióxi jándihi a saha dá —nacachi na.

⁵ Joo mé Pablo naquiji nihni da coo ndícaa ndáha dá cán nu ñúhu cándaha cán ta coo ña ná ndoho da. ⁶ Tóco ndihi na cán ndáti na cuni na ña ná quihvi cuiñu ndáha dá á tá coo ta in cuití ndicava da quivi da, nacahan na. Ndáti na java cán cuni na ndaa ndoho Pablo joo tá sa nacannahá ndáti na coo ñaha ná ndoho toho Pablo cán. Anda já nandijama jini ná ta nacasáhá na cáhan na ña cúu dá in ndiόxi.

⁷ Yati nuú naxinu nde cán nasacuu a ñundáhyi da naní Publio, da cómi cuénta saha isla cán. Ta tixi uní quivi nandiquehe vaha ndivaha da ndehe ta vaha nacaja da xihín nde. ⁸ Ta ndaja coo quihvi tátá Publio cándúhu dá ndóho da cuehe nii ta chícāan cáhni ñahá. Ta já nasahan Pablo naxito nihni da da ta nacasáhá Pablo xíca tahví da nu Ndióxi saha dá ta nachinúu Pablo ndáha dá jini dá ta já nandivaha da. ⁹ Tá naxini java ga na quihvi ndúu isla cán ña nacaja Pablo já naquixi na nu dá ña ná ndaja vaha da na chí nandivaha na. ¹⁰ Ta

nandiquiahva na ndixahvi nuú nde ta najasá na cuahá ñaha nuú nde. Tá naxinu cōo quiví ndaa nde barco cuhun nde já nasahan na ña xini ñuhú nde cuhun nde.

Xínu cōo Pablo ñuu Roma

¹¹ Nasanduu nde tátuhun uní yoo isla cán janda quiahva nandaa nde in barco, dó nasandati yaha tiempo vixi mé isla Malta cán. Mé barco cán naquixi dó chí Alejandría. Ta nuu do cándaa ivi tiniñu yúu ndióxi cája cáhnu na cán. In a naní a Cástor ta inga a naní Pólux. ¹² Naquee nde cuahan nde já naxinu nde in ñuu naní Siracusa ta cán nasanduu nde uní quiví. ¹³ Ta naquee nde cuahan nde yati yuhu tañuhú janda quiahva naxinu cōo nde ñuu Regio. Joo inga quiví itaan já nacasáhá víi uun xícó tachí chí sur sahá ña cán quéa tá sa nayaha ivi quiví já naxinu nde ñuu Puteoli. ¹⁴ Ta cán nanditahan nde java na cúu cuéntá Jesús. Ta nacañan na xihín nde ña ná canduu nde in semana xihin ná ta já naja nde. Ta tá nandihi já naquee nde cuahan sahá nde chí ñuu Roma. ¹⁵ Ta na cúu cuéntá Jesús ndúu ñuu Roma cán sa ñañeñe ná tuhun ña xinu cōo nde cán. Sahá ña cán quéa naqueta na vaxi na ñeñe ná ndeñe. Java na naquixi janda ñuu nu sáhiin yahvi cáhnu naní a Apio ta java na naquixi janda ñuu naní Uní Taberna. Tá naxini Pablo na cán já nacasáhá ndiquiahva da ndixahvi nu Ndióxi ta nandindacú ini da. ¹⁶ Ta tá naxinu cōo nde ñuu Roma já nandiquiahva da sáhdá chuun nuú soldado cán tóco ndihi da cuahan vecaá cán nuú in da cómi chuun saha mé vecaá ñuu Roma cán. Joo nasahan

na ñamaní nu Pablo coo jíin da vatí nasacu na in soldado ndáá ñahá.

Cáhan Pablo tuhun Ndióxi xihín na ñuu Roma

¹⁷ Tá sa naxinu uní quiivi naxinu coo nde ñuu Roma cán já nacana Pablo tóco ndihi na sacaaha nuú na Israel ndúu ñuu Roma cán. Ta tá sa nataca ndihi na ndúu na já nacachi da já xihín ná:

—Candehé ndó, ñani i. Ni in túhún toho ñaha núu coo nacaja yehe xihín na Israel mé ñuu Jerusalén cán ta ni xihín costumbre nacaja tásáhnú jícó yo. Joo natiin na Israel yehe ta nandiquiahva na yehe nuú na cúu cuéntá gobierno ñuu Roma yóho. ¹⁸ Ta tá nandihí nandaja ndíchí na yehe já nasacu ini na janí na yehe jáchi coo nañehe ná cuachi i sahá ña cuu cahní na yehe. ¹⁹ Joo ndaja coo na Israel coo naxeen na ña ná janí na cán yehe. Sahá ña cán quéa naxica i ñamaní ña ná cavií sahá i nu emperador ñuu Roma yóho. Joo yehe co cuni toho i jácojo i cuachi jatá na Israel jáchi cúu ná na naquixi chichi nuú naquixi mí i. ²⁰ Sahá ña cán quéa nacana i ndohó viti jáchi cuni cuni i ndohó já ná nditúhún i xihín ndo. Cuni ndicani i nu ndo ña ndíco ndáha i xihín cadena yóho sahá mé a nachindahá Ndióxi jácaacu a ndihi yó, na Israel —nacachi Pablo xihín na Israel cán.

²¹ Anda já nanducú ñehe na cán tuhun nu Pablo já cáchi na já xihín dá:

—A ñaha quixi carta estado Judea nuú nde ña cáhan sahá ña cájún. Ta ni na cúu táhan na Israel tá nandai cuu na ñuu yóho coo toho tuhun núu ñehe na ná casaá na nuú nde saha yóho. ²² Joo cuni nde ña ná ndicanún nuú nde ndíá cándúsún jáchi níi

cúú ñuyiví cáhan núu ñayivi sahá na cúú cuéntá Jesús —nācachi na Israel cán xihín Pablo.

²³ Tá nandihí nāsacu na in quiví cahan Pablo xihín ná ta tá naxinu coo mé quiví cán nataka cuahá ndivaha ñayivi mé vehe nu íin Pablo cán. Ta naha ta janda sahini najánaha da nu ná ña cúní Ndióxi cacomí a cuéntá sahá ñayivi. Ta xihín ña nācahyí Moisés sanahá ta xihín ña nācahyí na profeta já nandicaní da nu ná saha Jesús ña ná candeé ini na mé á. ²⁴ Java na cán nācandúsa na ña nācachi Pablo xihín ná joo java na coo naxeen na candúsa na. ²⁵ Ta sahá ña coo nācuu ndique táhan vaha tuhun na Israel cán sahá ña jánaha Pablo sahá ña cán quéa nācasahá na quéa na cuahan na. Tá naxini Pablo ña yóho já nācasahá cáchí da já xihín ná:

—Mé a ndaa nācahan ínima yii Ndióxi nuú tásáhnú jícó yo tá nācahyí Isaías já:

²⁶ Cuáhán cahan xihín ñayivi Israel jan já cachún já xihín ná:

Mé a ndaa táhyí cuni johó ndó joo a cándaá ini ndó. Ta vatí sándehe ndó in ñaha joo co ndícuni ndó ña.

²⁷ Jáchi ihvi ndivaha cúu ini ndó ta co cúní ndó caja ndó ña cáchí i.

Ta co cúní ndó cuni johó ndó ña cáhan i xihín ndó.

Ta co cúní ndó ndicuni ndó ña cája ndó cuachi.

Jáchi tá ná jándacoo ndó cuachi cája ndó,

já quéa cuu caja cáhnú ini i saha ndó,

ta já cuu coo vaha ini ndó, já nācachi ínima yii Ndióxi xihín tásáhnú jícó yo.

²⁸ Anda já nācachi tucu Pablo já xihín ná:

—Ta viti xíní ñúhú candaá ini ndó, na Israel ña sa naxini johó na coo nāquixi chichi Israel tuhun

vaha saha Jesús. Ta cája i cuénta candúsa mé na cán ña —naçachi Pablo xihín ná.

²⁹ Tá nandihi naçahan Pablo ña yóho já nanditúhún cuehe xihín táhan na Israel cán ta já naquee na cuahan na.

³⁰ Naçandoo Pablo ivi ní cuia vehe nuú nachahvi ndojo da. Ta nandiquehe vaha da tóco ndihi na sahan xito nihni ñahá. ³¹ Ta ni co yíhví da cáxi tuhun da xihín ñayivi ña cuni Ndióxi cacomí a cuénta saha ná. Ta najánaha da tuhun vaha saha Jesucristo, xitoho í ta ni in na coo nasaji nuu nu dá caja da ña.

**Tuhun saá ña najá^{ndacoo} Jesucristo nu yo: El
Nuevo Testamento en el mixteco de
Silacayoapan
New Testament in Mixtec, Silacayoapan
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

7f2d3ecf-6d15-55a5-9081-6e970474df2f